

ओं नमः परमात्मने, श्री महागणपतये नमः,  
श्री गुरुभ्यो नमः  
हरिः ओं ॥

कृष्ण यजुर्वेदीय तैत्तिरीय ब्राह्मणम्

द्वितीयाष्टकं- प्रपाठकः 1 - 4

---

## **Version Notes:**

**This is now the current Version 3.0 dated November 30, 2025.**

1. This replaces the earlier version 2.0 dated June 30, 2024.
2. This version has been updated with the errors found and reported till November 15, 2025.
3. Required convention, style and presentation improvements or standardisations has been done wherever applicable.
4. Notify your corrections / suggestions etc to our email id [vedavms@gmail.com](mailto:vedavms@gmail.com)

## **Earlier Versions**

1st Version Number	0.0 dated 24th October 2017
2nd Version Number	1.0 dated 31st December 2019
3rd Version Number	1.1 dated 30th June 2021
4 <sup>th</sup> Version Number	2.0 dated 30th June 2024

---

## Table of Contents

2 कृष्ण यजुर्वेदीय तैत्तिरीय ब्राह्मणे द्वितीयाष्टकं.....	6
2.1 द्वितीयाष्टके प्रथमः प्रपाठकः – अग्निहोत्रब्राह्मणम्.....	6
2.1.1 अनुवाकं 1 – अग्निहोत्रस्योपोद्धातः.....	6
2.1.2 अनुवाकं 2 – अग्निहोत्रनिरूपणम्.....	7
2.1.3 अनुवाकं 3 – उपयोक्ष्यमाणस्य हविषः संस्कारः .....	12
2.1.4 अनुवाकं 4 – उपयुक्तस्य हविषः संस्कारः.....	16
2.1.5 अनुवाकं 5 – काम्यानि होमद्रव्याणि.....	19
2.1.6 अनुवाकं 6 – अभ्युद्द्रवणं, होमाभावप्रतीकारश्च.....	24
2.1.7 अनुवाकं 7 – हविषः सर्वदेवतासंबन्धेन प्रशंसा.....	26
2.1.8 अनुवाकं 8 – दोहनप्रकारोऽग्निहोत्रहोत्रश्च.....	27
2.1.9 अनुवाकं 9 – अग्निहोत्रस्यासंसृष्टहोममन्त्रौ .....	28
2.1.10 अनुवाकं 10 – वह्नेरवस्थाविशेषानुसारेण होमः.....	30
2.1.11 अनुवाकं 11 – कालभेदेन समन्त्रकं परिषेचनम् .....	32
2.2 द्वितीयाष्टके द्वितीयः प्रपाठकः – होतृब्राह्मणम्.....	35
2.2.1 अनुवाकं 1 – दशहोतृमन्त्रस्य क्रत्वर्थपुरुषार्थप्रयोगौ.....	35
2.2.2 अनुवाकं 2 – चतुर्होत्रादिमन्त्राणां क्रत्वर्थप्रयोगः.....	38

---

2.2.3 अनुवाकं 3 – चतुर्होतृपञ्चहोतृमन्त्रग्रहभागयोः पुरुषार्थ प्रयोगः .....	41
2.2.4 अनुवाकं 4 – जगत् सृष्टिकथनमुखेन होतृमन्त्रप्रशंसा .....	44
2.2.5 अनुवाकं 5 – दक्षिणाप्रतिग्रहमन्त्रव्याख्यानम् .....	47
2.2.6 अनुवाकं 6 – द्वादशाहदशमेऽहनि होतृमन्त्राः.....	50
2.2.7 अनुवाकं 7 – सप्तहोतृमन्त्रसाध्ययज्ञप्रशंसा.....	52
2.2.8 अनुवाकं 8 – होतृमन्त्राणां सोमयागाङ्गत्वम् .....	54
2.2.9 अनुवाकं 9 – होतृमन्त्रोत्पत्तिकथनप्रसङ्गेन जगत् सृष्टिः .....	57
2.2.10 अनुवाकं 10 – देवसृष्टिमध्येऽवस्थितस्येन्द्रस्य देवताधिपतित्वम् .....	62
2.2.11 अनुवाकं 11 – होतृमन्त्राणां पुरुषार्थप्रयोगः.....	65
2.3 द्वितीयाष्टके तृतीयः प्रपाठकः – होतृब्राह्मणशेषः.....	71
2.3.1 अनुवाकं 1 – सर्वेषां होतृमन्त्राणां चतुर्होतृशब्देन व्यवहार.....	71
2.3.2 अनुवाकं 2 – नैमित्तिको होतृमन्त्रहोमः.....	72
2.3.3 अनुवाकं 3 – केशवपनाङ्गं पुष्टिवेदनं.....	75
2.3.4 अनुवाकं 4 – प्रतिग्रहमन्त्रमहिमज्ञानम्.....	76
2.3.5 अनुवाकं 5 – प्रश्नोत्तररूपो ब्रह्मविषयस्संवादः .....	80
2.3.6 अनुवाकं – होतृप्रशंसाप्रसङ्गेन क्रतूनामृत्विग् विशेषव्यवस्थापनं, अग्निहोत्रस्य प्राशस्त्यं च .....	82

---

---

2.3.7 अनुवाकं 7 – अग्निहोत्रस्य सर्वक्रतुरुद्भावसाधनेन प्रशंसा.....	85
2.3.8 अनुवाकं 8 – सृष्टिसाधनत्वेन होतृमन्त्रासामर्थ्यं प्रशंसा.....	87
2.3.9 अनुवाकं 9 – वायुरूपत्वज्ञानेन होतृमन्त्राणां प्रशंसा .....	89
2.3.10 अनुवाकं 10 – दशहोतृमन्त्राणां काम्यप्रयोगः .....	92
2.3.11 अनुवाकं 11 – दशहोत्रादिमन्त्रनाम्नां प्रवृत्तिनिमित्तम्.....	94
2.4 द्वितीयाष्टके चतुर्थः प्रपाठकः – उपहोमाः .....	99
2.4.1 अनुवाकं 1 – उपहोमाः .....	99
2.4.2 अनुवाकं 2 – उपहोमाः.....	103
2.4.3 अनुवाकं 3 – उपहोमाः.....	107
2.4.4 अनुवाकं 4 – उपहोमाः.....	113
2.4.5 अनुवाकं 5 – उपहोमाः.....	117
2.4.6 अनुवाकं 6 – उपहोमाः.....	120
2.4.7 अनुवाकं 7 – उपहोमाः.....	126
2.4.8 अनुवाकं 8 – उपहोमाः.....	131

=====

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

## 2 कृष्ण यजुर्वेदीय तैत्तिरीय ब्राह्मणे द्वितीयाष्टकं

2.1 2.1 द्वितीयाष्टके प्रथमः प्रपाठकः – अग्निहोत्रब्राह्मणम्

2.1.1 अनुवाकं 1 – अग्निहोत्रस्योपोद्धातः

T.B.2.1.1.1

अङ्गिर॑सो वै स॒त्रमा॑सत । तेषां॑ पृ॒श्नि॑र्-घ॒र्मधु॑गा॒सीत् ।  
स॒र्जी॒षेणा॑जीवत् । ते॒ऽब्रु॑वन् । कस्मै॒ नु स॒त्रमा॑स्महे ।  
ये॒ऽस्या ओष॑धीर्न॒ जन॑याम॒ इति॑ । ते दि॒वो वृ॑ष्टि-म॒सृज॑न्त ।  
याव॑न्तः स्तो॒का अ॒वाप॑द्यन्त । ताव॑तीरोष॒धयो॑ ऽजायन्त ॥  
ता जा॒ताः पि॒तरो॑ वि॒षेणा॑लिम्पन् । 1 (10)

T.B.2.1.1.2

तासां॑ ज॒ग्ध्वा रु॒प्यन्त्यै॑त् । ते॒ऽब्रु॑वन् । क इ॒दमि॒त्थ-म॑क॒रिति॑ ।  
वयं॑ भा॒गधे॑य-मि॒च्छमा॑ना॒ इति॑ पि॒तरो॑ऽब्रुवन् । किं॑ वा॒ भा॒गधे॑यमि॒ति ।  
अ॒ग्नि॒हो॒त्र ए॒व नो॑ऽप्यस्त्वि॒त्य-ब्रु॑वन् ।

तेभ्य ए॒तद्-भा॒ग॒धेयं॑ प्रायच्छन् । यद्धु॒त्वा नि॒मार्ष्टि॑ ।  
ततो॒ वै त ओष॑धीर-स्वदयन् ॥ य ए॒वं वे॑द । 2 (10)

**T.B.2.1.1.3**

स्वद॑न्तेऽस्मा ओष॑धयः । ते व॒थ्स-मु॒पावा॑सृजन् ।  
इ॒दं नो॑ ह॒व्यं प्र॑दापयेति । सोऽब्र॑वीद् वरं॑ वृ॒णै ।  
द॒श मा॒ रात्री॑र्जातं न दोहन् । आ॒सङ्ग॑वं मा॒त्रा सह॑ च॒राणी॑ति ।  
तस्मा॑द्-व॒थ्सं जा॒तं द॒श रात्री॑र्न दुहन्ति ।  
आ॒सङ्ग॑वं मा॒त्रा सह॑ चरति । वा॒रेवृ॑त॒ह्यस्य॑ ।  
तस्मा॑द्-व॒थ्सं स॑सृष्ट॒धयं॑ रु॒द्रो घा॑तुकः ( ) ।  
अति॑ हि स॒न्धां ध॑यति ॥ 3 (11)

(अ॒लि॒म्पन् - वे॒द - घा॑तुक॒ एकं॑ च) (A1)

**2.1.2 अनुवाकं 2 – अग्निहोत्रनिरूपणम्**

**T.B.2.1.2.1**

प्र॒जाप॑ति-र॒ग्नि-म॑सृजत । तं प्र॒जा अ॑न्वसृज्यन्त । तम॑भा॒ग उ॒पास्त॑ ।  
सोऽस्य॑ प्र॒जाभि॑-र॒पाक्रा॑मत् । तम॑व॒रु॒रुथ्स॑मा॒नोऽन्वै॑त् ।  
तम॑व॒रु॒धं ना॑शक्नोत् । स तपो॑ ऽत॒प्यत॑ ।

सो॑ऽग्नि॒-रु॒पा॒र॒म॒ता॒ता॒पि॒ वै॒ स्य॒ प्र॒जा॒प॒ति॒रि॒ति॒ ।

स॒ र॒रा॒टा॒-दु॒द॒मृ॒ष्ट॒ । 4 (9)

**T.B.2.1.2.2**

तद्-घृ॒त॒म॒भ॒वत् । तस्मा॑द्यस्य॒ दक्षि॑णतः केशा॒ उन्मृ॑ष्टाः ।

तां ज्यै॑ष्ठलक्ष्मी॒ प्रा॒जा॒प॒त्ये॒त्याहुः॑ । यद्-र॒रा॒टा॒-दु॒द॒मृ॒ष्ट॒ ।

तस्मा॑द्-र॒रा॒टे केशा॒ न स॑न्ति । तद्ग्नौ॑ प्रा॒गृ॒ह्णात् ।

तद्व्य॑चि॒कि॒त्स॒त् । जु॒ह॒वा॒नी(३) मा॒ हौ॒षा(३)मि॑ति ।

तद्-वि॑चि॒कि॒त्सायै॑ जन्म ॥ य॒ एवं॑ वि॒द्वान् वि॑चि॒कि॒त्स॒ति॒ । 5 (10)

**T.B.2.1.2.3**

वसी॑य ए॒व चे॑तयते ॥ तं वा॒ग॒भ्य॑वद-ज्जु॒हु॒धी॑ति । सो॑ऽब्रवीत् ।

कस्त्व॑मसीति । स्वै॒व ते॒ वा॒गि॒त्य॑ब्रवीत् । सो॑ऽजु॒हो॒थ्-स्वा॑हेति ।

तत्स्वा॑हाका॒रस्य॑ जन्म ॥ य॒ ए॒व स्वा॑हाका॒रस्य॑ जन्म वेद ।

करो॑ति स्वा॒हाका॒रेण॑ वी॒र्य॑म् ॥

यस्यै॒वं वि॒दुषः॑ स्वा॒हाका॒रेण॑ जु॒ह्व॑ति । 6 (10)

**T.B.2.1.2.4**

भो॒गायै॒वास्य॑ हु॒तं भव॑ति ॥ तस्या॒ आहु॑त्यै पु॒रुष॑-मसृजत ।  
 द्वि॒तीय॑-मजुहोत् । सोऽश्व॑-मसृजत । तृ॒तीय॑-मजुहोत् ।  
 स गाम॑सृजत । च॒तुर्थ॑-मजुहोत् । सोऽवि॑मसृजत ।  
 पञ्च॑म-मजुहोत् । सोऽजाम॑सृजत । 7 (10)

**T.B.2.1.2.5**

सोऽग्नि॑-रबि॒भेत् । आहु॑तीभिर्वै माऽऽप्नो॑तीति ।  
 स प्र॒जाप॑तिं पुनः प्रावि॑शत् । तं प्र॒जाप॑ति-रब्रवीत् ।  
 जाय॑स्वेति । सोऽब्र॑वीत् । किं भा॒गधे॑यमभि ज॒निष्य॑ इति ।  
 तुभ्य॑मेवेदꣳ हूया॒ता इत्य॑ब्रवीत् । स ए॒तद्-भा॒गधे॑य-मभ्य॑जायत ।  
 यद॑ग्निहो॒त्रम् । 8 (10)

**T.B.2.1.2.6**

तस्मा॑दग्निहो॒त्र-मु॑च्यते ॥ तद्धू॑यमा॒न-मादि॑त्योऽब्रवीत् । मा हौ॑षीः ।  
 उ॒भयो॑र्वै-नावे॒तदि॑ति । सोऽग्नि॑-रब्रवीत् । कथं॑ नौ होष्य॑न्तीति ।  
 साय॑मेव तुभ्यं जुह॑वन् । प्रा॒तर्म॑ह्य-मित्य॑ब्रवीत् ।  
 तस्मा॑द॒ग्नये॑ सायꣳ हूय॑ते । सूर्या॑य प्रा॒तः ॥ 9 (10)

**T.B.2.1.2.7**

आ॒ग्ने॒यी॒ वै रा॒त्रिः॑ । ऐ॒न्द्रम॑हः । यदनु॑दि॒ते सूर्ये॑ प्रा॒तर्जु॑हु॒यात् ।

उ॒भय॑मे॒वाग्ने॒यꣳ स्या॑त् । उ॒दि॒ते सूर्ये॑ प्रा॒तर्जु॑होति ।

तथा॑ऽग्नये॑ सा॒यꣳ हू॑यते । सूर्या॑य प्रा॒तः ॥

रा॒त्रिं वा॑ अनु॑ प्र॒जाः प्र जा॑यन्ते ।

अ॒हा प्र॑ति तिष्ठन्ति । यथ्सा॒यं जु॑होति । 10 (10)

**T.B.2.1.2.8**

प्रै॒व तेन॑ जा॒यते॑ । उ॒दि॒ते सूर्ये॑ प्रा॒तर्-जु॑होति । प्र॒त्ये॒व तेन॑ तिष्ठति ॥

प्र॒जाप॑ति-र॒काम॑यत प्र॒जाये॑येति । स ए॒तद॑ग्निहो॒त्रं मि॑थुन-म॒पश्य॑त् ।

तदु॒दि॒ते सूर्ये॑ऽजुहोत् । यजु॑षा ऽन्यत् । तू॒ष्णीम॑न्यत् ।

ततो॑ वै स प्राजा॑यत ।

यस्यै॒वं वि॒दुष॑ उ॒दि॒ते सूर्ये॑ऽग्निहो॒त्रं जु॑ह्वति । 11 (10)

**T.B.2.1.2.9**

प्रै॒व जा॑यते । अथो॒ यथा॒ दि॒वा प्र॑जा॒नन्ने॑ति । ता॒दृगे॒व तत् ॥

अथो॒ खल्वा॑हुः । यस्य॒ वै द्वौ पु॑ण्यौ गृ॒हे व॑सतः ।

यस्तयो॑रन्यꣳ रा॒धय॑त्यन्यं न । उ॒भौ वा॑व स तावृ॑च्छतीति ।

अ॒ग्निं वा॒वादि॒त्यः सा॒यं प्र॒वि॒शति॑ । तस्मा॑द॒ग्निर्दू॒रान्न॑क्तं द॒दृशे॑ ।

उ॒भे हि तेज॑सी स॒ंप॒द्येते॑ । 12 (10)

**T.B.2.1.2.10**

उ॒द्यन्तं वा॒वादि॒त्य-म॒ग्निरनु॑ स॒मारो॑हति ।

तस्मा॑द्भूम॒ ए॒वाग्ने॑र्दि॒वा द॒दृशे॑ । यद॒ग्नये॑ सा॒यं जु॒हुयात्॑ ।

आ सूर्या॑य वृ॒श्च्येत॑ । यथ्सूर्या॑य प्रा॒तर्-जु॒हुयात्॑ ।

आ॒ग्नये॑ वृ॒श्च्येत॑ । दे॒वता॑भ्यः स॒मदं॑ द॒द्ध्यात्॑ ।

अ॒ग्निज्यो॑तिर्-ज्यो॒तिः सूर्यः॑ स्वा॒हेत्ये॒व सा॒यं हो॒तव्य॑म् ।

सूर्यो॑ ज्यो॒तिर् ज्यो॒तिर॒ग्निः स्वा॒हेति॑ प्रा॒तः ।

तथो॒भाभ्या॑ं सा॒यं हू॑यते । 13 (10)

**T.B.2.1.2.11**

उ॒भाभ्यां॑ प्रा॒तः । न दे॒वता॑भ्यः स॒मदं॑ द॒धाति॑ ॥ अ॒ग्निज्यो॑तिरि॒त्याह॑ ।

अ॒ग्निर्वै रे॒तोधाः॑ ॥ प्र॒जा ज्यो॒तिरि॒त्याह॑ । प्र॒जा ए॒वास्मै॑ प्र॒जन॑यति ॥

सूर्यो॑ ज्यो॒तिरि॒त्याह॑ । प्र॒जास्वे॒व प्र॒जाता॑सु रे॒तो द॒धाति॑ ॥

ज्यो॒तिर॒ग्निः स्वा॒हेत्या॑ह ।

प्र॒जा ए॒व प्र॒जाता॑ अ॒स्यां प्र॒तिष्ठा॑पयति ॥ 14 (10)

**T.B.2.1.2.12**

तू॒ष्णीमु॒त्तरा॑-माहु॒तिं जु॒होति॑ । मि॒थुन॒त्वाय॑ प्र॒जात्यै॑ ॥  
यदु॒दिते॑ सू॒र्ये प्रा॒तर्-जु॒हुयात् ।  
यथाऽति॒थये॑ प्र॒दुताय॑ शू॒न्याया॑वस॒थाया॑हा॒र्यꣳ  
हर॑न्ति । ता॒दृगे॒व तत् । क्वाह॑ तत॒स्तद्-भ॒वती॑त्याहुः ।  
यथ्स॑ न वेद । यस्मै॑ तद्ध॒रन्तीति॑ । तस्मा॒द्-यदौष॑सं जु॒होति॑ ।  
तदे॒व संप्र॑ति ( ) । अथो॒ यथा॒ प्रार्थ॑मौष॒सं परि॑ वेवैष्टि॑ ।  
ता॒दृगे॒व तत् ॥ 15 (12)

(अ॒मृष्ट - वि॒चिकि॑त्स॒ति - जुह्व॑ - त्य॒जाम॑सृज - ता॒ग्निहो॑त्रꣳ -  
सू॒र्याय॑ प्रा॒तर् - जु॒होति॑ - जुह्व॑ति - संप॒द्यते॑ - हू॒यते -  
स्था॒पयति॑ - संप्र॑ति द्वे च) (A2)

**2.1.3 अनुवाकं 3 – उपयोक्ष्यमाणस्य हविषः संस्कारः**

**T.B.2.1.3.1**

रु॒द्रो वा ए॒षः । यद॒ग्निः । प॒त्नी स्था॒ली । यन्म॑द्ध्येऽग्ने-रधि॒श्रयै॑त् ।  
रु॒द्राय॑ प॒त्नीम॑पि द॒द्ध्यात् । प्र॒मायु॑का स्यात् ।

उदी॒चोऽङ्गा॑रान् नि॒रू॒ह्याधि॑ श्रयति । प॒त्नियै॑ गोपी॒थाय॑ ॥

व्यन्तान् करोति । तथा प॒त्न्य-प्र॑मायुका भवति ॥ 16 (10)

#### **T.B.2.1.3.2**

घ॒र्मो वा ए॒षोऽशान्तः॑ ॥ अ॒हर॒हः प्र॑वृज्यते । यद॒ग्नि॒होत्र॑म् ।

प्रति॑षिञ्चेत् प॒शुकाम॑स्य । शान्तमि॒व हि प॑श॒व्यम् ॥

न प्रति॑षिञ्चेद्-ब्र॒ह्मवर्च॑सकामस्य । समि॑द्धमि॒व हि ब्र॑ह्मवर्च॒सम् ॥

अथो॒ खलु॑ । प्र॒ति॒षि॒च्यमे॒व । यत्-प्र॑ति॒षि॒ञ्चति॑ । 17 (10)

#### **T.B.2.1.3.3**

तत्-प॑श॒व्यम् । यज्जु॒होति॑ । तद्ब्र॒ह्मवर्च॑सि । उ॒भय॑मे॒वाकः॑ ॥

प्रच्यु॑तं वा ए॒तद॒स्मा-ल्लो॒कात् । अ॒गतं॑ दे॒वलोक॑म् ।

यच्छृ॑तं ह॒वि-र॑नभिघारितम् । अ॒भिद्यो॑तयति । अ॒भ्ये॑वैनद् घा॒रयति॑ ।

अथो॒ दे॒वत्रै॑वैनद्-गमयति ॥ 18 (10)

#### **T.B.2.1.3.4**

पर्य॑ग्नि करोति । रक्ष॑सा-म॒प॒ह॒त्यै ॥ त्रिः पर्य॑ग्नि करोति ।

त्र्या॑वृद्धि य॒ज्ञः । अथो॒ मे॒द्ध्य॒त्वाय॑ ॥

यत्-प्राचीन-मुद्वासयेत् । यजमानञ् शुचा ऽर्पयेत् ।

यद्-दक्षिणा । पितृदेवत्यञ् स्यात् । यत्-प्रत्यक् । 19 (10)

**T.B.2.1.3.5**

पत्नीञ् शुचा ऽर्पयेत् । उदीचीन-मुद्वासयति ।

एषा वै देवमनुष्याणाञ् शान्ता दिक् ।

तामेवैन-दनूद्-वासयति शान्त्यै ॥ वर्त्म करोति ।

यज्ञस्य सन्तत्यै ॥ निष्टपति । उपैव तथ्स्तृणाति ॥ चतुरुन्नयति ।

चतुष्पादः पशवः । 20 (10)

**T.B.2.1.3.6**

पशूनेवा-वरुन्धे ॥ सर्वान्-पूर्णा-नुन्नयति । सर्वे हि पुण्या राद्धाः ॥

अनूच उन्नयति । प्रजाया अनूचीनत्वाय ।

अनूच्येवास्य प्रजा ऽर्द्धुका भवति ॥ सं मृशति व्यावृत्यै ॥

नाहोष्यन्नुप सादयेत् । यदहोष्यन्नुप सादयेत् ।

यथा ऽन्यस्मा उपनिधाय । 21 (10)

**T.B.2.1.3.7**

अ॒न्यस्मै॑ प्र॒यच्छ॑ति । ता॒दृगे॒व तत् । आ॒ऽस्मै॑ वृ॒श्चये॑त ।  
यदे॒व गा॒र्हप॑त्येऽधि॒श्रय॑ति । तेन॑ गा॒र्हप॑त्यं प्री॒णाति॑ ॥  
अ॒ग्नि॒रबि॑भेत् । आ॒हु॒तयो॒ माऽत्यै॑ष्यन्तीति॑ ।  
स ए॒ताञ् स॒मिध॑-मप॒श्यत् । ता॒माऽध॑त्त ।  
ततो॒ वा अ॒ग्नावा॑हु॒तयोऽदि॑ध्रयन्त । 22 (10)

**T.B.2.1.3.8**

यदे॒नञ् स॒मय॑च्छत् । तथ्स॒मिधः॑ स॒मित्त्व॑म् । स॒मिध॒माद॑धाति ।  
समे॒वैनं॑ य॒च्छति॑ । आ॒हु॒तीनां॑ धृ॒त्यै ।  
अथो॑ अ॒ग्नि॒हो॒त्र-मे॒वेद्ध॑मवत्-करोति॑ । आ॒हु॒तीनां॑ प्र॒तिष्ठि॑त्यै ॥  
ब्र॒ह्म॒वादि॒नो व॑दन्ति । यदे॒काञ् स॒मिध॑मा॒धाय॑ द्वे आ॒हु॒ती जु॑होति ।  
अथ॒ कस्याञ् स॒मिधि॑ द्वि॒तीया॒-मा॒हु॒तिं जु॑होतीति॑ । 23 (10)

**T.B.2.1.3.9**

यद्-द्वे॑ स॒मिधा॑वा॒दद्ध्या॑त् । भ्रा॒तृ॒व्य॒मस्मै॑ ज॒नये॑त् ।  
एकाञ् स॒मिध॑मा॒धाय॑ । यजु॑षा ऽन्या॒मा॒हु॒तिं जु॑होति ।  
उ॒भे ए॒व स॒मिध्व॑ती आ॒हु॒ती जु॑होति । ना॒स्मै भ्रा॒तृ॒व्यं ज॒नय॑ति ॥

आदी॑प्तायां जु॒होति॑ । समि॑द्धमिव॒ हि ब्र॑ह्मवर्च॒सम् ।

अथो॑ यथाऽति॑थिं॒ ज्योति॑ष्कृ॒त्वा परि॑वेवेष्टि॑ । तादृ॑गे॒व तत् ( ) ॥

चतु॑रुन्नयति॑ । द्विर्जु॑होति॑ । तस्मा॑द्-द्वि॒पा-च्यतु॑ष्पादम॒त्ति ।

अथो॑ द्वि॒पद्ये॒व चतु॑ष्पदः॒ प्रति॑ष्ठापयति॑ ॥ 24 (14)

(भव॑ति - प्रति॑षिञ्चति॑ - गम॑यति - प्रत्य॑क् - प॒शव॑ - उप॒निधा  
- या॑दि॒घ्नयन् - तेति॑ - तच्च॑त्वारि॑ च) (A3)

2.1.4 अनुवाकं 4 – उपयुक्तस्य हविषः संस्कारः

**T.B.2.1.4.1**

उत्तरा॑वतीं॒ वै दे॒वा आहु॑तिमजु॒हवुः॑ । अवा॑चीम॒सुराः॑ ।

ततो॑ दे॒वा अभ॑वन् । परा॑ऽसुराः॑ । यं का॒मये॑त॒ वसी॑यान्त् स्या॒दिति॑ ।

कनी॑यस्तस्य॒ पूर्वं॑ हु॒त्वा । उत्तरं॑ भूयो॑ जुहुयात् ।

एषा॑ वा उत्तरा॑वत्याहु॒तिः । तां दे॒वा अजु॑हवुः ।

तत॑स्तेऽभवन् । 25 (10)

**T.B.2.1.4.2**

यस्यै॒वं जुह॑ति । भव॑त्ये॒व ॥ यं का॒मये॑त॒ पापी॑यान्त् स्या॒दिति॑ ।

भूय॑स्तस्य॒ पूर्वं॑ हु॒त्वा । उत्तरं॑ कनी॑यो जुहुयात् ।

ए॒षा वा अवा॒च्याहु॑तिः । ताम॑सुरा अ॒जुह॑वुः ।  
तत॑स्ते परा॑ऽभवन् । यस्यै॒वं जु॑हति । परै॒व भ॑वति ॥ 26 (10)

**T.B.2.1.4.3**

हु॒त्वोप॑ सादय॒-त्यजा॑मित्वाय । अथो॒ व्यावृ॑त्त्यै ॥ गा॒र्हप॑त्यं प्रती॒क्षते॑ ।  
अन॑नुद्ध्यायिन॒-मेवैनं॑ करोति ॥ अ॒ग्निहो॒त्रस्य॒ वै स्था॒णुर॑स्ति ।  
तं यँ ऋ॒च्छेत् । य॒ज्ञ॒स्था॒णु-मृ॑च्छेत् । ए॒ष वा अ॑ग्निहो॒त्रस्य॒ स्था॒णुः ।  
यत्-पूर्वा॑ऽहुतिः । तां यँदु॒त्तरया॑ऽभि जुहु॒यात् । 27 (10)

**T.B.2.1.4.4**

य॒ज्ञ॒स्था॒णु-मृ॑च्छेत् । अ॒तिहा॑य पूर्वा॒माहु॑तिं जुहोति ।  
य॒ज्ञ॒स्था॒णुमे॒व परि॑ वृणक्ति । अथो॒ भ्रातृ॑व्यमे॒वाप्त्वा ऽति॑क्रामति ॥  
अवा॒चीन॑ः सा॒यमु॑प मा॒र्ष्टि । रे॒त ए॒व तद्-द॑धाति । ऊ॒र्ध्वं प्रा॒तः ।  
प्र॒ जन॑यत्ये॒व तत् ॥ ब्र॒ह्मवा॒दिनो॑ वदन्ति । च॒तुरु॑न्नयति । 28 (10)

**T.B.2.1.4.5**

द्वि॒र्जुहो॑ति । अथ॒ क्व द्वे॑ आहु॒ती भ॑वत इति ।  
अ॒ग्नौ वै॑श्वा॒नर॑ इति ब्रूयात् । ए॒ष वा अ॑ग्निर्वै॑श्वा॒नरः॑ ।  
यद्ब्रा॑ह्मणः । हु॒त्वा द्विः॑ प्राश्नाति ।

अ॒ग्नावे॒व वै॒श्वान॒रे द्वे॑ आ॒हुती॑ जु॒होति॑ ॥ द्वि॒र्जु॒होति॑ ।

द्वि॒र्नि॒मा॒र्ष्टि॑ । द्विः प्रा॒श्ना॒ति । 29 (10)

**T.B.2.1.4.6**

षट्॑त् संप॒द्यन्ते॑ । षड्॑वा ऋ॒तवः॑ । ऋ॒तू॒ने॒व प्री॑णाति ।

ब्र॒ह्म॒वा॒दि॒नो॑ वदन्ति । किं॑ दे॒वत्य॑-म॒ग्नि॒हो॒त्रमि॑ति ।

वै॒श्व॒दे॒वमि॑ति ब्रूयात् । यद्-यजु॑षा जु॒होति॑ ।

तदै॒न्द्रा॒ग्नम् । यत्-तू॒ष्णीम् । तत्-प्रा॒जाप॑त्यम् । 30 (10)

**T.B.2.1.4.7**

यन्नि॒मा॒र्ष्टि॑ । तदोष॑धीनाम् । यद्दि॒द्वि॒तीयम् । तत्-पि॒तृ॒णाम् ।

यत्-प्रा॒श्ना॒ति । तद्-गर्भा॑णाम् । तस्मा॒द्-गर्भा॑ अन॒श्जन्तो॑ वर्द्धन्ते ।

यदा॒चा॒मति॑ । तन्म॒नु॒ष्या॒णाम् ॥ उदङ् पर्या॑वृ॒त्याचा॑मति । 31 (10)

**T.B.2.1.4.8**

आ॒त्म॒नो गो॑पी॒थाय॑ ॥ निर्णे॑ने॒क्ति शु॒द्ध्यै॑ ॥ निष्ट॑पति स्व॒गाकृ॑त्यै ।

उद्-दि॑शति । स॒प्त॒र्षी॒ने॒व प्री॑णाति ॥ दक्षि॑णा पर्या॑वर्तते ।

स्वमे॒व वी॒र्य॑मनु पर्या॑वर्तते ।

तस्माद्-दक्षिणोऽर्द्ध आत्मनो वीर्यावत्तरः ।

अथो आदित्यस्यैवावृतमनु पर्यावर्तते ॥

हुत्वोप समिन्धे । 32 (10)

#### **T.B.2.1.4.9**

ब्रह्मवर्चसस्य समिद्ध्यै ॥ न बर्हिरनु प्र हरेत् ।

असंस्थितो वा एष यज्ञः । यदग्निहोत्रम् । यदनु प्रहरेत् ॥

यज्ञं विच्छिन्द्यात् । तस्मान्नानु प्रहत्यम् ।

यज्ञस्य सन्तत्यै ॥ अपो नि नयति ।

अवभृथस्यैव रूपमकः ( ) ॥ 33 (10)

(अभवन् - भवति - जुहुयान् - नयति - माष्टि द्विः प्राश्नाति -

प्राजापत्य - माचामती - न्धे - ऽकः) (A4)

#### **2.1.5 अनुवाकं 5 – काम्यानि होमद्रव्याणि**

##### **T.B.2.1.5.1**

ब्रह्मवादिनो वदन्ति । अग्निहोत्रप्रायणा यज्ञाः ।

किं प्रायण-मग्निहोत्रमिति । वथ्सो वा अग्निहोत्रस्य प्रायणम् ।

अग्निहोत्रं यज्ञानाम् ॥ तस्य पृथिवी सदः ।

अ॒न्तरि॑क्ष॒-मा॒ग्नी॑द्ध॒म् । द्यौर्-ह॒विर्द॑धानम् ।

दिव्या॑ आ॒पः प्रो॑क्ष॒णयः॑ । ओष॑धयो ब॒र्हिः । 34 (10)

**T.B.2.1.5.2**

व॒नस्प॑तय इ॒द्ध्मः॑ । दि॒शः प॑रि॒धयः॑ । आ॒दि॒त्यो यू॑पः ।

यज॑मानः प॒शुः । स॒मु॒द्रोऽव॑भृ॒थः । स॒म्व॑त्स॒रः स्व॑गाका॒रः ।

तस्मा॑दाहि॒ताग्नेः॑ स॒र्वमे॒व ब॑र्हि॒ष्यं द॒त्तं भ॑वति । यथ् सा॒यं जु॒होति॑ ।

रा॒त्रिमे॒व तेन॑ दक्षि॒ण्यां कुरु॑ते । यत्-प्रा॒तः । 35 (10)

**T.B.2.1.5.3**

अ॒हरे॒व तेन॑ दक्षि॒ण्यं कुरु॑ते । यत्-ततो॑ द॒दाति॑ । सा दक्षि॑णा ॥

याव॑न्तो वै दे॒वा अ॒हु॒तमा॑दन् । ते प॒राऽभ॑वन् ।

त ए॒तद॑ग्नि॒होत्रं॑ स॒र्वस्यै॒व स॑म॒वदा॑याजु॒हवुः॑ । तस्मा॑दाहुः ।

अ॒ग्नि॒होत्रं॑ वै दे॒वा गृ॒हाणां॑ निष्कृ॒ति-म॑पश्य॒न्निति॑ ।

यथ्-सा॒यं जु॒होति॑ । रा॒त्रिया॑ ए॒व तद्धु॑ताद्याय । 36 (10)

**T.B.2.1.5.4**

यज॑मानस्या-प॒राभा॑वाय । यत्-प्रा॒तः ।

अ॒ह ए॒व तद्धु॑ताद्याय । यज॑मानस्या-प॒राभा॑वाय ।

यत्-ततोऽश्नाति । हुतमेव तत् ॥

द्वयोः पयसा जुहुयात्-पशुकामस्य । एतद्वा अग्निहोत्रं मिथुनम् ।  
य एवं वैद । प्र प्रजया पशुभिर्-मिथुनैर्-जायते । 37 (10)

**T.B.2.1.5.5**

इमामेव पूर्वया दुहे । अमूमुत्तरया । अधिश्रित्योत्तर-मानयति ।  
योनावेव तद्-रेतः सिञ्चति प्रजनने ॥  
आज्येन जुहुयात्-तेजस्कामस्य । तेजो वा आज्यम् ।  
तेजस्व्येव भवति । पयसा पशुकामस्य । एतद्वै पशूनां रूपम् ।  
रूपेणैवास्मै पशूनव रुन्धे । 38 (10)

**T.B.2.1.5.6**

पशुमानेव भवति । दद्धेनेन्द्रियकामस्य । इन्द्रियं वै दधि ।  
इन्द्रियाव्येव भवति । यवाग्वा ग्रामकामस्यौषधा वै मनुष्याः ।  
भागधेयेनैवास्मै सजातानव-रुन्धे । ग्राम्येव भवति ॥  
अयज्ञो वा एषः । योऽसामा । 39 (9)

**T.B.2.1.5.7**

च॒तु॒रु॒न्नय॑ति । च॒तु॒रक्ष॑रं रथ॒न्तर॑म् । रथ॒न्तर॑स्यै॒ष वर्णः॑ ।  
उ॒परी॑व हरति । अ॒न्तरि॑क्षं वा॒मदे॒व्यम् । वा॒मदे॒व्यस्यै॒ष वर्णः॑ ।  
द्वि॒र्जु॒होति॑ । द॒व्यक्ष॑रं बृ॒हत् । बृ॒हत् ए॒ष वर्णः॑ ।  
अ॒ग्नि॒हो॒त्रमे॒व तथ्॑ साम॒न्वत्-क॑रोति ॥ 40 (10)

**T.B.2.1.5.8**

यो वा अ॒ग्नि॒हो॒त्रस्यो॑प॒सदो॑ वे॒द । उपै॑नमु॒पसदो॑ नम॒न्ति ।  
वि॒न्दत॑ उप॒सत्ता॑रम् । उ॒न्नीयो॑प सा॒दय॑ति । पृ॒थि॒वीमे॒व प्री॑णाति ।  
हो॒ष्यन्नु॑प सा॒दय॑ति । अ॒न्तरि॑क्षमे॒व प्री॑णाति । हु॒त्वोप॑ सा॒दय॑ति ।  
दि॒वमे॒व प्री॑णाति । ए॒ता वा अ॒ग्नि॒हो॒त्रस्यो॑प॒सदः॑ । 41 (10)

**T.B.2.1.5.9**

य ए॒वं वे॒द । उपै॑न-मु॒पसदो॑ नम॒न्ति । वि॒न्दत॑ उप॒सत्ता॑रम् ॥  
यो वा अ॒ग्नि॒हो॒त्रस्या॑श्चा॒वितं॑ प्र॒त्याश्चा॑वितं॒ हो॒तारं॑ ब्र॒ह्माणं॑  
व॒षट्का॑रं वे॒द ।  
तस्य॑ त्वे॒व हु॒तम् । प्रा॒णो वा अ॒ग्नि॒हो॒त्रस्या॑श्चा॒वितम्॑ ।

अ॒पा॒नः॑ प्र॒त्या॒श्रा॒वि॒तम् । म॒नो॑ हो॒ता । चक्षु॑र्-ब्र॒ह्मा ।

नि॒मे॒षो व॑षट्कारः । 42 (10)

**T.B.2.1.5.10**

य ए॒वं वै॑द । तस्य॑ त्वे॒व हु॑तम् ॥

सा॒यं या॑वा॒नश्च॑ वै दे॒वाः प्रा॑त॒र्या॒वा॒णश्चा॑-ग्नि॒हो॒त्रि॒णो गृ॑ह॒मा॒गच्छ॑न्ति ।

ता॒न् यन्न॑ त॒र्पये॑त् । प्र॒जया॑ऽस्य॑ प॒शुभि॑र्वि ति॒ष्ठेर॑न् ।

यत्त॑र्पये॑त् । तृ॒प्ता ए॒नं प्र॒जया॑ प॒शुभि॑-स्त॒र्पये॑युः ॥

स॒जू॒र्दे॒वैः सा॒यं या॑व॒भिरि॑ति सा॒यञ् सं मृ॑शति ।

स॒जू॒र्दे॒वैः प्रा॑त॒र्या॒व॒भिरि॑ति प्रा॒तः ।

ये चै॒व दे॒वाः सा॒यं या॑वा॒नो ये च॑ प्रा॒त॒र्या॒वा॒णः । 43 (10)

**T.B.2.1.5.11**

ता॒ने॒वो॒भया॑ञ् स्त॒र्पय॑ति । त ए॒नं तृ॒प्ताः प्र॒जया॑ प॒शुभि॑ स्त॒र्पय॑न्ति ॥

अ॒रु॒णो ह॑ स्मा॒हौप॑वेशिः ।

अ॒ग्नि॒हो॒त्र ए॒वाह॑ञ् सा॒यं प्रा॑त॒र्वज्रं॑ भ्रातृ॒व्येभ्यः॑ प्र ह॑रामि ।

तस्मा॑न्-म॒त्पा॒पी॒याञ्सो॑ भ्रातृ॒व्या इति॑ ।

च॒तु॒रु॒न्नय॑ति । द्वि॒र्जु॒होति॑ । स॒मि॒थ्-स॒प्त॒मी ।

सप्तपदा शक्वरी । शाक्वरो वज्रः ( ) ।

अग्निहोत्र एव तत्सायं प्रातर्वज्रं यजमानो भ्रातृव्याय प्र हरति ।  
भवत्यात्मना । पराऽस्य भ्रातृव्यो भवति ॥ 44 (13)

(बर्हिः – प्रातर् – हुताद्याय – जायते – रुन्धे – ऽसामा –  
करो – त्येता वा अग्निहोत्रस्यो पसदो – वषट्कार – श्व  
प्रातर्यावाणो – वज्रस्त्रीणि च) (A5)

#### 2.1.6 अनुवाकं 6 – अभ्युद्ववणं, होमाभावप्रतीकारश्च

##### T.B.2.1.6.1

प्रजापति-रकामय-तात्मन्वन्मे जायेतेति । सोऽजुहोत् ।  
तस्यात्मन् वदजायत । अग्निर्-वायुरा-दित्यः ।  
तेऽब्रुवन् । प्रजापति-रहौषी-दात्मन्वन्मे जायेतेति ।  
तस्य वयमजनिष्महि । जायतां न आत्मन्-वदिति तेऽजुहवुः ।  
प्राणानामग्निः । तनुवै वायुः । 45 (10)

##### T.B.2.1.6.2

चक्षुष आदित्यः । तेषां हुतादजायत गौरेव ॥  
तस्यै पयसि व्यायच्छन्त । मम हुतादजनि ममेति ।

ते प्र॒जाप॑तिं प्र॒श्न॑मा॒यन् । स आ॒दि॒त्योऽग्नि॑-मब्रवीत् ।  
य॒तरो नौ॑ जयात् । तन्नौ॑ सहा॒स॒दिति॑ ।  
कस्यै॑ कोऽहौ॑षी॒दिति॑ प्र॒जाप॑ति-रब्रवीत्-कस्यै॑ क इति॑ ।  
प्रा॒णाना॑-मह॒मित्य॑ग्निः । 46 (10)

**T.B.2.1.6.3**

तनु॒वा अ॒हमि॑ति वा॒युः । चक्षु॑षोऽह॒मित्या॑दि॒त्यः ।  
य ए॒व प्रा॒णाना॑महौषीत् । तस्य॑ हु॒ता-द॑जनीति ।  
अ॒ग्नेर् हु॒ता-द॑जनीति । तद॑ग्निहो॒त्रस्या॑-ग्निहो॒त्रत्व॑म् ।  
गौ॒र्वा अ॑ग्निहो॒त्रम् । य ए॒वं वै॒द गौ॑रग्निहो॒त्रमि॑ति ।  
प्रा॒णापा॒नाभ्या॑-मे॒वाग्नि॑ꣳ सम॑र्द्धयति ।  
अ॒व्यर्द्धु॑कः प्रा॒णापा॒नाभ्यां॑ भवति । 47 (10)

**T.B.2.1.6.4**

य ए॒वं वै॒द ॥ तौ वा॒युर॑ब्रवीत् । अनु॒ मा भ॑जतमिति ।  
यदे॒व गा॒र्हप॑त्येऽधि॒श्रित्या॑-हव॒नीय॑-म॒भ्युद्द्र॑वान् ।  
तेन॑ त्वां प्री॒णानि॑-त्यब्रू॒ताम् ।

तस्माद्-यद्-गार्हपत्येऽधि-श्रित्याहवनीय-मभ्युद्भवति ।

वायुमेव तेन प्रीणाति ॥ प्रजापतिर्-देवताः सृजमानः ।

अग्निमेव देवतानां प्रथम-मसृजत ।

सोऽन्य-दालम्भ्य-मवित्त्वा । 48 (10)

#### **T.B.2.1.6.5**

प्रजापतिमभि पर्यावर्तत । स मृत्यो-रबिभेत् ।

सोऽमुमादित्य-मात्मनो निरमिमीत । तं हुत्वा पराङ् पर्यावर्तत ।

ततो वै स मृत्युमपाजयत् । अप मृत्युं जयति । य एवं वेद ॥

तस्माद्-यस्यैवं विदुषः ।

उतैकाह-मुत द्रव्यहं न जुह्वति । हुतमेवास्य भवति ( ) ।

असौ ह्यादित्योऽग्निहोत्रम् ॥ 49 (11)

(तनुवै वायु - रग्निर् - भव - त्यवित्त्वा - भवत्येकं च) (A6)

#### **2.1.7 अनुवाकं 7 – हविषः सर्वदेवतासंबन्धेन प्रशंसा**

##### **T.B.2.1.7.1**

रौद्रं गवि । वायव्य-मुपसृष्टम् । आश्विनं दुह्यमानम् ।

सौम्यं दुग्धम् । वारुण-मधिश्रितम् । वैश्वदेवा भिन्दवः ।

पौ॒ष्णमु॒दन्त॑म् । सा॒रस्व॒तं वि॒ष्यन्द॑मानम् । मै॒त्रं शरः॑ ।  
 धा॒तु-रु॒द्वा॒सित॑म् ( ) । बृ॒हस्प॑ते॒रुन्नी॑तम् ।  
 स॒वि॒तुः प्र॒क्रान्त॑म् । द्या॒वापृ॑थि॒व्यं ह्रि॑यमाणम् ।  
 ऐ॒न्द्रा॒ग्न-मु॒पस॑न्नम् । अ॒ग्नेः पूर्वा॑ ऽऽहु॒तिः । प्र॒जाप॑ते-रु॒त्तरा॑ ।  
 ऐ॒न्द्रं हु॑तम् ॥ 50 (17) (उ॒द्वा॒सितं॑ स॒प्त च॑) (A7)

**2.1.8 अनुवाकं 8 – दोहनप्रकारोऽग्निहोत्रहोत्रश्च**

**T.B.2.1.8.1**

दक्षि॑णत॒ उप॑ सृ॒जति॑ । पि॒तृ॒लो॒कमे॒व तेन॑ जयति ॥  
 प्रा॒चीमा॑वर्तयति । दे॒वलो॒कमे॒व तेन॑ जयति ।  
 उ॒दी॒चीमा॑वृत्य॒ दो॒ग्धि । म॒नुष्य॑लो॒कमे॒व तेन॑ जयति ॥  
 पूर्वा॑ दु॒ह्याज्ज्ये॑ष्ठस्य॒ ज्यैष्ठि॑ने॒यस्य॑ । यो वा ग॒तश्रीः॑ स्यात् ।  
 अ॒परौ दु॒ह्यात्-क॒निष्ठ॑स्य॒ कानि॑ष्ठिने॒यस्य॑ ।  
 यो वा बु॒भूषे॑त् ॥ 51 (10)

**T.B.2.1.8.2**

न सं मृ॑शति । पा॒पव॑स्य॒सस्य॑ व्यावृ॒त्त्यै ॥  
 वा॒यव्यं॑ वा ए॒तदु॑पसृष्टम् । आ॒श्विनं॑ दु॒ह्यमा॑नम् ।

मै॒त्रं दु॒ग्धम् । अ॒र्य॒म्ण उ॒द्वा॒स्य॒मा॒नम् ।  
 त्वा॒ष्ट्र-मु॒न्नी॒य॒मा॒नम् । बृ॒ह॒स्प॒ते-रु॒न्नी॒तम् । स॒वि॒तुः प्र॒क्रा॒न्तम् ॥  
 द्या॒वापृ॒थि॒व्य॒ऽह्नि॒य॒मा॒णम् ॥ 52 (10)

**T.B.2.1.8.3**

ऐ॒न्द्रा॒ग्न॒मु॒प सा॒दि॒तम् । सर्वा॑भ्यो वा ए॒ष दे॒वता॑भ्यो जुहोति ।  
 यो॑ऽग्नि॒हो॒त्रं जु॒होति ॥ यथा॒ खलु॒ वै धे॒नुं ती॒र्थे त॒र्पय॑ति ।  
 ए॒वम॑ग्नि॒हो॒त्री यज॑मानं तर्पयति । तृ॒प्यति॑ प्र॒जया॑ प॒शुभिः॑ ।  
 प्र॒सु॒वर्गं लो॒कं जा॑नाति । प॒श्यति॑ पु॒त्रम् । प॒श्यति॑ पौ॒त्रम् ॥  
 प्र प्र॒जया॑ प॒शुभिर्-मि॒थुनैर्-जा॑यते ( ) ।  
 यस्यै॒वं वि॒दुषो॑ऽग्नि॒हो॒त्रं जु॒ह्वति॑ । य उ॒ चैन॑ दे॒वं वे॒द ॥ 53 (12)  
 (बु॒भू॒षे- दि॒ध्रि॒य॒मा॒णं - जा॑यते द्वे च) (A8)

**2.1.9 अनुवाकं 9 – अग्निहोत्रस्यासंसृष्टहोममन्त्रौ**

**T.B.2.1.9.1**

त्रयो॑ वै प्रै॒यमे॒धा आ॑सन् । तेषां॑ त्रि॒रेको॑ऽग्नि॒हो॒त्र-म॑जुहोत् ।  
 द्वि॒रेकः॑ । स॒कृ॒दे॒कः । तेषां॑ य॒स्त्रिर॑जुहोत् । स ऋ॒चाऽजु॑होत् ।  
 यो द्विः॑ । स यजु॑षा । यः स॒कृत् । स तू॒ष्णीम् ॥ 54 (10)

**T.B.2.1.9.2**

यश्च॑ य॒जु॒षा ऽजु॑हो॒द्यश्च॑ तू॒ष्णीम् । तावु॑भा॒वा॒र्द्ध॑न्नुताम् ।  
तस्मा॑द्-य॒जु॒षा ऽहु॑तिः पूर्॒वा हो॒त॒व्या ।  
तू॒ष्णीमु॑त्तरा । उ॒भे ए॒वर्द्धी॑ अ॒वरु॑न्धे ।  
अ॒ग्निर्-ज्यो॑ति॒र् ज्यो॑ति॒र॒ग्निः स्वा॑हेति॒ सायं॑ जु॒होति॑ ।  
रेत॑ ए॒व तद्-द॑धाति । सूर्यो॑ ज्यो॒ति॒र्-ज्यो॑तिः सूर्यः॑ स्वा॑हेति॒ प्रातः॑ ।  
रेत॑ ए॒व हि॒तं प्र॑ ज॒नय॑ति ॥  
रेतो॑ वा ए॒तस्य॑ हि॒तं न॑ प्र जा॒यते॑ । 55 (10)

**T.B.2.1.9.3**

यस्या॑ग्नि॒हो॒त्रम॑हु॒त॒ꣳ सूर्यो॑ऽभ्यु॒देति॑ । यद्-य॒न्ते स्या॑त् ।  
उ॒न्नीय॑ प्रा॒ङ्मु॒दा॒द्रवे॑त् । स उ॒पसा॑द्यात॒मितो॑-रासीत ।  
स य॒दा ता॑म्येत् । अथ॑ भूः स्वा॑हेति॒ जुहु॑यात् ।  
प्र॒जाप॑तिर्वै भू॒तः । तमे॒वो-पा॑सरत् ।  
स ए॒वैनं॑ त॒त उ॒न्नय॑ति । ना॒र्तिमा॑च्छति॒ यज॑मानः ( ) ॥ 56 (10)  
(तू॒ष्णीं - जा॑यते - यज॑मानः) (A9)

**2.1.10 अनुवाकं 10 – वह्नेरवस्थाविशेषानुसारेण होमः**

**T.B.2.1.10.1**

यद॒ग्नि॒-मु॒द्धर॑ति । वस॑वस्तर्ह्य॒ग्निः । तस्मिन्॒ यस्य॑ त॒थावि॑धे जुह॑ति ।  
वसु॑ष्वे॒वास्या॑ग्निहोत्रं हु॒तं भ॑वति ॥ निहि॑तो धूपाय॒ञ्छे॑ते ।

रु॒द्रास्तर्ह्य॒ग्निः । तस्मिन्॒ यस्य॑ त॒थावि॑धे जुह॑ति ।

रु॒द्रेष्वे॒वास्या॑ग्निहोत्रं हु॒तं भ॑वति ॥ प्र॒थम॑-मि॒द्धम॑र्चि॒रा ल॑भते ।

आ॒दि॒त्यास्तर्ह्य॒ग्निः । 57 (10)

**T.B.2.1.10.2**

तस्मिन्॒ यस्य॑ त॒थावि॑धे जुह॑ति ।

आ॒दि॒त्येष्वे॒वास्या॑ग्निहोत्रं हु॒तं भ॑वति ॥

सर्व॑ ए॒व सर्व॑श इ॒द्धम॑ आदी॒प्तो भ॑वति ।

विश्वे॑ दे॒वास्तर्ह्य॒ग्निः । तस्मिन्॒ यस्य॑ त॒थावि॑धे जुह॑ति ।

विश्वे॑ष्वे॒वास्या॑ दे॒वेष्व॑ग्निहोत्रं हु॒तं भ॑वति ॥

नि॒तरा॑-म॒र्चि-रु॒पावै॑ति लोहि॒नीके॑व भवति । इन्द्र॑स्तर्ह्य॒ग्निः ।

तस्मिन्॒ यस्य॑ त॒थावि॑धे जुह॑ति ।

इन्द्र॑ ए॒वास्या॑ग्निहोत्रं हु॒तं भ॑वति ॥ 58 (10)

**T.B.2.1.10.3**

अङ्गारा भवन्ति । तेभ्योऽङ्गारेभ्योऽर्चिरुदेति । प्रजापति-स्तर्ह्यग्निः ।

तस्मिन्. यस्य तथाविधे जुहति ।

प्रजापतावेवास्याग्निहोत्रं हुतं भवति ॥ शरोऽङ्गारा अद्ध्यूहन्ते ।

ब्रह्म-तर्ह्यग्निः । तस्मिन्. यस्य तथाविधे जुहति ।

ब्रह्मन्नेवास्याग्निहोत्रं हुतं भवति ॥

वसुषु रुद्रेष्वादित्येषु विश्वेषु देवेषु ( ) । इन्द्रे प्रजापतौ ब्रह्मन् ।

अपरिवर्ग-मेवास्यैतासु देवतासु हुतं भवति ।

यस्यैवं विदुषोऽग्निहोत्रं जुहति । य उ चैन देवं वेद ॥ 59 (14)

(आदित्यास्तर्ह्यग्नि - रिन्द्र एवास्याग्निहोत्रं हुतं भवति -

देवेषु चत्वारि च) (A10)

**Special Korvai**

{यदग्निं निहितः प्रथमं सर्व एव नितरामङ्गाराः शरोऽङ्गारा वसुषु  
(ब्रह्मवसुष्वष्टौ)}

2.1.11 अनुवाकं 11 – कालभेदेन समन्त्रकं परिषेचनम्

T.B.2.1.11.1

ऋ॒तं त्वा॑ स॒त्येन॑ परि॒षिञ्चा॑मीति॒ सायं॑ परि॒षिञ्च॑ति ।  
स॒त्यं त्व॑र्तेन॒ परि॒षिञ्चा॑मीति॒ प्रातः॑ । अ॒ग्नि॒र्वा ऋ॒तम् ।  
अ॒सावा॑दि॒त्यः स॒त्यम् । अ॒ग्नि॒मे॒व तदा॑दि॒त्येन॑ सा॒यं परि॒षिञ्च॑ति ।  
अ॒ग्नि॒ना ऽऽदि॒त्यं प्रा॑तस्सः । याव॑दहो॒रात्रे॑ भव॑तः ।  
ताव॑दस्य लो॒कस्य॑ । ना॒र्तिर्न॑ रि॒ष्टिः । ना॒न्तो न॑ पर्य॒न्तोऽस्ति॑ ( ) ।  
यस्यै॒वं वि॒दुषो॑ऽग्नि॒होत्रं॑ जु॒ह्वति॑ ।  
य उ॑ चैन॒ देवं वे॑द ॥ 60 (12)

(अ॒स्ति द्वे च॑) (A11)

=====

**Prapaataka Korvai with starting Words of 1 to 11 Anuvaakams :-**

(अ॒ङ्गिर॑सः – प्र॒जाप॑तिर॒ग्नि॑ – रु॒द्र – उ॒त्तरा॑वतीं – ब्र॒ह्मवा॑दिनो॑  
ऽग्नि॑हो॒त्रप्रा॑यणा य॒ज्ञाः – प्र॒जाप॑तिर॒काम॑यता॒त्मन्व॑द् – रौ॒द्रं ग॑वि –  
दक्षि॑णत – स्त्रयो॑ वै – यद॒ग्नि – मृ॒तं त्वा॑ स॒त्येनै॑कादश)

**Korvai with starting Words of 1, 11, 21 Series of dasinees :-**

(अ॒ङ्गिर॑सः – प्रै॒व ते॑न – प॒शूने॑व – यन्नि॒मार्ष्टि॑ –  
यो वा अ॒ग्निहो॒त्रस्यो॑प॒सदो॑ – दक्षि॑णतः षष्टिः )

**First and Last Word - 1st Prapaatakam, 2<sup>nd</sup> Ashtakam, :-**

(अ॒ङ्गिर॑सो – य उ॑ चैन॒ देवं॑ वैद)

॥ हरिः॑ ओं ॥

॥ कृष्ण यजुर्वेदीय तैत्तिरीय ब्राह्मणे द्वितीयाष्टके प्रथमः प्रपाठकः

समाप्तः ॥

**Details of Dasini & Vaakyams for**  
**Ashtakam 2- Prapaatakam 1 (TB 2.1)**

	Dasini	Vaakyams
Anuvakam 1	3	31
Anuvakam 2	12	122
Anuvakam 3	9	94
Anuvakam 4	9	90
Anuvakam 5	11	113
Anuvakam 6	5	51
Anuvakam 7	1	17
Anuvakam 8	3	32
Anuvakam 9	3	30
Anuvakam 10	3	34
Anuvakam 11	1	12
Total →	60	626

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

## 2.2 द्वितीयाष्टके द्वितीयः प्रपाठकः – होतृब्राह्मणम्

### 2.2.1 अनुवाकं 1 – दशहोतृमन्त्रस्य क्रत्वर्थपुरुषार्थप्रयोगौ

#### T.B.2.2.1.1

प्रजापतिरकामयत प्रजाः सृजेयेति । स एतं दशहोतार-मपश्यत् ।  
तं मनसा ऽनुद्रुत्य दर्भस्तम्बे ऽजुहोत् । ततो वै स प्रजा असृजत ।  
ता अस्मात्सृष्टा अपाक्रामन् । ता ग्रहेणागृह्णात् । तद्ग्रहस्य ग्रहत्वम् ।  
यः कामयेत प्रजायेयेति ।

स दशहोतारं मनसा ऽनुद्रुत्य दर्भस्तम्बे जुहुयात् ।

प्रजापतिर्वै दशहोता । 1 (10)

#### T.B.2.2.1.2

प्रजापतिरेव भूत्वा प्र जायते ॥ मनसा जुहोति ।

मन इव हि प्रजापतिः । प्रजापतेराप्त्यै ॥ पूर्णया जुहोति ।

पूर्ण इव हि प्रजापतिः । प्रजापतेराप्त्यै ॥ न्यूनया जुहोति ।

न्यूनान्द्धि प्रजापतिः प्रजा असृजत । प्रजानां सृष्ट्यै ॥ 2 (10)

**T.B.2.2.1.3**

दर्भस्तम्बे जुहोति । एतस्माद्वै योनेः प्रजापतिः प्रजा असृजत ।  
यस्मादेव योनेः प्रजापतिः प्रजा असृजत ।  
तस्मादेव योनेः प्र जायते ॥ ब्राह्मणो दक्षिणत उपास्ते ।  
ब्राह्मणो वै प्रजाना-मुपद्रष्टा । उपद्रष्टुमत्येव प्र जायते ॥  
ग्रहो भवति । प्रजानां सृष्टानां धृत्यै ॥  
यं ब्राह्मणं विद्यां विद्वांसं यशो न च्छेत् ॥ 3 (10)

**T.B.2.2.1.4**

सोऽरण्यं परेत्य । दर्भस्तम्ब-मुद्ग्रथ्य । ब्राह्मणं दक्षिणतो निषाद्य ।  
चतुर्.होतृन् व्याचक्षीत । एतद्वै देवानां परमं गुह्यं ब्रह्म ।  
यच्चतुर्.होतारः । तदेव प्रकाशं गमयति । तदेनं प्रकाशं गतम् ।  
प्रकाशं प्रजानां गमयति ॥ दर्भस्तम्ब-मुद्ग्रथ्य व्याचष्टे । 4 (10)

**T.B.2.2.1.5**

अग्निवान्. वै दर्भस्तम्बः । अग्निवत्येव व्याचष्टे ॥  
ब्राह्मणो दक्षिणत उपास्ते । ब्राह्मणो वै प्रजाना-मुपद्रष्टा ।  
उपद्रष्टु-मत्येवैनं यश ऋच्छति ॥ ईश्वरं तं यशोऽर्तो रित्याहुः ।

यस्यान्ते॑ व्याचष्ट॑ इति॑ । वरस्तस्मै॑ देयः॑ ।

यदे॒वैनं॑ तत्रो॒प न॑मति । तदे॒वाव॑ रुन्धे ॥ 5 (10)

**T.B.2.2.1.6**

अ॒ग्निमा॒दधानो॑ द॒शहो॑त्रा ऽर॒णिम॑वद॒ध्यात् । प्रजा॑तमे॒वैन॑-मा॒धत्ते॑ ।

तेनै॒वोद्द्रु॑त्याग्निहो॒त्रं जु॑हुयात् । प्रजा॑तमे॒वैन॑-ज्जुहोति ।

ह॒विर्निर्व॑प्स्यन्-द॒शहो॑तारं॒ व्याच॑क्षीत । प्रजा॑तमे॒वैनं॑ निर्व॑पति ।

सा॒मिधे॒नी-र॑नुव॒क्ष्यन्-द॒शहो॑तारं॒ व्याच॑क्षीत ।

सा॒मिधे॒नीरे॒व सृ॑ष्ट्वाऽऽर॒भ्य प्र॑ तनुते ।

अथो॑ य॒ज्ञो वै॑ द॒शहो॑ता । य॒ज्ञमे॒व त॑नुते ॥ 6 (10)

**T.B.2.2.1.7**

अ॒भिच॑रन्-द॒शहो॑तारं जुहुयात् । न॒व वै॑ पु॒रुषे॑ प्रा॒णाः । नाभि॑र्द॒शमी॑ ।

स॒प्राण॑-मे॒वैन॑-म॒भिच॑रति । ए॒ताव॑द्वै पु॒रुष॑स्य स्वम् । याव॑त् प्रा॒णाः ।

याव॑दे॒वास्या॑स्ति । तद॒भिच॑रति ॥ स्व॒कृत॑ इ॒रिणे॑ जुहोति प्र॒दरे॑ वा ॥

ए॒तद्वा अ॒स्यै॑ निर्ऋ॒तिगृ॑हीतम् ( ) ।

निर्ऋ॒तिगृ॑हीत ए॒वैनं॑ निर्ऋ॒त्या ग्रा॑हयति ॥ यद् वा॒चः कू॒रम् ।

तेन॑ वषट्करोति॑ । वाच॑ ए॒वैनं॑ कू॒रेण॑ प्र वृश्चति॑ ।

ताजगार्ति॑-मा॒र्च्छति॑ ॥ 7 (15)

(द॒श॒हो॒ता - सृ॒ष्ट्या॑ - ऋ॒च्छेद् - व्याच॑ष्टे - रु॒न्ध - ए॒व त॑नु॒ते -  
नि॒र्ऋ॒तिगृ॑ही॒तं पञ्च॑ च) (A1)

### 2.2.2 अनुवाकं 2 – चतुर्होत्रादिमन्त्राणां क्रत्वर्थप्रयोगः

#### T.B.2.2.2.1

प्र॒जाप॑ति-र॒काम॑यत द॒र्.श॑पूर्णमा॒सौ सृ॑जे॒येति॑ ।

स ए॒तं च॑तुर्.हो॒तार॑-मपश्यत् । तं मन॑साऽनु॒द्रुत्या॑ ह॒वनी॑येऽजु॒होत् ।

ततो॑ वै स द॒र्.श॑पूर्णमा॒साव॑सृजत । ताव॑स्माथ् सृ॒ष्टाव॑पाक्रामताम् ।

तौ ग्र॑हेणागृह्णात् । तद्ग्र॑हस्य ग्रह॒त्वम् ।

द॒र्.श॑पूर्णमा॒सा-वा॒लभ॑मानः ।

च॑तुर्.हो॒तारं॑ मन॑साऽनु॒द्रुत्या॑-ह॒वनी॑ये जुहुयात् ।

द॒र्.श॑पूर्णमा॒सावे॒व सृ॒ष्ट्वाऽऽर॑भ्य प्र तनु॒ते । 8 (10)

#### T.B.2.2.2.2

ग्र॒हो भ॑वति । द॒र्.श॑पूर्णमा॒सयोः॑ सृ॒ष्टयो॑र्द्ध॒त्यै ॥

सोऽ॒काम॑यत चातुर्मा॒स्यानि॑ सृ॒जे॒येति॑ । स ए॒तं पञ्च॑हो॒तार॑-मपश्यत् ।

तं॑ मन॒साऽनु॒द्रु॒त्या ह॒वनी॑येऽजु॒होत् । ततो॑ वै स चातु॒र्मा॒स्यान्य॑सृजत ।

तान्य॑स्मात्-सृ॒ष्टान्य॑पा॒क्राम॑न् । तानि॑ ग्र॒हेणा॑गृह्णात् ।

तद्ग्र॑हस्य ग्र॒हत्व॑म् । चातु॒र्मा॒स्यान्या॑ल॒भमानः॑ । 9 (10)

### **T.B.2.2.2.3**

पञ्च॑होतारं॒ मन॒साऽनु॒द्रु॒त्या ह॒वनी॑ये जुहुयात् ।

चातु॒र्मा॒स्यान्ये॒व सृ॒ष्ट्वाऽऽर॑भ्य प्र तनुते । ग्र॒हो भ॑वति ।

चातु॒र्मा॒स्यानां॑ सृ॒ष्टानां॑ धृ॒त्यै ॥ सोऽ॑कामयत पशु॒बन्ध॑ सृ॒जेये॑ति ।

स ए॒त ष॑ड्भोतार-मपश्यत् । तं॑ मन॒साऽनु॒द्रु॒त्या ह॒वनी॑येऽजु॒होत् ।

ततो॑ वै स पशु॒बन्ध॑मसृजत । सोऽ॑स्मात् सृ॒ष्टो ऽपा॑क्रामत् ।

तं॑ ग्र॒हेणा॑गृह्णात् । 10 (10)

### **T.B.2.2.2.4**

तद्ग्र॑हस्य ग्र॒हत्व॑म् । पशु॒बन्धे॑न यक्ष्यमाणः ।

ष॑ड्भोतारं॒ मन॒साऽनु॒द्रु॒त्या ह॒वनी॑ये जुहुयात् ।

पशु॒बन्ध॑मे॒व सृ॒ष्ट्वाऽऽर॑भ्य प्र तनुते । ग्र॒हो भ॑वति ।

पशु॒बन्ध॑स्य सृ॒ष्टस्य॑ धृ॒त्यै ॥

सोऽ॑कामयत सौ॒म्य-म॑द्ध्वर सृ॒जेये॑ति ।

स ए॒त॒ꣳ स॒प्त॒हो॒तार॑-म॒पश्य॑त् । तं॒ मन॑साऽनु॒द्रु-त्या॑ह॒वनी॑र्ये ऽजु॒होत् ।  
ततो॒ वै स॒ सौ॒म्य-म॑द्ध्वर-म॒सृज॑त । 11 (10)

**T.B.2.2.2.5**

सोऽस्मा॑त् सृ॒ष्टोऽपा॑क्रामत् । तं॒ ग्रहे॑णागृ॒ह्णात् । तद्ग्र॑हस्य ग्र॒हत्व॑म् ।  
दी॒क्षिष्य॑माणः । स॒प्त॒हो॒तारं॑ मन॑साऽनु॒द्रु-त्या॑ह॒वनी॑र्ये जुहु॒यात् ।  
सौ॒म्यमे॒वाद्ध्वर॑ꣳ सृ॒ष्ट्वाऽऽर॑भ्य प्र त॒नुते॑ । ग्र॒हो भ॑वति ।  
सौ॒म्यस्या॑-द्ध्वर॑स्य सृ॒ष्टस्य॑ धृ॒त्यै ॥ दे॒वेभ्यो॑ वै य॒ज्ञो न॑ प्रा॒भवत् ।  
तमे॒ताव॑च्छः स॒मभ॑रन् । 12 (10)

**T.B.2.2.2.6**

यथ् सं॒भाराः॑ । ततो॒ वै तेभ्यो॑ य॒ज्ञः प्रा॑भवत् ।  
यथ् सं॒भारा॑ भ॒वन्ति॑ । य॒ज्ञस्य॑ प्रभू॒त्यै ॥ आ॒ति॒थ्य-मा॒साद्य॑ व्याच॑ष्टे ।  
य॒ज्ञमु॒खं वा॑ आ॒ति॒थ्यम् । मु॒खत॑ ए॒व य॒ज्ञꣳ सं॑भृत्य प्र त॒नुते॑ ॥  
अय॑ज्ञो वा ए॒षः । योऽप॒त्नीकः॑ । न प्र॒जाः प्र जा॑येरन् ( ) ।  
प॒त्नीर्व्या॑चष्टे । य॒ज्ञमे॒वाकः॑ । प्र॒जानां॑ प्र॒जन॑नाय ॥  
उ॒प॒स॒त्सु॑ व्याच॑ष्टे । ए॒तद्वै प॒त्नीना॑-मा॒यत॑नम् ।  
स्व ए॒वैना॑ आ॒यत॑नेऽव कल्पयति ॥ 13 (16)

(तनु॒त – आ॒लभ॑मानो – ऽगृ॒ह्णा – द॒सृज॑ – ता॒भर॑ –

ज्जा॒येर॒न्थ् षट्च॑) (A2)

2.2.3 अनुवाकं 3 – चतुर्होतृपञ्चहोतृमन्त्रग्रहभागयोः पुरुषार्थ

प्रयोगः

**T.B.2.2.3.1**

प्र॒जाप॑ति-र॒काम॑यत प्र जा॒येये॑ति । स तपो॑ऽतप्यत ।

स त्रि॒वृ॒त॒७ स्तो॑म-म॒सृज॑त । तं पञ्च॑द॒शस्तो॑मो म॒द्ध्य॑त उ॒द॒तृण॑त् ।

तौ पूर्॒वप॑क्षश्चा॒पर॑पक्षश्चा॒भव॑ताम् । पूर्॒वप॑क्षं दे॒वा अ॒न्व॒सृज्य॑न्त ।

अ॒पर॑पक्ष-म॒न्व॒सृ॒राः । ततो॑ दे॒वा अ॒भव॑न् । प॒राऽसृ॑राः ।

यं का॒मये॑त व॒सीया॑न्थ् स्या॒दिति॑ । 14 (10)

**T.B.2.2.3.2**

तं पूर्॒वप॑क्षे या॒जये॑त् । व॒सीया॑ने॒व भ॑वति ।

यं का॒मये॑त पा॒पीया॑न्थ्-स्या॒दिति॑ । तम॑पर॒पक्षे॑ या॒जये॑त् ।

पा॒पीया॑ने॒व भ॑वति । तस्मा॑त् पूर्॒वप॑क्षो ऽप॒रप॑क्षात्-क॒रु॒ण्य॑तरः ॥

प्र॒जाप॑तिर्वै द॒शहो॑ता । चतु॑र्हो॒ता पञ्च॑हो॒ता ।

षड्भू॑ता स॒प्तहो॑ता । ऋ॒तवः॑ स॒म्व॑त्स॒रः । 15 (10)

**T.B.2.2.3.3**

प्र॒जाः प॒शव॑ इ॒मे लो॒काः । य ए॒वं प्र॒जाप॑तिं ब॒होर्भू॑याँ॒सं वे॑द ।  
ब॒होरे॒व भू॑यान् भवति ॥ प्र॒जाप॑तिर्-दे॒वासु॑रान॒सृज॑त ।  
स इन्द्र॑मपि ना॒सृज॑त । तं दे॒वा अब्रु॑वन् । इन्द्रं॑ नो ज॒नये॑ति ।  
सोऽब्र॑वीत् । यथा॒ ऽहं यु॑ष्माँ॒ स्तप॑सा ऽसृ॑क्षि ।  
ए॒वमिन्द्रं॑ ज॒नय॑द्ध्वमि॒ति । 16 (10)

**T.B.2.2.3.4**

ते तपो॑ऽतप्यन्त । त आ॒त्मन्निन्द्र॑-मप॒श्यन् । तम॑ब्रुवन् । जा॒यस्वे॑ति ।  
सोऽब्र॑वीत् । किं भा॒गधे॑य-म॒भिज॑निष्य इति । ऋ॒तून्थ॑ स॒म्वत्स॑रम् ।  
प्र॒जाः प॒शून् । इ॒मान् लो॒का-नि॒त्यब्रु॑वन् ।  
तं वै माऽऽहु॑त्या प्र॒ज॒नय॑तेत्यब्र॑वीत् । 17 (10)

**T.B.2.2.3.5**

तं चतु॑र्.हो॒त्रा प्रा॑ज॒नय॑न् ॥ यः का॒मये॑त वी॒रो म आ जा॑येतेति ।  
स चतु॑र्.हो॒तारं जुहु॑यात् । प्र॒जाप॑तिर्वै चतु॑र्.हो॒ता ।  
प्र॒जाप॑तिरे॒व भू॑त्वा प्र॒जाय॑ते ।  
ज॒ज॒न-दिन्द्र॑-मिन्द्रि॒याय॑ स्वा॒हेति॑ ग्र॒हेण॑ जुहोति ।

आ॒ऽस्य॑ वी॒रो जा॒यते॑ । वी॒र॒ऽहि॑ दे॒वा ए॒तया॑ ऽऽहु॒त्या प्रा॒ज॒नय॑न् ॥

आ॒दि॒त्या-श्चाङ्गि॑रसश्च सु॒वर्गे॑ लो॒के ऽस्प॑र्द्धन्त ।

व॒यं पूर्वे॑ सु॒वर्गं॑ लो॒कमि॑याम व॒यं पूर्वं॑ इति । 18 (10)

#### **T.B.2.2.3.6**

त आ॒दि॒त्या ए॒तं प॒ञ्च॑हो॒तार-म॑पश्यन् ।

तं पु॒रा प्रा॑तरनुवा॒का-दा॒ग्नी॑द्ध्रे ऽजु॒हवुः॑ ।

ततो॒ वै ते पूर्वे॑ सु॒वर्गं॑ लो॒कमा॑यन् । यः सु॒वर्ग॑का॒मः स्या॑त् ।

स प॒ञ्च॑हो॒तारं पु॒रा प्रा॑तरनुवा॒का-दा॒ग्नी॑द्ध्रे जुहु॒यात् ।

स॒म्व॑त्स॒रो वै प॒ञ्च॑हो॒ता । स॒म्व॑त्स॒रः सु॒वर्गो॑ लो॒कः ।

स॒म्व॑त्स॒र ए॒वर्तु॑षु प्र॒तिष्ठा॑य । सु॒वर्गं॑ लो॒कमे॑ति ॥

ते॒ऽब्रु॑वन्-नङ्गि॑रस आ॒दि॒त्यान् । 19 (10)

#### **T.B.2.2.3.7**

क्व स्थ । क्व वः स॒द्भ्यो ह॒व्यं व॑क्ष्याम इति । छ॒न्दः स्वि॑त्य॒ब्रु॑वन् ।

गा॒य॒त्रि॒यां त्रि॒ष्टुभि॑-जग॒त्यामि॑ति ।

तस्मा॒च्छ॒न्दस्सु॑ स॒द्भ्य आ॑दि॒त्येभ्यः॑ ।

आ॒ङ्गी॒रसीः प्र॒जा ह॒व्यं व॑हन्ति ।

व॒हन्त्य॑स्मै प्र॒जा ब॒लिम् । ऐ॒नम॑प्रति॒ख्यातं॑ गच्छति ।

य ए॒वं वै॑द ॥ द्वा॒दश॑ मा॒साः पञ्च॑र्तवः ( ) । त्रय॑ इ॒मे लो॒काः ।

अ॒सावा॑दि॒त्य एक॑वि॒ंशः ।

ए॒तस्मि॑न् वा ए॒ष श्रि॑तः । ए॒तस्मि॑न्-प्रति॒ष्ठितः॑ ।

य ए॒वमे॒तऽश्रि॑तं प्रति॒ष्ठितं॑ वै॑द । प्र॒त्ये॒व ति॑ष्ठति ॥ 20 (16)

(स्या॒दि॒ति - सम्॑व॒त्सरो॑ - ज॒नय॑द्ध्व॒मिती॑ - त्य॒ब्रवी॑त् - पू॒र्व  
इ॒त्या - दि॒त्यान् - ऋ॒तवः॑ षट्च॑) (A3)

#### 2.2.4 अनुवाकं 4 – जगत् सृष्टिकथनमुखेन होतृमन्त्रप्रशंसा

##### T.B.2.2.4.1

प्र॒जाप॑ति-र॒काम॑यत प्र॒जाये॑येति । स ए॒तं द॑श॒होतार॑-मपश्यत् ।

तेन॑ द॒शधा॑ ऽऽत्मानं॑ वि॒धाय॑ । द॒शहो॑त्रा ऽतप्यत ।

तस्य॑ चि॒त्तिः स्रु॑गासीत् । चि॒त्तमा॑ज्यम् । तस्यै॒ताव॑त्ये॒व वा॑गासीत् ।

ए॒तावा॑न्. य॒ज्ञक्र॑तुः ॥ स च॒तुर्.हो॑तार-मसृजत । सोऽन॑न्दत् । 21 (10)

##### T.B.2.2.4.2

असृ॑क्षि वा इ॒ममि॑ति । तस्य॑ सोमो॑ ह॒विरा॑सीत् ।

स च॒तुर्.हो॑त्रा ऽतप्यत । सोऽता॑म्यत् ।

स भूरिति व्याहरत् । स भूमिमसृजत ।

अग्निहोत्रं दर्शपूर्णमासौ यजूंषि । स द्वितीयमतप्यत ।

सोऽताम्यत् । स भुव इति व्याहरत् । 22 (10)

#### **T.B.2.2.4.3**

सोऽन्तरिक्ष-मसृजत । चातुर्मास्यानि सामानि । स तृतीयमतप्यत ।

सोऽताम्यत् । स सुवरिति व्याहरत् । स दिवमसृजत ।

अग्निष्टोम-मुक्थ्य-मतिरात्रमृचः । एता वै व्याहतय इमे लोकाः ।

इमान् खलु वै लोकाननु प्रजाः पशवश्छन्दांसि प्राजायन्त ।

य एवमेताः प्रजापतेः प्रथमा व्याहतीः प्रजाता वेद । 23 (10)

#### **T.B.2.2.4.4**

प्र प्रजया पशुभिर्-मिथुनैर्-जायते ॥ स पञ्चहोतार-मसृजत ।

स हविर्ना-विन्दत । तस्मै सोम-स्तनुवं प्रायच्छत् ।

एतत् ते हविरिति । स पञ्चहोत्रा ऽतप्यत । सोऽताम्यत् ।

स प्रत्यङ्मुखाधत । सोऽसुरा-नसृजत ।

तदस्याप्रियमासीत् । 24 (10)

**T.B.2.2.4.5**

तद्-दुर्वर्णं॑ हिरण्यमभवत् । तद्-दुर्वर्णस्य॑ हिरण्यस्य॑ जन्म॑ ।  
स द्वितीयमतप्यत॑ । सोऽताम्यत् । स प्राङ्बाधत॑ । स देवान्सृजत॑ ।  
तदस्य॑ प्रियमासीत् । तथ् सुवर्णं॑ हिरण्यमभवत् ।  
तथ् सुवर्णस्य॑ हिरण्यस्य॑ जन्म॑ ।  
य एव॑ सुवर्णस्य॑ हिरण्यस्य॑ जन्म॑ वेद । 25 (10)

**T.B.2.2.4.6**

सुवर्णं॑ आत्मना॑ भवति । दुर्वर्णोऽस्य॑ भ्रातृव्यः ।  
तस्मात् सुवर्णं॑ हिरण्यं॑ भार्यम् । सुवर्णं॑ एव॑ भवति ।  
ऐनं॑ प्रियं॑ गच्छति॑ नाप्रियम् ॥ स सप्तहोतार-मसृजत॑ ।  
स सप्तहोत्रैव॑ सुवर्गं॑ लो॒कमे॑ति ॥  
त्रिणवेन॑ स्तोमेनैभ्यो॑ लो॒केभ्योऽसुरान्॑ प्राणुदत ।  
त्रयस्त्रिंशेन॑ प्रत्यतिष्ठत् । एकविंशेन॑ रुचमधत्त । 26 (10)

**T.B.2.2.4.7**

सप्तदशेन॑ प्राजायत । य एवं॑ विद्वान्थ् सोमेन॑ यजते ।  
सप्तहोत्रैव॑ सुवर्गं॑ लो॒कमे॑ति ।

त्रि॒णवे॒न स्तो॒मेनै॒भ्यो लो॒केभ्यो॒ भ्रातृ॒व्यान्-प्र॒णुद॑ते ।  
 त्रय॒स्त्रि॒ंशेन॑ प्र॒ति ति॑ष्ठति । ए॒कवि॒ंशेन॑ रुचं॑ धत्ते ।  
 स॒प्तद॒शेन॑ प्रजा॒यते॑ । तस्मा॑त्-स॒प्तद॒शः स्तो॒मो न नि॒रु॒ह्यः ।  
 प्र॒जाप॑ति॒र्वै स॒प्तद॒शः ।  
 प्र॒जाप॑तिमे॒व म॑द्ध्यतो॒ धत्ते॑ प्र॒जात्यै॑ ( ) ॥ 27 (10)  
 (अ॒नन्द॑द् - भु॒व इति॑ व्या॒हर॑द् - वे॒दा - सी॒द् - वे॒दा - ध॒त्त -  
 प्र॒जात्यै॑) (A4)

### 2.2.5 अनुवाकं 5 – दक्षिणाप्रतिग्रहमन्त्रव्याख्यानम्

#### T.B.2.2.5.1

दे॒वा वै व॑रुण-म॒याज॑यन् । स य॒स्यै य॒स्यै दे॒वता॑यै दक्षि॒णाम॑नयत् ।  
 ता॒म॒व्ली॑नात् । ते॒ऽब्रु॑वन् । व्या॒वृत्य॑ प्र॒ति गृ॑ह्णाम ।  
 त॒था नो॑ दक्षि॒णा न व्ले॑ष्यतीति । ते व्या॒वृत्य॑ प्र॒त्यगृ॑ह्णन् ।  
 ततो॑ वै तां दक्षि॒णा ना॑व्लीनात् ।  
 य ए॒वं वि॒द्वान् व्या॒वृत्य॑ दक्षि॒णां प्र॑तिगृह्णाति ।  
 नैनं॑ दक्षि॒णा व्ली॑नाति ॥ 28 (10)

**T.B.2.2.5.2**

रा॒जा त्वा॑ वरु॒णो न॑यतु दे॒वि दक्षि॑णेऽ॒ग्नये॑ हि॒रण्य॑मि॒त्याह॑ ।  
आ॒ग्ने॒यं वै॑ हि॒रण्य॑म् । स्वयै॒वैन॑द्-दे॒वत॑या॒ प्रति॑ गृह्णाति ।  
सो॒मा॒य वा॒स इ॒त्याह॑ । सौ॒म्यं वै॑ वा॒सः ।  
स्वयै॒वैन॑द्-दे॒वत॑या॒ प्रति॑ गृह्णाति । रु॒द्राय॑ गा॒मि॒त्याह॑ ।  
रौ॒द्री वै॑ गौः । स्वयै॒वैनां॑ दे॒वत॑या॒ प्रति॑ गृह्णाति ।  
वरु॒णा॒याश्च॑मि॒त्याह॑ । 29 (10)

**T.B.2.2.5.3**

वा॒रु॒णो वा॑ अ॒श्वः । स्वयै॒वैनं॑ दे॒वत॑या॒ प्रति॑ गृह्णाति ।  
प्र॒जा॒प॒तये॑ पु॒रुष॑मि॒त्याह॑ । प्रा॒जा॒प॒त्यो वै॑ पु॒रुषः॑ ।  
स्वयै॒वैनं॑ दे॒वत॑या॒ प्रति॑ गृह्णाति । म॒नवे॑ त॒ल्पमि॒त्याह॑ ।  
मा॒न॒वो वै॑ त॒ल्पः । स्वयै॒वैनं॑ दे॒वत॑या॒ प्रति॑ गृह्णाति ।  
उ॒त्ता॒ना॒याङ्गी॑र॒सा॒या॒न इ॒त्याह॑ ।  
इ॒यं वा॑ उ॒त्ता॒न आ॑ङ्गीर॒सः । 30 (10)

**T.B.2.2.5.4**

अ॒नयै॒वैन॒त्-प्र॒ति गृ॑ह्णाति ॥ वै॒श्वान॒र्यर्चा॑ रथं॒ प्र॒ति गृ॑ह्णाति ।  
वै॒श्वान॒रो वै दे॒वत॑या रथः॒ । स्वयै॒वैनं॑ दे॒वत॑या प्र॒ति गृ॑ह्णाति ॥  
तेना॒मृत॑त्वम॒श्या-मि॒त्याह॑ । अ॒मृत॑मे॒वात्म॑न्-धत्ते ॥  
वयो॑ दा॒त्र इ॒त्याह॑ । वय॑ ए॒वैनं॑ कृ॒त्वा । सु॒वर्गं॑ लो॒कं ग॑मयति ॥  
मयो॑ म॒ह्यम॑स्तु प्र॒तिग्र॑ही॒त्र इ॒त्याह॑ । 31 (10)

**T.B.2.2.5.5**

यद्वै शि॒वम् । तन्म॑यः । आ॒त्मन॑ ए॒वैषा॑ प॒री॒तिः ॥  
क इ॒दं क॑स्मा॒ अदा॑दित्याह । प्र॒जाप॑तिर्वै कः । स प्र॒जाप॑तये ददाति ॥  
का॒मः का॒माये॒त्याह॑ । का॒मेन॑ हि ददाति । का॒मेन॑ प्र॒तिगृ॑ह्णाति ॥  
का॒मो दा॒ता का॒मः प्र॒ति ग्र॑ही॒तेत्या॑ह । 32 (10)

**T.B.2.2.5.6**

का॒मो हि दा॒ता । का॒मः प्र॒ति ग्र॑ही॒ता ॥ का॒मꣳ स॒मुद्र॑-मावि॒शेत्या॑ह ।  
स॒मुद्र॑ इ॒व हि का॒मः । ने॒व हि का॒मस्या॑न्तोऽस्ति । न स॒मुद्र॑स्य ॥  
का॒मेन॑ त्वा प्र॒ति गृ॑ह्णामीत्याह । येन॑ का॒मेन॑ प्र॒ति गृ॑ह्णाति ।

स ए॒वैन॑म॒मुष्मिन्॑ लो॒के का॒म आ॒गच्छ॑ति ॥

का॒मैत॑त्त ए॒षा ते॑ का॒म दक्षि॑णे॒त्याह॑ ( ) ।

का॒म ए॒व तद्-य॑ज॒मानो॑ऽमुष्मिन्॑ लो॒के दक्षि॑णामिच्छति ।

न प्र॑तिग्रही॒तरि॑ ॥ य ए॒वं वि॒द्वान्-दक्षि॑णां प्र॑तिगृह्णाति ।

अ॒नृणा॑मे॒वैनां॑ प्र॑ति गृह्णाति ॥ 33 (14)

(व्ली॒नात्य॑ - श्र॒मित्या॑हा - झी॒रसः॑ - प्र॑तिग्रही॒त्र इत्या॑ह -

प्र॑तिग्रही॒तेत्या॑ह - दक्षि॑णे॒त्याह॑ च॒त्वारि॑ च) (A5)

2.2.6 अनुवाकं 6 – द्वादशाहदशमेऽहनि होतुमन्त्राः

**T.B.2.2.6.1**

अ॒न्तो वा ए॒ष य॒ज्ञस्य॑ । यद्-द॑श॒मम॑हः ।

द॒शमे॑ऽह॒न्थ्-स॑र्प॒राज्ञि॑या ऋ॒ग्भिः स्तु॑वन्ति । य॒ज्ञस्यै॒वान्तं॑ ग॒त्वा ।

अ॒न्नाद्य॑मव॒रुन्ध॑ते ॥ ति॒सृभिः॑ स्तु॒वन्ति॑ । त्रय॑ इ॒मे लो॒काः ।

ए॒भ्य ए॒व लो॒केभ्यो॑ऽन्नाद्य॑मव॒रुन्ध॑ते । पृ॒श्नि॒वती॑र्-भव॒न्ति ।

अ॒न्नं वै पृ॒श्नि॑ । 34 (10)

**T.B.2.2.6.2**

अ॒न्नमे॒वाव॑-रु॒न्धते॑ ॥ म॒न॒सा॒ प्र॒स्तौ॑ति । म॒न॒सो॒द्गा॑यति ।  
 म॒न॒सा॒ प्र॒ति॑ ह॒रति॑ । म॒न॒ इ॒व॒ हि॒ प्र॒जा॒प॒तिः॑ ।  
 प्र॒जा॒प॒ते॒राप्त्यै॑ ॥ दे॒वा॒ वै॒ सर्पाः॑ । ते॒षामि॒यꣳ र॒ज्ञी॑ ॥  
 यथ्-स॒र्प॒रा॒ज्ञि॒या ऋ॒ग्भिः॑ स्तु॒वन्ति॑ ।  
 अ॒स्यामे॒व॒ प्र॒ति॑ ति॒ष्ठन्ति॑ ॥ 35 (10)

**T.B.2.2.6.3**

च॒तुर्.हो॒तृन्. हो॒ता॒ व्या॒च॒ष्टे॑ । स्तु॒त॒म॒नु॒शꣳस॒ति॒ शान्त्यै॑ ॥  
 अ॒न्तो॒ वा॒ ए॒ष॒ य॒ज्ञस्य॑ । यद्-द॒श॒म॒म॒हः॑ ।  
 ए॒तत् ख॒लु॒ वै दे॒वानां॑ प॒र॒मं गु॒ह्यं ब्र॒ह्म॑ । यच्च॒तुर्.हो॒तारः॑ ।  
 द॒श॒मेऽहꣳ-श्च॒तुर्.हो॒तृन् व्या॒च॒ष्टे॑ । य॒ज्ञस्यै॒वान्तं॑ ग॒त्वा ।  
 प॒र॒मं दे॒वानां॑ गु॒ह्यं ब्र॒ह्माव॑रुन्धे ।  
 तदे॒व प्र॒का॒शं ग॒म॒यति॑ । 36 (10)

**T.B.2.2.6.4**

तदे॒नं प्र॒का॒शं ग॒तम् । प्र॒का॒शं प्र॒जानां॑ ग॒म॒यति॑ ॥ वाचं॑ यच्छति ।  
 य॒ज्ञस्य॑ धृ॒त्यै ॥ य॒ज॒मा॒न॒दे॒व॒त्यं वा॑ अ॒हः॑ । भ्रा॒तृ॒व्य॒दे॒व॒त्या रा॒त्रिः॑ ।

अ॒ह्ना रा॒त्रिं ध्या॑येत् । भ्रा॒तृ॒व्यस्यै॒व तल्लो॒कं वृ॑ङ्क्ते ।  
यद्दि॒वा वाचं॑ वि॒सृ॒जेत् । अ॒हर्भा॒तृ॒व्यायो॒च्छि॑षेत् ( ) ।  
यन्न॒क्तं वि॒सृ॒जेत् । रा॒त्रिं भ्रा॒तृ॒व्यायो॒च्छि॑षेत् ।  
अ॒धि॒वृ॒क्षसू॒र्ये वाचं॑ वि॒सृ॒जति॑ । ए॒ता॒वन्त॑मे॒वास्मै॑ लो॒कमु॒च्छि॑षति ।  
याव॑दादि॒त्योऽस्त॑मेति ॥ 37 (15)

(पृ॒श्नि - ति॒ष्ठन्ति - ग॒मय॑ति - शि॒षेत् प॒ञ्च च) (A6)

### 2.2.7 अनुवाकं 7 – सप्तहोतृमन्त्रसाध्ययज्ञप्रशंसा

#### T.B.2.2.7.1

प्र॒जाप॑तिः प्र॒जा अ॑सृजत । ताः सृ॒ष्टाः स॑म॒श्लिष्य॑न् ।  
ता रू॒पेणा॒नु प्रा॑विशत् । तस्मा॑दाहुः । रू॒पं वै प्र॒जाप॑तिरिति ।  
ता ना॒म्नाऽनु॑ प्रा॑विशत् । तस्मा॑दाहुः । ना॒म वै प्र॒जाप॑तिरिति ।  
तस्मा॑द॒प्याऽमि॒त्रौ स॒ङ्गत्य॑ । ना॒म्ना चे॒द्ध्वये॑ते । 38 (10)

#### T.B.2.2.7.2

मि॒त्रमे॒व भ॑वतः ॥ प्र॒जाप॑तिर् दे॒वासु॒रान॑सृजत ।  
स इ॒न्द्रम॒पि ना॑सृजत । तं दे॒वा अब्रु॑वन् । इ॒न्द्रं नो॑ ज॒नये॑ति ।  
स आ॒त्म-न्नि॒न्द्र-म॑पश्यत् । तम॑सृजत ।

तं त्रि॒ष्टुग्-वी॒र्यं॑ भू॒त्वाऽनु॑ प्रा॒विशत् ।

तस्य॑ वज्रः॑ पञ्चद॒शो ह॒स्त आ॒पद्यत ।

तेनो॒दय्या॑सुरा॒नभ्य॑ भवत् ॥ 39 (10)

#### **T.B.2.2.7.3**

य ए॒वं वै॒द । अ॒भि भ्रा॑तृ॒व्यान् भ॑वति ॥ ते दे॒वा अ॑सुरैर्-वि॒जित्य॑ ।

सु॒वर्गं लो॒कमा॑यन् । तेऽमु॒ष्मिन् लो॒के व्य॑क्षुद्ध्यन् ।

तेऽब्रु॑वन् । अ॒मुतः॑ प्र॒दानं॑ वा॒ उप॑जिजीवि॒मेति॑ ।

ते स॒प्तहो॑तारं॒ यज्ञं॑ वि॒धाया॒यास्य॑म् । आ॒ङ्गीर॒सं प्रा॑हिण्वन् ।

ए॒तेना॒मुत्र॑ क॒ल्पये॑ति । 40 (10)

#### **T.B.2.2.7.4**

तस्य॑ वा इ॒यं क्लृ॑प्तिः । य॒दिदं॑ किं॒ च । य ए॒वं वै॒द ।

क॒ल्पते॑ऽस्मै । स वा अ॒यं म॑नु॒ष्येषु॑ य॒ज्ञः स॒प्तहो॑ता ।

अ॒मुत्र॑ स॒द्भ्यो दे॒वेभ्यो॑ ह॒व्यं व॑हति । य ए॒वं वै॒द ।

उ॒पैनं॑ य॒ज्ञो न॑मति ॥ सोऽम॑न्यत ।

अ॒भि वा इ॒मेऽस्मा॑-ल्लो॒काद॒मुल्लो॑कं क॒मिष्य॑न्त इति॑ ( ) ।

स वा॒चस्प॑ते ह॒दिति॑ व्या॒हरत् । तस्मा॑त् पु॒त्रो हृ॒दय॑म् ।

तस्मा॑दस्मा॑-ल्लो॒काद॒मुं लो॒कं ना॒भिका॑मयन्ते ।

पु॒त्रो हि हृ॒दय॑म् ॥ 41 (14)

(ह॒र्य॑ते – अ॒भवत् – क॒ल्प॑ये – ती॒ति च॒त्वारि॑ च) (A7)

2.2.8 अनुवाकं 8 – होतृमन्त्राणां सोमयागाङ्गत्वम्

**T.B.2.2.8.1**

दे॒वा वै च॒तुर्.हो॒तृभिर्-य॒ज्ञम॑तन्वत । ते वि पा॒प्मना॒ भ्रातृ॑व्ये॒णाज॑यन्त ।

अ॒भि सु॒वर्गं लो॒कम॑जयन् ।

य ए॒वं वि॒द्वा-श्च॒तुर्.हो॒तृभि॒र्यज्ञं॑ तनुते ।

वि पा॒प्मना॒ भ्रातृ॑व्येण जयते । अ॒भि सु॒वर्गं लो॒कं ज॑यति ॥

षड्ढो॑त्रा प्राय॒णीय॑-मासादयति । अ॒मुष्मै॒ वै लो॒काय॑ षड्ढो॑ता ।

घ्नन्ति॑ खलु॒ वा ए॒तथ् सोम॑म् । यद॒भिषु॑ण्वन्ति । 42 (10)

**T.B.2.2.8.2**

ऋ॒जुधै॑वैनम॒मुं लो॒कं ग॑मयति । च॒तुर्.हो॒त्रा ऽऽति॑त्थ्यम् ।

यशो॑ वै च॒तुर्.हो॒ता । यश॑ ए॒वात्म॑न्-धत्ते ।

पञ्च॑होत्रा प॒शुमु॑प सादयति । सु॒वर्ग्यो॑ वै पञ्च॑होता ।

यज॑मानः प॒शुः । यज॑मानमे॒व सु॒वर्गं लो॒कं ग॑मयति ।

॥  
ग्र॒हान्-गृ॒ही॒त्वा स॒प्त॒हो॒तारं जु॒होति॑ ।

इ॒न्द्रि॒यं वै स॒प्त॒हो॒ता । 43 (10)

**T.B.2.2.8.3**

इ॒न्द्रि॒यमे॒वात्मन्-ध॑त्ते ॥ यो वै चतु॑र्.हो॒तृ-ननु॑स॒वनं त॑र्पयति ।

तृ॒प्यति॑ प्र॒जया॑ प॒शुभिः॑ । उपै॑नꣳ सोम॒पीथो॑ नमति ।

ब॒हि॒ष्प॒व॒मा॒ने द॑श॒हो॒तारं॑ व्याचक्षीत ।

मा॒द्ध्य॒न्दि॒ने प॑व॒मा॒ने चतु॑र्.हो॒तारम् । आ॒र्भ॒वे प॑व॒मा॒ने पञ्च॑हो॒तारम् ।

पि॒तृ॒य॒ज्ञे ष॑ड्.हो॒तारम् । य॒ज्ञाय॒ज्ञि॒यस्य॑ स्तो॒त्रे स॒प्त॒हो॒तारम् ।

अ॒नु॒स॒वन-मे॒वैनाꣳ स्त॑र्पयति । 44 (10)

**T.B.2.2.8.4**

तृ॒प्यति॑ प्र॒जया॑ प॒शुभिः॑ । उपै॑नꣳ सोम॒पीथो॑ नमति ॥

दे॒वा वै चतु॑र्.हो॒तृभिः॑ स॒न्नमा॑सत । ऋ॒द्धि॒परि॑मितं॒ यश॑स्क्रामाः ।

॥ तेऽब्रु॑वन् । यन्नः॑ प्रथ॒मं य॑श ऋ॒च्छात् । सर्वे॑षां नस्तथ्-स॒हास॑दिति ।

सोमश्चतु॑र्.हो॒त्रा । अ॒ग्निः पञ्च॑हो॒त्रा । धा॒ता ष॑ड्.हो॒त्रा । 45 (10)

**T.B.2.2.8.5**

इन्द्रः सप्तहोत्रा । प्रजापतिर्-दशहोत्रा ।  
तेषां सोमं राजानं यश आच्छत् ॥ तन् न्यकामयत ।  
तेनापाक्रामत् । तेन प्रलायमचरत् ।  
तं देवाः प्रैषैः प्रैषमैच्छन् । तत्-प्रैषाणां प्रैषत्वम् ।  
निविद्भिर्न्यवेदयन् । तन्निविदां निवित्त्वम् । 46 (10)

**T.B.2.2.8.6**

आप्रीभि-राप्नुवन् । तदाप्रीणा-माप्रित्वम् । तमघ्नन् ।  
तस्य यशो व्यगृह्णत । ते ग्रहा अभवन् । तद्ग्रहाणां ग्रहत्वम् ।  
यस्यैवं विदुषो ग्रहा गृह्यन्ते ॥ तस्य त्वेव गृहीताः ॥ तेऽब्रुवन् ।  
यो वै नः श्रेष्ठोऽभूत् ॥ 47 (10)

**T.B.2.2.8.7**

तमवधिष्म । पुनरिमं सुवामहा इति । तं छन्दोभि-रसुवन्त ।  
तच्छन्दसां छन्दस्त्वम् । साम्ना समानयन् । तथ् साम्नः सामत्वम् ।  
उक्थै-रुदस्थापयन् । तदुक्थाना-मुक्थत्वम् । य एवं वेद ।  
प्रत्येव तिष्ठति । 48 (10)

**T.B.2.2.8.8**

सर्व॑मायुरेति ॥ सोमो॑ वै यशः॑ । य एवं॑ वि॒द्वान्थ्-सोम॑मागच्छति ।  
यश॑ ए॒वैनमृ॑च्छति । तस्मा॑दाहुः । यश्चै॒वं वे॒द यश्च॑ न ।  
तावु॒भौ सोम॑-मागच्छतः । सोमो॑ हि यशः॑ ।  
तं त्वा॑ व यश॑ ऋच्छतीत्याहुः । यः सोमे॑ सोमं॑ प्राहेति ( ) ।  
तस्मा॒थ्-सोमे॑ सोमः॑ प्रोच्यः । यश॑ ए॒वैनमृ॑च्छति ॥ 49 (12)  
(अ॒भि॒षु॒ण्वन्ति॑ - स॒प्त॒हो॒ता - त॒र्पय॑ति - षड्ढो॑त्रा - नि॒वित्त्व॑ -  
म॒भूत् - ति॒ष्ठति॑ - प्रा॒हेति॑ द्वे च) (A8)

2.2.9 अनुवाकं 9 – होतृमन्त्रोत्पत्तिकथनप्रसङ्गेन जगत् सृष्टिः

**T.B.2.2.9.1**

इ॒दं वा॑ अ॒ग्रे नै॒व किञ्च॑नासीत् । न द्यौ॑रासीत् । न पृ॒थि॒वी ।  
ना॒न्तरि॑क्षम् । तद॑सदे॒व स॒न्मनो॑ ऽकुरु॒त स्या॑मिति । तद॑तप्यत ।  
तस्मा॑त्-ते॒पा॒नाद्भू॑मोऽजायत । तद्-भू॒योऽत॑प्यत ।  
तस्मा॑त्-ते॒पा॒नाद॒ग्नि-र॑जायत । तद्-भू॒योऽत॑प्यत । 50 (10)

**T.B.2.2.9.2**

तस्मा॑त्-ते॒पा॒नाज्ज्यो॑ति-रजायत । तद्-भू॒योऽत॑प्यत ।  
तस्मा॑त्-ते॒पा॒ना-दर्चि॑-रजायत । तद्-भू॒योऽत॑प्यत ।

तस्मात्-तेपानान् मरीचयोऽजायन्त । तद्-भूयोऽतप्यत ।

तस्मात्-तेपाना-दुदारा अजायन्त । तद्-भूयोऽतप्यत ।

तदभ्रमिव समहन्यत ॥ तद्-वस्ति-मभिनत् । 51 (10)

**T.B.2.2.9.3**

स समुद्रोऽभवत् । तस्मात्-समुद्रस्य न पिबन्ति ।

प्रजननमिव हि मन्यन्ते ।

तस्मात् पशोर्-जायमानादापः पुरस्ताद्-यन्ति ॥

तद्-दशहोताऽन्वसृज्यत । प्रजापतिर्वै दशहोता ॥

य एवं तपसो वीर्यं विद्वाञ्स्तप्यते । भवत्येव ॥

तद्वा इदमापः सलिल-मासीत् । सोऽरोदीत्-प्रजापतिः । 52 (10)

**T.B.2.2.9.4**

स कस्मा अग्नि । यद्-यस्या अप्रतिष्ठाया इति । यदप्स्व-वापद्यत ।

सा पृथिव्यभवत् । यद्व्यमृष्ट । तदन्तरिक्ष-मभवत् ।

यदूर्ध्व-मुदमृष्ट । सा द्यौरभवत् । यदरोदीत् ।

तदनयो रोदस्त्वम् । 53 (10)

**T.B.2.2.9.5**

य ए॒वं वे॑द । ना॒स्य॑ गृ॒हे रु॑दन्ति । ए॒तद्वा ए॒षां लो॒कानां॑ जन्म ।

य ए॒वमे॒षां लो॒कानां॑ जन्म वे॑द । नैषु॑ लो॒के-ष्वार्ति॑माच्छति ।

स इ॒मां प्र॑तिष्ठा-मविन्दत ॥

स इ॒मां प्र॑तिष्ठां वि॒त्त्वा ऽका॑मयत प्रजायेयेति ।

स तपो॑ऽतप्यत । सोऽन्त॑र्वा-नभवत् ।

स ज॒घना॑-दसुरा-नसृजत । 54 (10)

**T.B.2.2.9.6**

तेभ्यो॑ मृ॒न्मये॑ पात्रेऽन्नमदुहत् । याऽस्य॑ सा तनू॒रासी॑त् । तामपा॑हत ।

सा तमि॑स्राऽभवत् ॥ सोऽका॑मयत प्रजायेयेति । स तपो॑ऽतप्यत ।

सोऽन्त॑र्वा-नभवत् । स प्र॒जन॑नादेव प्रजा असृजत ।

तस्मा॑दि॒मा भू॑यिष्ठाः । प्र॒जन॑नाद्ध्ये॒ना असृ॑जत । 55 (10)

**T.B.2.2.9.7**

ताभ्यो॑ दा॒रुमये॑ पात्रे पयोऽदुहत् । याऽस्य॑ सा तनू॒रासी॑त् ।

तामपा॑हत । सा जो॒ध्स्ना ऽ॑भवत् ॥ सोऽका॑मयत प्रजायेयेति ।

स॒तपो॑ऽतप्य॒त । सो॑ऽन्त॒र्वा॑-न॒भवत् । स॒ उप॑प॒क्षाभ्या॑-मे॒वर्तू॑न॒सृज॑त ।  
तेभ्यो॑ रज॒ते पा॒त्रे घृ॒तम॑दुहत् । याऽस्य॒ सा त॒नूरा॑सीत् ॥ 56 (10)

**T.B.2.2.9.8**

ताम॑पा॒हत । सो॑ऽहो॒रात्र्योः॑ स॒न्धि-र॑भवत् ॥ सो॑ऽक्का॒मय॑त प्र॒जाये॑येति ।  
स तपो॑ऽतप्य॒त । सो॑ऽन्त॒र्वा॑-न॒भवत् । स॒ मुखा॑द्-दे॒वा-न॒सृज॑त ।  
तेभ्यो॑ ह॒रिते॑ पा॒त्रे सो॑म॒मदु॑हत् । याऽस्य॒ सा त॒नूरा॑सीत् ।  
ताम॑पा॒हत । तद॑हर॒भवत् ॥ 57 (10)

**T.B.2.2.9.9**

ए॒ते वै प्र॒जाप॑ते॒र्दोहाः॑ । य॒ एवं॑ वे॒द । दु॒ह ए॒व प्र॒जाः ॥  
दि॒वा वै नो॑ऽभू॒दिति॑ । तद्-दे॒वानां॑ दे॒वत्व॑म् ।  
य॒ एवं॑ दे॒वानां॑ दे॒वत्वं॑ वे॒द । दे॒वाने॒व भ॑वति ॥  
ए॒तद्वा अ॑हो॒रात्राणां॑ जन्म ।  
य॒ ए॒वम॑हो॒रात्राणां॑ जन्म वे॒द । नाहो॑रा॒त्रेष्वार्ति॑मा॒र्च्छति॑ ॥ 58 (10)

**T.B.2.2.9.10**

अ॒सतो॑ऽधि॒ मनो॑ऽसृज्य॒त । मनः॑ प्र॒जाप॑ति-म॒सृज॑त ।  
प्र॒जाप॑तिः प्र॒जा अ॑सृज॒त । तद्वा॒ इदं॑ मन॒स्ये॒व प॑र॒मं प्र॑ति॒ष्ठित॑म् ।

यदि॒दं किञ्च॑ । तदे॒तच्छ॑वो॒वस्य॑सं॒ नाम॑ ब्र॒ह्म ॥

व्यु॒च्छन्ती॑ व्यु॒च्छन्त्य॑स्मै॒ वस्य॑सी॒ वस्य॑सी॒ व्यु॒च्छति॑ ।

प्रजा॑यते प्र॒जया॑ प॒शुभिः॑ ।

प्र॒ पर॑मे॒ष्ठिनो॑ मा॒त्रा-मा॒प्नोति॑ । य ए॒वं वे॒द ( ) ॥ 59 (10)

(अ॒ग्निर॑जाय॒त तद्भू॑यो॒ऽतप्य॑ता - भि॒नद॑ - रो॒दीत् प्र॒जाप॑ती -

रो॒दस्त्व॑ - म॒सृज॑ - ता॒सृज॑त - घृ॒तम॑दु॒हद्या॑ऽस्य

सा त॒नूरा॑सी - द॒हर॑भवद् - ऋ॒च्छति॑ - वे॒द) (A9)

### Special Korvai

(इ॒दं धू॒मो॑ ऽग्नि॒र् ज्योति॑ र॒र्चिर् म॑रीच॒य उ॒दारा॑ स्तद॒भ्र॑ /

स ज॒घना॑त् सा तमि॒स्रा स प्र॒जन॑नात् सा जो॒थ्स्ना स

उप॒पक्षा॑भ्या॒ सो ऽहो॑रा॒त्रयोः॑ स॒न्धिः स॒मुखा॑त् तद॒हर् दे॒वान् /

मृ॒न्मये॑ दा॒रुम॑ये रज॒ते हरि॑ते तेभ्य॒स्ताभ्यो॑ द्वे तेभ्यो॒ऽन्नं प॑यो

घृ॒त॑ सोम॑म्)

2.2.10 अनुवाकं 10 – देवसृष्टिमध्येऽवस्थितस्येन्द्रस्य

देवताधिपतित्वम्

T.B.2.2.10.1

प्र॒जाप॑ति-रिन्द्र॑मसृ॒ज-तानु॑जावरं दे॒वाना॑म् । तं प्रा॑हि॒णोत् ।  
परे॑हि । ए॒तेषां॑ दे॒वाना॑-मधि॑पतिरे॒धीति॑ । तं दे॒वा अब्रु॑वन् ।  
कस्त्व॑मसि । व॒यं वै त्वच्छ्रे॑याऽसः स्म॒ इति॑ । सोऽब्र॑वीत् ।  
कस्त्व॑मसि व॒यं वै त्वच्छ्रे॑याऽसः स्म॒ इति॑ मा दे॒वा अवोच॑न्निति ॥  
अथ॒ वा इ॒दं तर्हि॑ प्र॒जाप॑तौ हर॒ आसीत् । 60 (10)

T.B.2.2.10.2

यद॑स्मिन्नादित्ये । तदे॑नमब्रवीत् । ए॒तन्मे॑ प्रयच्छ ।  
अथा॒हमे॒तेषां॑ दे॒वाना॑-मधि॑पतिर्-भवि॒ष्यामीति॑ ।  
कोऽह॑-स्या॒मित्यब्र॑वीत् । ए॒तत् प्र॒दायेति॑ । ए॒तथ्-स्या॒ इत्यब्र॑वीत् ।  
यदे॒तद् ब्रवी॑षीति । को ह॒ वै नाम॑ प्र॒जाप॑तिः । य ए॒वं वैद॑ । 61 (10)

T.B.2.2.10.3

विदु॑रेनं नाम्ना । तद॑स्मै रु॒क्मं कृ॒त्वा प्रत्य॑मुञ्चत् ।  
ततो॒ वा इन्द्रो॑ दे॒वाना॑-मधि॑पति-रभवत् । य ए॒वं वैद॑ ।

अधि॑पति॒रेव॑ स॒मा॒ना॒नां॑ भवति ॥ सोऽम॑न्यत ।

किं॑ किं॑ वा॑ अ॒कर॑मिति । स च॒न्द्रं॑ म॒ आ॒हरे॑ति प्रा॒लप॑त् ।

तच्च॑न्द्रम॒स-श्च॑न्द्रम॒स्त्वम् । य ए॒वं वे॑द । 62 (10)

#### **T.B.2.2.10.4**

च॒न्द्रवा॑ने॒व भ॑वति ॥ तं दे॒वा अ॑ब्रुवन् ।

सु॒वी॒र्यो॑ ऽम॒र्या य॑था गोपा॒यत॑ इति । तथ् सूर्य॑स्य सूर्य॒त्वम् ।

य ए॒वं वे॑द । नैनं॑ द॒भ्नो॑ति ॥

कश्च॑ नास्मि॒न्वा इ॒दमि॑न्द्रि॒यं प्र॑त्य॒स्थादि॑ति । तदि॒न्द्र-स्ये॑न्द्र॒त्वम् ।

य ए॒वं वे॑द । इ॒न्द्रि॒याव्ये॑व भवति ॥ 63 (10)

#### **T.B.2.2.10.5**

अ॒यं वा॑ इ॒दं प॒रमो॑ऽभू॒दिति॑ । तत्-प॒रमे॑ष्ठि॒नः प॒रमे॑ष्ठि॒त्वम् ।

य ए॒वं वे॑द । प॒रमा॑मे॒व का॑ष्ठां गच्छति ॥ तं दे॒वाः स॒मन्तं॑ प॒र्यवि॑शन् ।

व॒सवः॑ पु॒रस्ता॑त् । रु॒द्रा दक्षि॑णतः । आ॒दि॒त्याः प॒श्चात् ।

वि॒श्वे दे॒वा उत्त॑रतः । अ॒ङ्गिर॑सः प्र॒त्यञ्च॑म् । 64 (10)

**T.B.2.2.10.6**

सा॒द्ध्याः॑ प॒राञ्च॑म् । य ए॒वं वे॑द । उ॒पै॒नꣳ स॒मा॒नाः॑ सं वि॑शन्ति ॥  
स प्र॒जाप॑तिरे॒व भू॒त्वा प्र॒जा आ॑वयत् । ता अ॒स्मै ना॑तिष्ठन्ता॒न्नाद्या॑य ।  
ता मु॒खं पु॒रस्ता॑त्-पश्यन्तीः । दक्षि॒णतः॑ पर्या॑यन् ।  
स दक्षि॒णतः॑ पर्य॑वर्तयत । ता मु॒खं पु॒रस्ता॑त्-पश्यन्तीः ।  
मु॒खं दक्षि॑णतः । 65 (10)

**T.B.2.2.10.7**

पश्चा॑त्-पर्या॑यन् । स पश्चा॑त्-पर्य॑वर्तयत ।  
ता मु॒खं पु॒रस्ता॑त्-पश्यन्तीः । मु॒खं दक्षि॑णतः ।  
मु॒खं पश्चा॑त् । उत्त॑रतः पर्या॑यन् ।  
स उत्त॑रतः पर्य॑वर्तयत ।  
ता मु॒खं पु॒रस्ता॑त्-पश्यन्तीः ।  
मु॒खं दक्षि॑णतः । मु॒खं पश्चा॑त् ( ) । 66 (10)

**T.B.2.2.10.8**

मु॒खमु॑त्त॑रतः । ऊ॒र्ध्वा उ॒दाय॑न् । स उ॒परि॑ष्ठान् न्य॑वर्तयत ।  
ताः स॒र्वतो॑मु॒खो भू॒त्वा ऽऽव॑यत् ।

ततो॑ वै तस्मै॑ प्र॒जा अति॑ष्ठन्तान्नाद्याय ॥

य ए॒वं वि॒द्वान् परि॑ च वर्त॑यते नि च ।

प्र॒जापति॑रेव भू॒त्वा प्र॒जा अ॑त्ति ।

तिष्ठ॑न्तेऽस्मै प्र॒जा अ॒न्नाद्याय॑ । अ॒न्नाद॑ ए॒व भ॑वति ॥ 67 (9)

(आ॒सीद् – वेद॑ – चन्द्र॑मस्त्वं य॑ ए॒वं वेद॑ – द्रि॒याव्ये॑व भ॑वति –  
प्र॒त्यञ्चं॑ – मुखं॑ दक्षि॒णतो॑ – मुखं॑ पश्चा॒न् – +नव॑ च) (A10)

2.2.11 अनुवाकं 11 – होतृमन्त्राणां पुरुषार्थप्रयोगः

**T.B.2.2.11.1**

प्र॒जापति॑-र॒काम॑यत ब॒होर्भू॑यान्थ्-स्यामि॑ति ।

स ए॒तं द॑श॒होतार॑-मपश्यत् । तं प्रा॒युङ्क्त॑ ।

तस्य॑ प्र॒युक्ति॑ ब॒होर्भू॑यानभवत् । यः का॒मये॑त ब॒होर्भू॑यान्थ्-स्यामि॑ति ।

स द॑श॒होतारं॑ प्र॒युञ्जी॑त ।

ब॒होरे॒व भू॑यान्-भ॑वति ॥ सोऽका॑मयत वी॒रो म॒ आजा॑येतेति ।

स द॑श॒होतु॑-श्चतु॑र्.होतारं॑ निरमिमीत । तं प्रा॒युङ्क्त॑ । 68 (10)

**T.B.2.2.11.2**

तस्य॑ प्रयु॒क्तीन्द्रो॑ ऽजायत । यः का॒मये॑त वी॒रो म॒ आजा॑येतेति ।  
स चतु॑र्.होतारं॒ प्रयु॑ञ्जीत । आऽस्य॑ वी॒रो जा॑यते ॥  
सोऽका॑मयत पशु॒मान्थ्-स्या॑मिति ।  
स चतु॑र्.होतुः पञ्च॑होतारं॒ निर॑मिमीत ।  
तं प्रायु॑ङ्क्त । तस्य॑ प्रयु॒क्ति पशु॑मान॒भवत् ।  
यः का॒मये॑त पशु॒मान्थ्-स्या॑मिति ।  
स पञ्च॑होतारं॒ प्रयु॑ञ्जीत । 69 (10)

**T.B.2.2.11.3**

पशु॒माने॒व भव॑ति ॥  
सोऽका॑मयतर्तवो॑ मे कल्पे॒रन्निति॑ ।  
स पञ्च॑होतुः षड्धो॑तारं॒ निर॑मिमीत । तं प्रायु॑ङ्क्त ।  
तस्य॑ प्रयु॒क्त्यृतवो॑ऽस्मा अकल्पन्त ।  
यः का॒मये॑तर्तवो॑ मे कल्पे॒रन्निति॑ । स षड्धो॑तारं॒ प्रयु॑ञ्जीत ।  
कल्प॑न्तेऽस्मा ऋ॒तवः॑ ॥ सोऽका॑मयत सोम॒पः सोम॑याजी स्यां॑ ॥  
आ मे॑ सोम॒पः सोम॑याजी जा॑येतेति । 70 (10)

**T.B.2.2.11.4**

स षड्ढो॑तुः स॒प्तहो॑तारं॒ निर॑मिमीत । तं प्रायु॑ङ्क्त ।  
 तस्य॑ प्रयु॑क्ति सोम॒पः सोम॑याज्य॒भवत् ।  
 आऽस्य॑ सोम॒पः सोम॑याज्यजायत ।  
 यः का॒मये॑त सोम॒पः सोम॑याजी स्या॑म् ।  
 आ मे॑ सोम॒पः सोम॑याजी जा॒येते॑ति । स स॒प्तहो॑तारं प्रयु॑ञ्जीत ।  
 सोम॒प ए॒व सोम॑याजी भवति । आऽस्य॑ सोम॒पः सोम॑याजी जा॒यते ॥  
 स वा ए॒ष प॒शुः पञ्च॑धा प्रति तिष्ठति । 71 (10)

**T.B.2.2.11.5**

प॒द्भिर्मुखे॑न ॥ ते दे॒वाः प॒शून् वि॒त्त्वा । सु॒वर्गं लो॒कमा॑यन् ॥  
 तेऽमु॑ष्मिन् लो॒के व्य॑क्षुद्ध्यन् । तेऽब्रु॑वन् ।  
 अ॒मुतः॑ प्र॒दानं वा॑ उप॒जिजी॑विमेति ।  
 ते स॒प्तहो॑तारं य॒ज्ञं वि॒धाया॑यास्यं । आ॒ङ्गीर॑सं प्राहि॑ण्वन् ।  
 ए॒तेना॒मुत्र॑ कल्प॒येति॑ । तस्य॑ वा इ॒यं क्लृ॑प्तिः । 72 (10)

**T.B.2.2.11.6**

यदि॑दं कि॒ञ्च॑ । य ए॒वं वै॑द । कल्प॑तेऽस्मै ।  
स वा अ॒यं म॑नु॒ष्येषु॑ य॒ज्ञः स॒प्तहो॑ता ।  
अ॒मुत्र॑ स॒द्भ्यो दे॒वेभ्यो॑ ह॒व्यं वै॑हति ।  
य ए॒वं वै॑द । उपै॑नं य॒ज्ञो न॑मति ॥ यो वै चतु॑र्होत॒ृणां नि॒दानं॑ वै॒द ।  
नि॒दान॑वान् भवति । अ॒ग्निहो॑त्रं वै द॒शहो॑तुर्नि॒दानम्॑ ( ) ।  
दर्॒शपूर्ण॑मा॒सौ चतु॑र्होतुः । चा॒तुर्मा॒स्यानि॑ पञ्च॒होतुः॑ ।  
प॒शुब॑न्धः षड्द्वो॒तुः । सौ॒म्योऽध्व॑रः स॒प्तहो॑तुः ।  
ए॒तद्वै चतु॑र्होत॒ृणां नि॒दानम्॑ । य ए॒वं वै॑द ।  
नि॒दान॑वान् भवति ॥ 73 (17)

(अ॒मिमी॒त तं प्रा॑युङ्क्त – पञ्च॑हो॒तारं॑ प्र॒युञ्जी॑त – जा॒येते॑ति –  
तिष्ठ॑ति – क्लृ॒प्तिर् – द॒शहो॑तुर् नि॒दानं॑ स॒प्त च॑ ) (A11)

=====

**Prapaataka Korvai with starting Words of 1 to 11 Anuvaakams :-**

(प्र॒जाप॑तिर॒काम॑यत प्र॒जाः सृ॒जे॒येति॑ – प्र॒जाप॑तिर॒काम॑यत  
 द॒र्श॒पूर्ण॑मा॒सौ सृ॒जे॒येति॑ – प्र॒जाप॑तिर॒काम॑यत प्र॒जाये॑येति  
 स तपः॑ स त्रि॒वृ॒तं – प्र॒जाप॑तिर॒काम॑यत द॒श॒हो॒तारं॑ तेन  
 द॒श॒धाऽऽत्मा॑नं – दे॒वा वै व॑रुण – म॒न्तो वै – प्र॒जाप॑ति॒स्ताः सृ॒ष्टाः  
 स॒म॒श्लि॒ष्यन् – दे॒वा वै च॑तु॒र्हो॒तृभि॑ – रि॒दं वा॑ अ॒ग्रे –  
 प्र॒जाप॑ति॒रिन्द्रं॑ – प्र॒जाप॑तिर॒काम॑यत ब॒हो॒र्भू॒या॒नेका॑दश)

**Korvai with starting Words of 1, 11, 21 Series of dasinis :-**

(प्र॒जाप॑ति – स्त॒द्ग्र॒हस्य॑ – प्र॒जाप॑तिर॒काम॑यता – न॒यै॒वैन॑त् – तस्य॑  
 वा इ॒यं क्लृ॑प्ति – स्तस्मा॑त् तेपा॒नाज्ज्यो॑तिर् – यद॒स्मिन्ना॑दि॒त्ये –  
 स षड्॑हो॒तुः स॒प्त॒हो॒तारं॑ त्रि॒स॒प्त॒तिः)

**First and Last Word - 2<sup>nd</sup> Ashtakam , 2nd Prapaatakam :-**

(प्र॒जाप॑तिर॒काम॑यत – नि॒दान॑वान्भवति)

॥ हरिः॑ ओं ॥

॥ कृष्ण यजुर्वेदीय तैत्तिरीय ब्राह्मणे द्वितीयाष्टके द्वितीयः प्रपाठकः  
 समाप्तः ॥

**2.2Details of Dasini & Vaakyams for**  
**Ashtakam 2 , Prapaatakam 2 (TB 2.2)**

	Dasini	Vaakyams
Anuvakam 1	7	75
Anuvakam 2	6	66
Anuvakam 3	7	76
Anuvakam 4	7	70
Anuvakam 5	6	64
Anuvakam 6	4	45
Anuvakam 7	4	44
Anuvakam 8	8	82
Anuvakam 9	10	100
Anuvakam 10	8	79
Anuvakam 11	6	67
Total →	73	768

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

**2.3 द्वितीयाष्टके तृतीयः प्रपाठकः – होतृब्राह्मणशेषः**

**2.3.1 अनुवाकं 1 – सर्वेषां होतृमन्त्राणां चतुर्होतृशब्देन व्यवहार**

**T.B.2.3.1.1**

ब्रह्मवादिनो॑ वदन्ति । किं॑ चतुर्॑.होतृ॑णां चतुर्॑.होतृ॑त्वमिति॑ ।

यदे॒वैषु॑ चतु॒र्द्धा॑ होतारः । तेन॑ चतुर्॑.होतारः ।

तस्माच्चतुर्॑.होतार उच्यन्ते । तच्चतुर्॑.होतृ॑णां चतुर्॑.होतृ॑त्वम् ॥

सोमो॑ वै चतुर्॑.होता । अग्निः॑ पञ्च॑होता ।

धा॒ता षड्॑होता । इन्द्रः॑ सप्त॑होता । 1 (10)

**T.B.2.3.1.2**

प्रजा॑पतिर्-दश॑होता । य एवं॑ चतुर्॑.होतृ॑णामृद्धिं॑ वैद ।

ऋध्नो॑त्येव ॥ य एषा॑मेवं बन्धु॑तां वैद । बन्धु॑मान्भवति ।

य एषा॑मेवं क्लृप्तिं॑ वैद । कल्प॑तेऽस्मै । य एषा॑मेव-माय॑तनं॑ वैद ।

आय॑तनवान्-भवति । य एषा॑मेवं प्रति॑ष्ठां वैद । 2 (10)

**T.B.2.3.1.3**

प्रत्ये॒व ति॑ष्ठति ॥ ब्र॒ह्म॒वा॒दि॒नो॑ वदन्ति ।  
द॒श॒हो॒ता च॑तुर्.हो॒ता । पञ्च॑हो॒ता ष॒ड्भो॒ता स॒प्त॒हो॒ता ।  
अथ॑ कस्मा॒च्च॒तुर्.हो॒तार॑ उच्यन्त॒ इति॑ । इन्द्रो॒ वै च॑तुर्.हो॒ता ।  
इन्द्रः॒ खलु॒ वै श्रे॑ष्ठो दे॒वता॑ना-मुप॒देश॑नात् ।  
य ए॒वमिन्द्र॑ ष्रेष्ठं दे॒वता॑ना-मुप॒देश॑नाद्-वेद॑ ।  
वसि॑ष्ठः स॒माना॑नां भवति । तस्मा॒च्छ्रे॑ष्ठ-मा॒यन्तं॑  
प्रथ॑मेनै॒वानु॑ बुद्ध्यन्ते ( ) । अ॒यमा॑गन् ।  
अ॒यम॑वा॒सादि॑ति । की॒र्तिर॑स्य पूर्वाऽऽग॑च्छति ज॒नता॑मा॒यतः॑ ।  
अथो॑ ए॒नं प्रथ॑मेनै॒वानु॑ बुद्ध्यन्ते । अ॒यमा॑गन् ।  
अ॒य-म॑वा॒सादि॑ति ॥ 3 (16)

(स॒प्त॒हो॒ता - प्र॒ति॒ष्ठां वेद॑ - बुद्ध्यन्ते षट्च॑) (A1)

**2.3.2 अनुवाकं 2 – नैमित्तिको होतुमन्त्रहोमः**

**T.B.2.3.2.1**

दक्षि॑णां प्र॒तिग्र॑हीष्यन्थ्-स॒प्तद॑श॒कृत्वोऽप्या॑न्यात् । आ॒त्मान॑मे॒व स॒मिन्धे॑ ।  
तेज॑से वी॒र्या॑य । अथो॑ प्र॒जाप॑तिरे॒वैनां॑ भू॒त्वा प्र॑ति गृह्णाति ।

आ॒त्म॒नो ऽना॒र्त्ये ॥ यद्ये॒न-मा॒र्त्वि॒ज्याद्-वृ॒तꣳ स॒न्तं नि॒रु॒हरे॑रन् ।

आ॒ग्नी॒द्ध्रे जु॒हुया॑द्-द॒श॒हो॒तार॑म् । च॒तुर्गृ॒ही॒ते॒नाज्ये॑न ।

पु॒रस्ता॑त्-प्र॒त्यङि॑ त॒ष्ठन् । प्र॒ति॒लो॒मं वि॒ग्राह॑म् । 4 (10)

#### **T.B.2.3.2.2**

प्रा॒णाने॒वा॒स्योप॑दा॒सय॑ति ॥ यद्ये॒नं पु॒नरु॑प॒ शि॒क्षे॒युः ।

आ॒ग्नी॒द्ध ए॒व जु॒हुया॑द्-द॒श॒हो॒तार॑म् । च॒तुर्गृ॒ही॒ते॒नाज्ये॑न ।

प॒श्चात् प्रा॒डासी॑नः । अ॒नु॒लो॒म-म॑वि॒ग्राह॑म् ।

प्रा॒णाने॒वा॒स्मै क॑ल्पयति ॥

प्रा॒यश्चि॑त्ती-वा॒ग्घो॑ते-त्य॒तु॒मुख॑ ऋ॒तु॒मुखे॑ जु॒होति॑ ।

ऋ॒तू॒ने॒वा॒स्मै क॑ल्पयति । क॒ल्प॑न्तेऽस्मा ऋ॒तवः॑ । 5 (10)

#### **T.B.2.3.2.3**

क्लृ॒प्ता अ॒स्मा ऋ॒तव॑ आ॒यन्ति॑ ॥

ष॒ड्भो॒ता वै भू॒त्वा प्र॒जाप॑तिरि॒दꣳ स॒र्वम॑सृ॒जत॑ । स म॒नोऽसृ॑जत ।

म॒न॒सोऽधि॑ गा॒य॒त्रीम॑सृ॒जत॑ । तद्गा॒य॒त्रीं य॑श आ॒र्च्छत् ।

ता॒माऽल॑भत । गा॒य॒त्रि॒या अ॒धि छ॑न्दाꣳस्यसृ॒जत॑ ।

छन्दो॒भ्योऽधि॒ साम॑ । तथ्॑ साम॒ यश॑ आ॒र्च्छत् ।

तदा॒ऽल॒भत॑ । 6 (10)

**T.B.2.3.2.4**

साम्नो॒ऽधि॒ यजू॑ष्यसृजत । यजु॒भ्यो॒ऽधि॒ विष्णु॑म् ।

तद्-विष्णुं॑ य॒श आ॒र्च्छत् । तमा॒ऽल॒भत॑ । विष्णो॒रद्ध्यो॑षधीरसृजत ।

ओष॑धीभ्योऽधि॒ सोम॑म् । तथ्॑ सोमं॒ यश॑ आ॒र्च्छत् । तमा॒ऽल॒भत॑ ।

सोमा॒दधि॑ प॒शून॑सृजत । प॒शुभ्यो॒ऽधि॒न्द्रम्॑ । 7 (10)

**T.B.2.3.2.5**

तदिन्द्रं॑ य॒श आ॒र्च्छत् । तदे॒नं॑ नाति॒ प्राच्य॑वत ।

इन्द्र॑ इव यश॒स्वी भ॑वति । य॒ एवं॑ वे॒द । नैनं॑ य॒शोऽति॒ प्रच्य॑वते ॥

यद्वा॑ इ॒दं किञ्च॑ । तथ्॑ सर्व॑मु॒त्तान॑ ए॒वाङ्गी॑रसः प्रत्य॑गृह्णात् ।

तदे॒नं॑ प्रति॑गृहीतं॒ नाहि॑नत् । यत् किञ्च॑ प्रति॑ गृह्णी॒यात् ।

तथ्-सर्व॑-मु॒त्तान॑स्त्वा॒ ऽङ्गी॑रसः प्रति॑गृह्णा॒त्वित्ये॒व प्रति॑गृह्णी॒यात् ( ) ।

इयं॑ वा॒ उत्तान॑ आ॒ङ्गी॑रसः । अ॒नयै॒वैन॑त्-प्रति॑ गृह्णाति ।

नैन॑ हिन॑स्ति ॥ ब॒र्हिषा॑ प्रती॒याद् गां॑ वा॒ऽश्वं॑ वा॒ ।

ए॒तद्वै प॑शूनां प्रि॒यं धाम॑ । प्रि॒येणै॒वैनं॑ धाम्ना प्रत्येति ॥ 8 (16)

(वि॒ग्राह॑ – मृ॒तव॑ – स्तदा॒ऽलभ॑ – ते॒न्द्रं॑ – गृ॒ह्णीया॑त् षट्च॑) (A2)

### 2.3.3 अनुवाकं 3 – केशवपनाङ्गं पुष्टिवेदनं

#### T.B.2.3.3.1

यो वा अवि॒द्वान्-नि॒वर्त॑यते ।

वि॒शीर्षा॑ स॒पाप्मा॑ ऽमुष्मिन् लो॒के भ॑वति ।

अथ यो वि॒द्वान्-नि॒वर्त॑यते ।

स॒शीर्षा॑ वि॒पाप्मा॑ ऽमुष्मिन् लो॒के भ॑वति ॥

दे॒वता॑ वै स॒प्त पु॑ष्टिका॒मा न्य॑वर्तयन्त । अ॒ग्निश्च॑ पृथि॒वी च॑ ।

वा॒युश्चा॒न्तरि॑क्षं च । आ॒दि॒त्यश्च॑ द्यौश्च॑ च॒न्द्रमाः॑ । अ॒ग्निर्न्य॑वर्तयत ।

स सा॒हस्र॑-मपु॒ष्यत् । 9 (10)

#### T.B.2.3.3.2

पृथि॒वी न्य॑वर्तयत । सौष॑धीभिर्-व॒नस्प॑तिभि-रपु॒ष्यत् ।

वा॒युर्न्य॑वर्तयत । स म॒रीची॑भि-रपु॒ष्यत् । अ॒न्तरि॑क्षं न्यवर्तयत ।

तद्व॒योभि-रपु॒ष्यत् । आ॒दि॒त्यो न्य॑वर्तयत । स र॒श्मिभि॑-रपु॒ष्यत् ।

द्यौ॑र्न्यव॑र्तयत । सा नक्ष॑त्रै-रपु॑ष्यत् ( ) । च॒न्द्रमा॑ न्यव॑र्तयत ।  
सो॑ऽहोरा॑त्रै-रर्ध॑मासैर्-मासैर्ः ऋ॒तुभिः॑ सम्॑व॒त्सरे॑णा-पु॑ष्यत् ।  
तान्पोषा॑न्-पु॑ष्यति । या॒ऽस्तेऽपु॑ष्यन् ।

य ए॒वं वि॒दन्नि॑ च॒ वर्त॑यते॒ परि॑ च ॥ 10 (15)

(अ॒पु॒ष्यन् - नक्ष॑त्रैरपु॑ष्यत् पञ्च॑ च) (A3)

2.3.4 अनुवाकं 4 – प्रतिग्रहमन्त्रमहिमज्ञानम्

T.B.2.3.4.1

तस्य॑ वा अ॒ग्नेर्. हि॒रण्यं॑ प्र॒तिज॑ग्र॒हुषः॑ ।  
अ॒र्धमि॑न्द्रि॒यस्या॑-पा॒क्राम॑त् । तदे॒तेनै॒व प्र॒त्यगृ॑ह्णात् ।  
तेन॑ वै सो॒ऽर्धमि॑न्द्रि॒यस्या॑त्मन्-नु॒पाध॑त्त ।  
अ॒र्धमि॑न्द्रि॒यस्या॑त्मन्-नु॒पाध॑त्ते ।  
य ए॒वं वि॒द्वान्. हि॒रण्यं॑ प्र॒ति गृ॑ह्णाति । अथ॑ यो ऽवि॒द्वान् प्र॒ति गृ॑ह्णाति ।  
अ॒र्धम॑स्येन्द्रि॒यस्या॑प॒ क्राम॑ति ॥  
तस्य॑ वै सोम॑स्य॒ वासः॑ प्र॒तिज॑ग्र॒हुषः॑ ।  
तृ॒तीयमि॑न्द्रि॒यस्या॑-पा॒क्राम॑त् । 11 (10)

**T.B.2.3.4.2**

तदे॒तेनै॒व प्र॒त्यगृ॑ह्णात् । तेन॒ वै स तृ॒तीयमिन्द्रि॑यस्या॒त्मन्-नु॒पाध॑त्त ।  
 तृ॒तीयमिन्द्रि॑यस्या॒त्मन्-नु॒पाध॑त्ते । य ए॒वं वि॒द्वान् वा॒सः प्र॒ति गृ॑ह्णाति ।  
 अथ॒ योऽवि॑द्वान् प्र॒ति गृ॑ह्णाति । तृ॒तीयम॑स्येन्द्रि॒यस्याप॑ क्रामति ॥  
 तस्य॒ वै रु॒द्रस्य॒ गां प्र॑तिजग्र॒हुषः॑ । च॒तुर्थमिन्द्रि॑यस्या-पा॒क्राम॑त् ।  
 तामे॒तेनै॒व प्र॒त्यगृ॑ह्णात् ।  
 तेन॒ वै स च॒तुर्थ-मिन्द्रि॑यस्या॒त्मन्-नु॒पाध॑त्त । 12 (10)

**T.B.2.3.4.3**

च॒तुर्थ-मिन्द्रि॑यस्या॒त्मन्-नु॒पाध॑त्ते । य ए॒वं वि॒द्वान् गां प्र॑ति गृ॑ह्णाति ।  
 अथ॒ योऽवि॑द्वान् प्र॒ति गृ॑ह्णाति । च॒तुर्थम॑स्येन्द्रि॒यस्याप॑ क्रामति ॥  
 तस्य॒ वै वरु॑णस्या॒श्वम् प्र॑तिजग्र॒हुषः॑ । प॒ञ्चम-मिन्द्रि॑यस्या-पा॒क्राम॑त् ।  
 तमे॒तेनै॒व प्र॒त्यगृ॑ह्णात् । तेन॒ वै स प॒ञ्चममिन्द्रि॑यस्या॒त्मन्-नु॒पाध॑त्त ।  
 प॒ञ्चम-मिन्द्रि॑यस्या॒त्मन्-नु॒पाध॑त्ते ।  
 य ए॒वं वि॒द्वानश्वं॑ प्र॒ति गृ॑ह्णाति । 13 (10)

**T.B.2.3.4.4**

अथ योऽविद्वान् प्रतिगृह्णाति । पञ्चममस्येन्द्रियस्याप क्रामति ॥  
तस्य वै प्रजापतेः पुरुषं प्रतिजग्रहुषः । षष्ठमिन्द्रियस्या-पाक्रामत् ।  
तमेतेनैव प्रत्यगृह्णात् । तेन वै स षष्ठमिन्द्रियस्यात्मन्-नुपाधत्त ।  
षष्ठमिन्द्रियस्यात्मन्-नुपाधत्ते । य एवं विद्वान् पुरुषं प्रति गृह्णाति ।  
अथ योऽविद्वान् प्रति गृह्णाति । षष्ठमस्येन्द्रियस्याप-क्रामति ॥ 14 (10)

**T.B.2.3.4.5**

तस्य वै मनोस्तल्पं प्रतिजग्रहुषः । सप्तममिन्द्रियस्या-पाक्रामत् ।  
तमेतेनैव प्रत्यगृह्णात् । तेन वै स सप्तममिन्द्रिय-स्यात्मन्-नुपाधत्त ।  
सप्तममिन्द्रियस्यात्मन्-नुपाधत्ते । य एवं विद्वान्स्तल्पं प्रतिगृह्णाति ।  
अथ योऽविद्वान् प्रति गृह्णाति । सप्तममस्येन्द्रियस्याप-क्रामति ॥  
तस्य वा उत्तानस्याङ्गीरसस्याप्राणत् प्रतिजग्रहुषः ।  
अष्टममिन्द्रियस्या-पाक्रामत् ॥ 15 (10)

**T.B.2.3.4.6**

तदेतेनैव प्रत्यगृह्णात् । तेन वै सोऽष्टममिन्द्रियस्यात्मन्-नुपाधत्त ।  
अष्टममिन्द्रियस्यात्मन्-नुपाधत्ते । य एवं विद्वान्-नप्राणत् प्रति गृह्णाति ।

अथ योऽविद्वान् प्रतिगृह्णाति । अष्टममस्येन्द्रियस्याप क्रामति ॥  
यद्वा इदं किञ्च । तथ् सर्व-मुत्तान एवाङ्गीरसः प्रत्य गृह्णात् ।  
तदेनं प्रतिगृहीतं नाहिनत् । यत् किञ्च प्रति गृह्णीयात् ( ) ।  
तथ् सर्व-मुत्तानस्त्वा ऽङ्गीरसः प्रतिगृह्णात्वित्येव प्रति गृह्णीयात् ।  
इयं वा उत्तान आङ्गीरसः । अनयैवैनत्-प्रतिगृह्णाति ।  
नैनं हिनस्ति ॥ 16 (14)

(तृतीयमिन्द्रियस्यापाक्रामच् – चतुर्थमिन्द्रियस्यात्मन्नुपाध – ताश्च  
प्रतिगृह्णाति – षष्ठमस्येन्द्रियस्यापक्राम – त्यष्टममिन्द्रियस्यापाक्रामत्  
– प्रति गृह्णीयाच् चत्वारि च) (A4)

### Special Korvai

(तस्य वा अग्नेर् हिरण्यं , सोमस्य वासस्तदेतेन रुद्रस्य गां ,  
तामेतेन वरुणस्याश्वं प्रजापतेः , पुरुषं मनोस्तल्पं तमेतेनोत्तानस्य,  
तदेतेनाप्राणद्-यद् वै )  
अर्द्धं तृतीयमष्टमं तच्चतुर्थं तां पञ्चमं षष्ठं सप्तमन्तम् ।  
तदेतेन द्वे , तामेतेनैकं , तमेतेन त्रीणि , तदेतेनैकं ।

**2.3.5 अनुवाकं 5 – प्रश्नोत्तररूपो ब्रह्मविषयस्संवादः**

**T.B.2.3.5.1**

ब्रह्म॑वादि॒नो वद॑न्ति ॥ यद्-द॑श॒होतारः॑ स॒त्रमा॑सत ।  
केन॑ ते गृ॒हप॑तिना ऽऽर्द्ध॑धुवन् । केन॑ प्र॒जा अ॑सृज॒न्तेति॑ ।  
प्र॒जाप॑तिना वै ते गृ॒हप॑तिना ऽऽर्द्ध॑धुवन् । तेन॑ प्र॒जा अ॑सृजन्त ॥  
यच्च॑तुर्.होतारः स॒त्रमा॑सत । केन॑ ते गृ॒हप॑तिना ऽऽर्द्ध॑धुवन् ।  
केनौष॑धी-रसृज॒न्तेति॑ । सोमे॑न वै ते गृ॒हप॑तिना ऽऽर्द्ध॑धुवन् । 17 (10)

**T.B.2.3.5.2**

तेनौष॑धी-रसृजन्त ॥ यत् पञ्च॑होतारः स॒त्रमा॑सत ।  
केन॑ ते गृ॒हप॑तिना ऽऽर्द्ध॑धुवन् । केनै॒भ्यो लो॒केभ्यो॑ऽसृ॒गान् प्रा॑णुदन्त ।  
केनै॒षां प॒शून॑वृज्जतेति॑ । अ॒ग्निना॒ वै ते गृ॒हप॑तिना ऽऽर्द्ध॑धुवन् ।  
तेनै॒भ्यो लो॒केभ्यो॑ऽसृ॒गान्-प्रा॑णुदन्त । तेनै॒षां प॒शून॑वृज्जत ॥  
यथ् ष॑ड्होतारः स॒त्रमा॑सत । केन॑ ते गृ॒हप॑तिना ऽऽर्द्ध॑धुवन् । 18 (10)

**T.B.2.3.5.3**

केन॑र्तू-नकल्पय॒न्तेति॑ । धा॒त्रा वै ते गृ॒हप॑तिना ऽऽर्द्ध॑धुवन् ।  
तेन॑र्तू-नकल्पयन्त ॥ यथ् स॒प्तहो॑तारः स॒त्रमा॑सत ।

के॒न ते॒ गृ॒हप॑ति॒ना ऽऽर्ध॑ध॒नुव॑न् । के॒न सु॒वरा॑यन् ।

के॒नेमा॑न् लो॒कान्त्-स॑म॒तन्व॑न्निति ।

अ॒र्य॒म्णा वै ते॒ गृ॒हप॑ति॒ना ऽऽर्ध॑ध॒नुव॑न् । ते॒न सु॒वरा॑यन् ।

ते॒नेमा॑न् लो॒कान्त्-स॑म॒तन्व॑न्निति ॥ 19 (10)

#### **T.B.2.3.5.4**

ए॒ते वै दे॒वा गृ॒हप॑तयः । ता॒न् य ए॒वं वि॒द्वान् ।

अ॒प्यन्य॑स्य गार्॒हप॑ते दी॒क्षते॑ । अ॒वा॒न्त॒रमे॒व स॒न्नि॒णा-मृ॑द्ध्नोति ॥

यो वा अ॒र्यम॑णं वे॒द । दा॒नका॑मा अ॒स्मै प्र॒जा भ॑वन्ति ।

य॒ज्ञो वा अ॒र्यमा॑ । आ॒र्याव॑सतिरिति वै त॒माहु॑र्यं प्र॒श॑सन्ति ॥

आ॒र्या व॑सतिर्भवति । य ए॒वं वे॒द ॥ 20 (10)

#### **T.B.2.3.5.5**

य॒द्वा इ॒दं किं॑ च । तथ् सर्वं चतु॒र्हो॑तारः ।

चतु॒र्हो॒तृभ्यो॑ऽधि य॒ज्ञो निर्मि॑तः । स य ए॒वं वि॒द्वान् वि॒वदे॑त ।

अ॒हमे॒व भू॒यो वे॒द । यश्च॑तु॒र्हो॒तृन् वे॒देति॑ । स ह्ये॒व भू॒यो वे॒द ।

यश्च॑तु॒र्हो॒तृन् वे॒द ॥ यो वै चतु॒र्हो॒तृणां॑ हो॒तृन् वे॒द ।

सर्वा॑सु प्र॒जास्व॑न्न-म॒त्ति । 21 (10)

**T.B.2.3.5.6**

सर्वा दि॒शोऽभि॒जय॑ति । प्र॒जाप॑तिर्वै द॒शहो॑तृणां॒ होता॑ ॥  
 सोमश्चतु॑र्होतृणां॒ होता॑ ॥ अ॒ग्निः पञ्च॑होतृणां॒ होता॑ ॥  
 धा॒ता षड्॑होतृणां॒ होता॑ ॥ अ॒र्य॒मा स॒प्तहो॑तृणां॒ होता॑ ॥  
 ए॒ते वै चतु॑र्होतृणां॒ हो॒तारः॑ । तान् य ए॒वं वैद॑ ।  
 सर्वा॑सु प्र॒जास्व॑न्न-म॒त्ति । सर्वा दि॒शोऽभि॒जय॑ति ( ) ॥ 22 (10)

(आ॒र्द्ध॒नुव॑ - न्ना॒र्द्ध॒नुव॑ - न्नि॒त्ये - वं वै॑दा - ति - सर्वा  
 दि॒शोभि॑ जयति ) (A5)

(वै तेन॑ स॒त्रं के॑न) – Special korvai

**2.3.6 अनुवाकं – होतृप्रशंसाप्रसङ्गेन क्रतूनामृत्विग्**

विशेषव्यवस्थापनं, अग्निहोत्रस्य प्राशस्त्यं च

**T.B.2.3.6.1**

प्र॒जाप॑तिः प्र॒जाः सृ॒ष्ट्वा व्य॑स्र॒त्स॒त । स हृ॒दयं॑ भू॒तोऽश॑यत् ।  
 आ॒त्मन् हा॑(३) इ॒त्यह्व॑यत् । आ॒पः प्र॑त्य॒शृण्व॑न् ।  
 ता अ॒ग्निहो॑त्रेणै॒व य॑ज्ञक्र॒तुनो॑प॒ पर्या॑वर्तन्त ।  
 ताः कु॒सिन्धु॑मु॒पौह॑न् । तस्मा॑द॒ग्निहो॑त्रस्य॒ यज्ञ॑क्र॒तोः ।

ए॒क ऋ॒त्विक् ॥ च॒तुष्कृ॒त्वोऽह्व॑यत् ।

अ॒ग्निर्-वा॒यु-रा॒दित्य॑-श्च॒न्द्रमाः॑ ॥ 23 (10)

### **T.B.2.3.6.2**

ते प्र॒त्यशृ॑ण्वन् । ते द॒र्श॒पूर्ण॒मासा॑भ्यामे॒व य॒ज्ञक्र॒तुनो॑प॒ पर्या॑वर्तन्त ।

त उपौ॑ह॒-श्च॒त्वार्य॑ङ्गानि । तस्मा॑द्-द॒र्श॒पूर्ण॒मासयो॑र् य॒ज्ञक्र॒तोः ।

च॒त्वार ऋ॒त्विजः॑ ॥ प॒ञ्च कृ॒त्वोऽह्व॑यत् । प॒शवः॑ प्र॒त्यशृ॑ण्वन् ।

ते चा॒तुर्मा॒स्यैरे॒व य॒ज्ञक्र॒तुनो॑प॒ पर्या॑वर्तन्त ।

त उपौ॑हन् लो॒म छ॒वीं मा॒सम॑स्थि म॒ज्जान॑म् ।

तस्मा॑च्चा॒तुर्मा॒स्यानां॑ य॒ज्ञक्र॒तोः ॥ 24 (10)

### **T.B.2.3.6.3**

प॒ञ्च॒त्विजः॑ ॥ ष॒ट्कृ॒त्वोऽह्व॑यत् । ऋ॒तवः॑ प्र॒त्यशृ॑ण्वन् ।

ते प॒शुब॒न्धेनै॒व य॒ज्ञक्र॒तुनो॑प॒ पर्या॑वर्तन्त ।

त उपौ॑हन्थ्-स्त॒नावा॑ण्डौ शि॒श्नम॑वाञ्चं प्रा॒णम् ।

तस्मा॑त्-प॒शुब॒न्धस्य॑ य॒ज्ञक्र॒तोः । ष॒ट्त्विजः॑ ॥ स॒प्तकृ॒त्वोऽह्व॑यत् ।

हो॒त्राः प्र॒त्यशृ॑ण्वन् ।

ताः सौ॒म्येनै॒वाध्व॑रेण य॒ज्ञक्र॒तुनो॑प॒ पर्या॑वर्तन्त । 25 (10)

**T.B.2.3.6.4**

ता उपौ॑हन्थ्-स॒प्तशी॑र्ष॒ण्यान्-प्रा॒णान् ।  
 तस्मा॑त्-सौ॒म्यस्या॑द्ध्व॒रस्य॑ य॒ज्ञक्र॑तोः ।  
 स॒प्त हो॒त्राः प्रा॒चीर्व॑षट्कुर्वन्ति ॥ द॒शकृ॑त्वोऽह्वयत् ।  
 तपः॑ प्रत्य॒शृणो॑त् ।  
 तत्-क॑र्म॒णैव॑ स॒म्व॑त्स॒रेण॑ स॒र्वैर्य॑ज्ञक्र॒तुभि॒रुप॑ पर्या॒वर्त॑त ।  
 तथ् स॒र्वमा॑त्मान-म॒परि॑वर्ग-मु॒पौह॑त् ।  
 तस्मा॑त्- स॒म्व॑त्स॒रे स॒र्वे य॑ज्ञक्र॒तवो॑ऽव॒रुद्ध्य॑न्ते ॥  
 तस्मा॑द्-द॒शहो॑ता चतु॒र्हो॑ता । पञ्च॑होता षड्भो॑ता स॒प्तहो॑ता ( ) ।  
 ए॒कहो॑त्रे ब॒लिं ह॑रन्ति । ह॒रन्त्य॑स्मै प्र॒जा ब॒लिम् ।  
 ऐ॒नम॑प्रति॒ख्यातं॑ गच्छति । य ए॒वं वे॑द ॥ 26 (14)  
 (च॒न्द्रमा॑ - श्वा॒तुर्मा॒स्यानां॑ य॒ज्ञक्र॑तो - र॒द्ध्वरे॑ण य॒ज्ञक्र॑तु॒नोप॑  
 पर्या॒वर्त॑न्त - स॒प्तहो॑ता च॒त्वारि॑ च) (A6)

2.3.7 अनुवाकं 7 – अग्निहोत्रस्य सर्वक्रतुरुद्धावसाधनेन प्रशंसा

T.B.2.3.7.1

प्र॒जा॒प॒तिः॑ पु॒रुष॑-म॒सृज॑त । सो॒ऽग्नि॑र॒ब्रवी॑त् । म॒मा॒य-म॒न्नम॑स्त्वि॒ति ।  
सो॒ऽबि॑भेत् । सर्वं॑ वै मा॒ऽयं प्र॑ध॒क्ष्यती॑ति ।

स ए॒ता-श्च॑तुर्.होतृ-ना॒त्मस्पर्॑णा-नपश्यत् । तान॑जुहोत् ।

तैर्वै स आ॒त्मान॑-मस्पृ॒णोत् ॥ यद॑ग्निहो॒त्रं जु॒होति॑ ।

ए॒क॒हो॒ता॒रमे॒व तद्-य॑ज्ञक्र॒तु-मा॒प्नो॒त्यग्नि॑हो॒त्रम् । 27 (10)

T.B.2.3.7.2

कु॒सि॒न्धं चा॒त्मनः॑ स्पृ॒णोति॑ । आ॒दि॒त्यस्य॑ च सा॒युज्यं॑ गच्छति ॥

च॒तु॒रु॒न्नय॑ति । चतुर्.हो॒ता॒रमे॒व तद्-य॑ज्ञक्र॒तु-मा॒प्नो॒ति द॑र्.शपूर्णमा॒सौ ।

च॒त्वा॒रि चा॒त्मनो॑ऽङ्गानि स्पृ॒णोति॑ । आ॒दि॒त्यस्य॑ च सा॒युज्यं॑ गच्छति ॥

च॒तु॒रु॒न्नय॑ति । स॒मित्प॑ञ्चमी ।

पञ्च॑हो॒ता॒रमे॒व तद्-य॑ज्ञक्र॒तु-मा॒प्नो॒ति चा॒तुर्मा॒स्यानि॑ ।

लो॒म छ॒वीं मा॒सम॑स्थि म॒ज्जान॑म् । 28 (10)

**T.B.2.3.7.3**

तानि चा॒त्मनः॑ स्पृ॒णोति॑ । आ॒दि॒त्यस्य॑ च सा॒युज्यं॑ गच्छति ॥

चतु॑रुन्नयति । द्वि॒र्जु॒होति॑ ।

षड्ढो॑तारमेव तद्-य॒ज्ञक्र॒तु-मा॑प्नोति पशुबन्धम् ।

स्तना॑वाण्डौ शि॒श्नमवा॑ञ्चं प्रा॒णम् । तानि चा॒त्मनः॑ स्पृ॒णोति॑ ।

आ॒दि॒त्यस्य॑ च सा॒युज्यं॑ गच्छति । चतु॑रुन्नयति । द्वि॒र्जु॒होति॑ । 29 (10)

**T.B.2.3.7.4**

समि॑त् सप्त॒मी ।

सप्त॑होतारमेव तद्-य॒ज्ञक्र॒तु-मा॑प्नोति सौम्य-म॒ध्वर॑म् ।

सप्त चा॒त्मनः॑ शी॒र्ष॒ण्यान्-प्रा॑णान्-स्पृ॒णोति॑ ।

आ॒दि॒त्यस्य॑ च सा॒युज्यं॑ गच्छति ॥ चतु॑रुन्नयति ।

द्वि॒र्जु॒होति॑ । द्वि॒र्नि॒मा॒र्ष्टि॑ । द्विः प्रा॒श्ना॑ति ।

दश॑होतारमेव तद्-य॒ज्ञक्र॒तु-मा॑प्नोति सम्॑व॒त्सर॑म् ।

सर्वं चा॒त्मान-म॑परिवर्गं स्पृ॒णोति॑ ( ) ।

आ॒दि॒त्यस्य॑ च सा॒युज्यं॑ गच्छति ॥ 30 (11) (अ॒ग्नि॒हो॒त्रं - म॒ज्जानं॑ -

द्वि॒र्जु॒हो - त्य॑परिवर्गं स्पृ॒णोत्येकं॑ च ) (A7)

**2.3.8 अनुवाकं 8 – सृष्टिसाधनत्वेन होतृमन्त्रासामर्थ्यं प्रशंसा**

**T.B.2.3.8.1**

**[(अपक्रामत गर्भिण्यः)]**

- In Practice, this Anuvaakam is chanted in normal pitch.

प्र॒जाप॑ति-र॒काम॑यत॒ प्रजा॑येयेति । स तपो॑ऽतप्यत । सो॑ऽन्तर्वा॑नभवत् ।  
स हरि॑तः श्या॒वोऽभवत् । तस्मा॑त्-स्त्र्यन्त॑र्वली ।  
हरि॑णी स॒ती श्या॒वा भ॑वति । स वि॒जाय॑मानो गर्भे॑णाताम्यत् ।  
स तान्तः कृ॒ष्णः श्या॒वोऽभवत् ।  
तस्मा॑त् तान्तः कृ॒ष्णः श्या॒वो भ॑वति ।  
तस्या॑सुरे॒वाजी॑वत् । 31 (10)

**T.B.2.3.8.2**

तेना॑सुना॒ऽसुरा॑नसृजत । तद॑सुराणा-मसुर॑त्वम् ।  
य ए॒वम॑सुराणा-मसुर॑त्वं वैद । अ॒सुमा॑ने॒व भ॑वति । नैन॑मसु॒र्जहा॑ति ॥  
सो॑ऽसुरा॒न्त् सृष्ट्वा॑ पि॒तेवा॑मन्यत । तद॑नु पि॒तृन॑सृजत ।  
तत्-पि॑तृ॒णां पि॑तृत्वम् । य ए॒वं पि॑तृ॒णां पि॑तृत्वं वैद ।  
पि॒तेवै॒व स्वा॑नां भ॑वति । 32 (10)

**T.B.2.3.8.3**

यन्त्यस्य॑ पि॒तरो॑ ह॒वम् ॥ स पि॒तृन्थ् सृष्ट्वा॑ ऽमन॑स्यत् ।  
तदनु॑ मनु॒ष्या-न॑सृजत । तन्मनु॒ष्याणां॑ मनुष्य॒त्वम् ।  
य ए॒वं मनु॒ष्याणां॑ मनुष्य॒त्वं वैद॑ । म॒नस्व्ये॑व भ॒वति॑ ।  
नैनं॑ मनु॒र्जहा॑ति ॥ तस्मै॑ मनु॒ष्यान्थ् स॑सृजानाय ।  
दिवा॑ दे॒वत्रा॑ ऽभवत् । तदनु॑ दे॒वान॑सृजत ( ) ।  
तद्-दे॒वानां॑ दे॒वत्वम्॑ । य ए॒वं दे॒वानां॑ दे॒वत्वं वैद॑ ।  
दिवा॑ है॒वास्य॑ दे॒वत्रा॑ भ॒वति॑ ॥  
तानि॑ वा ए॒तानि॑ च॒त्वार्य॑म्भा॒ऽसि॑ ।  
दे॒वा मनु॒ष्याः पि॒तरो॑ऽसु॒राः ॥ तेषु॑ स॒र्वेष्व॑म्भो नभ॑ इव भ॒वति॑ ।  
य ए॒वं वैद॑ ॥ 33 (17)

(अ॒जी॒वथ् - स्वा॒नां भ॑वति - दे॒वान॑सृजत स॒प्त च॑) (A8)

**2.3.9 अनुवाकं 9 – वायुरूपत्वज्ञानेन होतृमन्त्राणां प्रशंसा**

**T.B.2.3.9.1**

[(यथास्थानं गर्भिण्यः)]

ब्रह्मवादिनो वदन्ति । यो वा इमं विद्यात् । यतोऽयं पवते ।  
यदभि पवते । यदभि संपवते । सर्वमायुरियात् । न पुरा ऽऽयुषः  
प्रमीयेत । पशुमान्त् स्यात् । विन्देत प्रजाम् ॥  
यो वा इमं वेद । 34 (10)

**T.B.2.3.9.2**

यतोऽयं पवते । यदभि पवते । यदभि संपवते । सर्वमायुरेति ।  
न पुराऽऽयुषः प्रमीयते । पशुमान् भवति । विन्देत प्रजाम् ॥  
अद्भ्यः पवते । अपोऽभि पवते । अपोऽभि संपवते ॥ 35 (10)

**T.B.2.3.9.3**

अस्याः पवते । इमामभि पवते । इमामभि संपवते । अग्नेः पवते ।  
अग्निमभि पवते । अग्निमभि संपवते । अन्तरिक्षात् पवते ।  
अन्तरिक्षमभि पवते । अन्तरिक्षमभि संपवते ।  
आदित्यात् पवते । 36 (10)

**T.B.2.3.9.4**

आ॒दि॒त्यम॒भि प॑वते । आ॒दि॒त्यम॒भि संप॑वते । द्योः प॑वते ।  
दि॒वम॒भि प॑वते ॥ दि॒वम॒भि संप॑वते । दि॒ग्भ्यः प॑वते ।  
दि॒शोऽभि प॑वते । दि॒शोऽभि संप॑वते । स यत्-पु॒रस्ता॒द्वाति॑ ।  
प्रा॒ण ए॒व भू॒त्वा पु॒रस्ता॒द्वाति॑ ॥ 37 (10)

**T.B.2.3.9.5**

तस्मा॑त्-पु॒रस्ता॒-द्वा॒न्तम् ॥ सर्वाः प्र॒जाः प्र॑ति नन्दन्ति ।  
प्रा॒णो हि प्रि॒यः प्र॒जाना॑म् । प्रा॒ण इ॒व प्रि॒यः प्र॒जाना॑ भवति ।  
य ए॒वं वैद॑ । स वा ए॒ष प्रा॒ण ए॒व ॥ अथ॒ यद्-दक्षि॑णतो वाति ।  
मा॒तरि॒श्चै॒व भू॒त्वा दक्षि॑णतो वाति । तस्मा॑द्-दक्षि॑णतो वा॒न्तं वि॒द्यात् ।  
सर्वा दि॒श आ॑वाति । 38 (10)

**T.B.2.3.9.6**

सर्वा दि॒शोऽनु॑ वि॒वाति॑ । सर्वा दि॒शोऽनु॑ सम्वा॒तीति॑ ।  
स वा ए॒ष मा॒तरि॒श्चै॒व ॥ अथ॒ यत्-पश्चा॑द्वाति ।  
प॒वमान॑ ए॒व भू॒त्वा पश्चा॑द्वाति । पू॒तम॑स्मा आ॒हर॑न्ति । पू॒तमु॑प॒हर॑न्ति ।  
पू॒तम॑श्वाति । य ए॒वं वैद॑ । स वा ए॒ष प॒वमान॑ ए॒व ॥ 39 (10)

**T.B.2.3.9.7**

अथ॒ यदु॒त्तरतो॑ वा॒ति । स॒वि॒तै॒व भू॒त्वोत्तरतो॑ वा॒ति ।  
 स॒वि॒ते॒व स्वा॒नां॑ भव॒ति । य ए॒वं वे॒द । स वा ए॒ष स॒वि॒तै॒व ॥  
 ते य ए॒नं पु॒रस्ता॑दा॒यन्त॑-मु॒पव॑दन्ति । य ए॒वास्य॑ पु॒रस्ता॑त्-पा॒प्मानः॑ ।  
 ता॒ऽस्ते ऽप॑घ्नन्ति । पु॒रस्ता॑दि॒तरान्-पा॒प्मनः॑ सच॒न्ते ॥  
 अथ॒ य ए॒नं दक्षि॑णत आ॒यन्त॑-मु॒पव॑दन्ति । 40 (10)

**T.B.2.3.9.8**

य ए॒वास्य॑ दक्षि॑णतः पा॒प्मानः॑ । ता॒ऽस्ते ऽप॑घ्नन्ति ।  
 दक्षि॑णत इ॒तरान् पा॒प्मनः॑ सच॒न्ते ॥  
 अथ॒ य ए॒नं पश्चा॑दा॒यन्त॑-मु॒पव॑दन्ति ।  
 य ए॒वास्य॑ पश्चा॑त्-पा॒प्मानः॑ । ता॒ऽस्ते ऽप॑घ्नन्ति ।  
 पश्चा॑दि॒तरान्-पा॒प्मनः॑ सच॒न्ते ॥  
 अथ॒ य ए॒नमुत्तर॑त आ॒यन्त॑मु॒प व॑दन्ति ।  
 य ए॒वास्योत्तर॑तः पा॒प्मानः॑ । ता॒ऽस्ते ऽप॑घ्नन्ति । 41 (10)

**T.B.2.3.9.9**

उ॒त्तर॑त इ॒तरान् पा॒प्मनः॑ सच॑न्ते ॥ तस्मा॑ दे॒वं वि॒द्वान् । वी॒व नृ॑त्येत् ।  
 प्रे॒व च॑लेत् । व्य॒स्ये॒वाक्ष्यौ॑ भा॒षेत॑ । म॒ण्टये॑दिव । क्रा॒थये॑दिव ।  
 शृ॒ङ्गाये॑ते॒व ॥ उ॒त मो॑प॒वदे॑युः । उ॒त मे॑ पा॒प्मान्-म॑प॒हन्यु॑रिति॑ ( ) ॥  
 स यां दि॒शं स॒निमे॑ष्यन्थ्-स्यात् । य॒दा तां दि॒शं वा॑तो वा॒यात् ।  
 अथ॑ प्र॒वेयात्॑ । प्र वा॑ धा॒पयेत्॑ (धा॒वयेत्) ।

सा॒तमे॒व र॑दि॒तं व्यू॑ढं गन्ध॒मभि॑ प्रच्य॒वते॑ ।

आ॒ऽस्य॑ तं ज॒नप॑दं पूर्वा॒ की॒र्तिर्ग॑च्छति ॥

दा॒नका॑मा अ॒स्मै प्र॒जा भ॑वन्ति । य ए॒वं वे॒द ॥ 42 (18)

(वे॒द - संप॑वत - आ॒दि॒त्यात् प॑वते - वा॒त्या - वा॒त्ये - ष प॑व॒मान  
 ए॒व - दक्षि॑णत आ॒यन्त॑मु॒प व॑दन् - त्पु॒त्तर॑तः पा॒प्मान॑स्ता॒स्ते  
 ऽप॑घ्न - त्ती॒त्यष्टौ॑ च) (A9)

**2.3.10 अनुवाकं 10 – दशहोतृमन्त्राणां काम्यप्रयोगः**

**T.B.2.3.10.1**

प्र॒जाप॑तिः सोमं॑ राजा॒नम॑सृजत । तं त्रयो॑ वे॒दा अ॒न्वसृ॑ज्यन्त ।

ता॒न् ह॑स्ते॒ऽकुरु॑त । अथ॑ ह सी॒ता सा॒वि॒त्री । सोमं॑ राजा॒नं च॑कमे ।

श्रद्धामु॑ स च॑कमे । सा॑ ह॒ पि॒तरं॑ प्र॒जाप॑ति-मु॒पस॑सार ।

त॒ञ् हो॑वाच । नम॑स्ते अस्तु॒ भगवः॑ । उप॑ त्वा॒ऽयानि॑ । 43 (10)

#### **T.B.2.3.10.2**

प्र॒ त्वा प॑द्ये ॥ सोमं॑ वै॒ राजा॑नं काम॒ये । श्रद्धामु॑ स का॒मय॑त इति॑ ।

तस्या॑ उ॒ ह स्था॑गरमलङ्का॒रं क॑ल्पयित्वा ।

द॒शहो॑तारं पु॒रस्ता॑द्-व्या॒ख्याय॑ । चतु॑र्.हो॒तारं॑ दक्षि॒णतः॑ ।

पञ्च॑हो॒तारं॑ प॒श्चात् । षड्द्वो॑तार-मु॒त्तर॑तः । स॒प्तहो॑तार-मु॒परि॑ष्ठात् ।

स॒म्भारै॑श्च प॒त्निभि॑श्च॒ मुखे॑ऽलङ्क॒त्य । 44 (10)

#### **T.B.2.3.10.3**

आ॒ऽस्यार्द्धं॑ वै॒व्राज॑ । ता॒ञ् हो॑दीक्ष्यो॒वाच॑ । उप॑ मा॒ऽऽव॑र्तस्वेति॑ ।

त॒ञ् हो॑वाच । भो॒गं तु॒ म आ॑चक्ष्व । ए॒तन् म॒ आ॑चक्ष्व ।

य॒त्ते पा॑णा॒विति॑ । तस्या॑ उ॒ ह त्री॑न्. वे॒दान् प्र॑ददौ ।

तस्मा॑दु॒ ह स्त्रि॑यो॒ भो॒गमै॑व हा॒रय॑न्ते ॥

स यः॑ का॒मये॑त प्रि॒यः स्या॑मिति॑ । 45 (10)

**T.B.2.3.10.4**

यं वा कामयेत प्रियः स्यादिति ।  
तस्मा एतञ्चा स्थागर-मलङ्कारं कल्पयित्वा ।  
दशहोतारं पुरस्ताद्-व्याख्याय । चतुर्होतारं दक्षिणतः ।  
पञ्चहोतारं पश्चात् । षड्होतार-मुत्तरतः । सप्तहोतार-मुपरिष्ठात् ।  
सम्भारैश्च पत्निभिश्च मुखेऽलङ्कृत्य । आऽस्यार्द्धं व्रजेत् ।  
प्रियो हैव भवति ( ) ॥ 46 (10)

(अया - न्यलङ्कृत्य - स्यामिति - भवति) (A10)

**2.3.11 अनुवाकं 11 – दशहोत्रादिमन्त्रनाम्नां प्रवृत्तिनिमित्तम्**

**T.B.2.3.11.1**

ब्रह्मात्मन्-वदसृजत । तदकामयत । समात्मना पद्येयेति ।  
आत्मन्-नात्मन्-नित्यामन्त्रयत । तस्मै दशमञ् हूतः प्रत्यशृणोत् ।  
स दशहूतोऽभवत् । दशहूतो ह वै नामैषः ।  
तं वा एतं दशहूतञ् सन्तम् । दशहोतेत्याचक्षते परोक्षेण ।  
परोक्षप्रिया इव हि देवाः ॥ 47 (10)

**T.B.2.3.11.2**

आ॒त्मन्-ना॒त्मन्-नि॒त्याम॑न्त्रयत । तस्मै॑ स॒प्त॒म॒ꣳ हू॒तः प्र॒त्य॒शृ॒णोत् ।  
 स स॒प्त॒हू॒तोऽभ॑वत् । स॒प्त॒हू॒तो ह॒ वै ना॒मैषः॑ ।  
 तं वा॑ ए॒त॒ꣳ स॒प्त॒हू॒त॒ꣳ स॒न्त॒म् । स॒प्त॒हो॒तेत्या॑चक्षते प॒रोक्षे॑ण ।  
 प॒रोक्ष॑प्रिया इ॒व हि दे॒वाः ॥ आ॒त्मन्-ना॒त्मन्-नि॒त्याम॑न्त्रयत ।  
 तस्मै॑ ष॒ष्ठ॒ꣳ हू॒तः प्र॒त्य॒शृ॒णोत् । स ष॒ड्भू॒तोऽभ॑वत् । 48 (10)

**T.B.2.3.11.3**

ष॒ड्भू॒तो ह॒ वै ना॒मैषः॑ । तं वा॑ ए॒त॒ꣳ ष॒ड्भू॒त॒ꣳ स॒न्त॒म् ।  
 ष॒ड्भू॒तेत्या॑चक्षते प॒रोक्षे॑ण । प॒रोक्ष॑प्रिया इ॒व हि दे॒वाः ॥  
 आ॒त्मन्-ना॒त्मन्-नि॒त्याम॑न्त्रयत । तस्मै॑ प॒ञ्च॒म॒ꣳ हू॒तः प्र॒त्य॒शृ॒णोत् ।  
 स प॒ञ्च॒ हू॒तोऽभ॑वत् । प॒ञ्च॒हू॒तो ह॒ वै ना॒मैषः॑ ।  
 तं वा॑ ए॒तं प॒ञ्च॒हू॒त॒ꣳ स॒न्त॒म् । प॒ञ्च॒हो॒तेत्या॑चक्षते प॒रोक्षे॑ण । 49 (10)

**T.B.2.3.11.4**

प॒रोक्ष॑प्रिया इ॒व हि दे॒वाः ॥ आ॒त्मन्-ना॒त्मन्-नि॒त्याम॑न्त्रयत ।  
 तस्मै॑ च॒तु॒र्थ॒ꣳ हू॒तः प्र॒त्य॒शृ॒णोत् । स च॒तु॒र्हू॒तोऽभ॑वत् ।  
 च॒तु॒र्हू॒तो ह॒ वै ना॒मैषः॑ । तं वा॑ ए॒तं च॒तु॒र्हू॒त॒ꣳ स॒न्त॒म् ।

च॒तुर्॒हो॒ते॒त्याच॑क्षते॒ परो॑क्षेण । परो॑क्षप्रिया इ॒व हि॒ दे॒वाः ॥

तम॑ब्रवीत् । त्वं वै मे॒ नेदि॑ष्ठं हू॒तः प्रत्य॑श्रौषीः ( ) ।

त्वयै॑-नानाख्या॒तार॒ इति॑ । तस्मान्नु॒ है॒ना॒-श्चतु॑र्हो॒तार॒ इत्याच॑क्षते ।

तस्मा॑-च्छु॒श्रूषुः॑ पु॒त्राणां॑ ह॒द्यत॑मः । नेदि॑ष्ठो ह॒द्यत॑मः ।

नेदि॑ष्ठो ब्र॒ह्म॒णो भ॑वति । य ए॒वं वै॑द ॥ 50 (16)

(दे॒वाः - षड्भू॑तोऽभवत् - पञ्च॑हो॒ते॒त्याच॑क्षते॒ परो॑क्षेणा - श्रौषीः  
षट्च॑) (A11)

=====

**Prapaataka Korvai with starting Words of 1 to 11 Anuvaakams :-**

(ब्रह्मवादि॒नः किं॑ – दक्षि॑णां – यो॑ वा अवि॒द्वान् – तस्य॑ वै –  
 ब्रह्मवादि॒नो यद् दश॑होतारः – प्रजा॑पतिर्व्य॒स्रं – प्रजा॑पतिः पु॒रुषं॑ –  
 प्रजा॑पतिरकामयत स तपः सोऽन्त॑र्वान् – ब्रह्मवादि॒नो यो वा इ॒मं  
 वि॒द्यात् – प्रजा॑पतिः सोम॑ꣳ राजा॑नं – ब्रह्मा॑त् मन्वदेका॑दश)

**Korvai with starting Words of 1, 11, 21 Series of dasinis :-**

(ब्रह्मवादि॒न – स्तस्य॑ वा अ॒ग्नेर् – यद्वा॑ इ॒दं किञ्च॑ –  
 प्रजा॑पतिरकामयत – य ए॒वास्य॑ दक्षि॑णतः पञ्चा॑शत्)

**First and Last Word - 2<sup>nd</sup> Ashtakam 3<sup>rd</sup> Prapaatakam :-**

(ब्रह्मवादि॒नो – य ए॒वं वैद॑ )

॥ हरिः॑ ओं ॥

॥ कृष्ण यजुर्वेदीय तैत्तिरीय ब्राह्मणे

द्वितीयाष्टके तृतीयः प्रपाठकः समाप्तः ॥

**Details of Dasini & Vaakyams for  
Ashtakam 2, Prapaatakam 3 (TB 2.3)**

	Dasini	Vaakyams
Anuvakam 1	3	36
Anuvakam 2	5	56
Anuvakam 3	2	25
Anuvakam 4	6	64
Anuvakam 5	6	60
Anuvakam 6	4	44
Anuvakam 7	4	41
Anuvakam 8	3	37
Anuvakam 9	9	98
Anuvakam 10	4	40
Anuvakam 11	4	46
Total →	50	547

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

**2.4 द्वितीयाष्टके चतुर्थः प्रपाठकः – उपहोमाः**

**2.4.1 अनुवाकं 1 – उपहोमाः**

**T.B.2.4.1.1**

जुष्टो दमूना अतिथिर्दुरोणे । इमं नो यज्ञमुप याहि विद्वान् ।  
विश्वा अग्नेऽभि युजो विहत्य । शत्रूयता-माभरा भोजनानि ॥  
अग्ने शर्द्ध महते सौभगाय । तव द्युम्नान्युत्तमानि सन्तु ।  
सं जास्पत्यं सुयम-माकृणुष्व । शत्रूयता-मभितिष्ठा महासि ॥  
अग्ने यो नोऽभितो जनः । वृको वारो जिघासति । 1 (10)

**T.B.2.4.1.2**

तावस्त्वं वृत्रहज्जहि । वस्वस्मभ्य-माभर ॥ अग्ने यो नोऽभिदासति ।  
समानो यश्च निष्यः । इद्धमस्येव प्रक्षायतः ।  
मा तस्योच्छेषि किञ्चन ॥ त्वमिन्द्राभिभूरसि ।  
देवो विज्ञातवीर्यः ।  
वृत्रहा पुरुचेतनः ॥ अप प्राच इन्द्र विश्वा अमित्रान् । 2 (10)

**T.B.2.4.1.3**

अपा॑पा॒चो॒ अभि॑भू॒ते नु॑दस्व । अपो॑दी॒चो अप॑ शूरा॒धरा॑च ऊ॒रौ ।  
यथा॑ तव॒ शर्म॑न्मदे॒म ॥ तमि॑न्द्रं वा॒जया॑मसि । महे॒ वृत्रा॑य हन्त॒वे ।  
स वृ॑षा वृ॒षभो॑ भुवत् ॥ यु॒जे रथं॑ ग॒वेष॑ण॒ः हरि॑भ्याम् ।  
उप॒ ब्रह्मा॑णि जुजुषा॒ण-म॑स्थुः । वि॒बाधि॑ष्टास्य रोद॒सी महि॑त्वा ।  
इन्द्रो॑ वृ॒त्राण्य॑प्र॒ती जघ॑न्वान् ॥ 3 (10)

**T.B.2.4.1.4**

हव्य॑वाह-म॒भिमा॑तिषाऽहम् । रक्षो॑हणं पृ॒तना॑सु जि॒ष्णुम् ।  
ज्योति॑ष्मन्तं दी॒द्यतं॑ पु॒रन्धि॑म् । अ॒ग्निः स्वि॑ष्टकृ॒त-मा॑हु॒वेम ॥  
स्वि॑ष्टमग्ने॒ अभि॑ तत् पृ॒णाहि॑ । वि॒श्वा दे॒व पृ॒तना॑ अ॒भिष्य॑ ।  
उरुं॑ नः पन्थां॑ प्रदि॒शन्वि॑ भा॒हि । ज्योति॑ष्मद्धे॒ह्यजरं॑ न आ॒युः ॥  
त्वा॒मग्ने॑ ह॒विष्म॑न्तः । दे॒वं मर्ता॑स ईडते । 4 (10)

**T.B.2.4.1.5**

मन्ये॑ त्वा जा॒तवे॑दसम् । स ह॒व्या वक्ष्या॑ऽनु॒षक् ॥  
वि॒श्वा॒नि नो॑ दु॒र्गहा॑ जा॒तवे॑दः । सिन्धुं॑ न ना॒वा दु॒रिता॑ऽति॒पर्षि॑ ।  
अग्ने॑ अ॒त्रिव॑न् मन॒सा गृ॑णा॒नः । अ॒स्माकं॑ बोद्ध्यवि॒ता त॒नूना॑म् ॥

पू॒षा गा॑ अ॒न्वे॒तु नः॑ । पू॒षा र॑क्ष॒त्वर्व॑तः । पू॒षा वाज॑ꣳ स॒नो॒तु नः॑ ॥

पू॒षे॒मा आ॑शा॒ अनु॑वे॒द सर्वाः॑ ॥ 5 (10)

#### **T.B.2.4.1.6**

सो अ॒स्माꣳ अ॑भ॒यत॑मे॒न ने॑षत् । स्व॒स्ति॒दा अ॑घृ॒णिः सर्व॑वीरः ।

अ॒प्र॒युच्छ॑न् पु॒र ए॒तु प्र॑जा॒नन् ॥ त्व॑म॒ग्ने स॒प्र॒था अ॑सि ।

जु॒ष्टो हो॒ता व॑रे॒ण्यः । त्व॒या य॒ज्ञं वि॑त॒न्वते ॥ अ॒ग्नी र॑क्षाꣳसि॑ से॒धति॑ ।

शु॒क्रशो॑चि॒-र॑म॒र्त्यः । शु॒चिः पा॒वक॑ ई॒श्वरः॑ ॥

अ॒ग्ने र॑क्षा॒णो अ॑ꣳह॒सः ॥ 6 (10)

#### **T.B.2.4.1.7**

प्र॒तिष्म॑ दे॒व री॑ष॒तः । त॒पि॒ष्ठै-र॒जरो॑ द॒ह ॥ अ॒ग्ने ह॑ꣳसि॒ न्य॑त्रि॒णम् ।

दी॒द्यन् म॒र्त्येष्वा॑ । स्वे क्ष॒र्ये शु॑चि॒व्रत॑ ॥ आ वा॑त॒ वाहि॑ भे॒षज॑म् ।

वि वा॑त॒ वाहि॑ य॒द॒रपः॑ । त्वꣳहि॑ वि॒श्वभे॑ष॒जः । दे॒वानां॑ दू॒त ई॒यसे॑ ॥

द्वा॒वि॒मौ वा॑तौ वा॒तः ॥ 7 (10)

#### **T.B.2.4.1.8**

आ सि॒न्धो॒रा प॑रा॒वतः॑ । दक्षं॑ मे अ॒न्य आ॒वा॒तु ।

प॒रा॒ऽन्यो वा॑तु॒ यद॑र॒पः ॥ यद॑दो वा॒त ते गृ॑हे । अ॒मृत॑स्य नि॒धिर्. हि॒तः ।

ततो॑ नो दे॒हि जी॒वसे॑ । ततो॑ नो धे॒हि भे॒षज॑म् ।

ततो॑ नो म॒ह आ॒वह ॥ वा॒त आ॒वातु॑ भे॒षज॑म् ।

श॒म्भूर् म॒योभू॒र्नो ह॒दे । 8 (10)

**T.B.2.4.1.9**

प्र ण॑ आ॒यू॒षि ता॒रिष॑त् ॥ त्वम॑ग्ने अ॒याऽसि॑ । अ॒या स॒न्मन॑सा हि॒तः ।

अ॒या स॒न् ह॒व्यमू॑हि॒षे । अ॒या नो॑ धे॒हि भे॒षज॑म् ॥ इ॒ष्टो अ॒ग्निरा॑हु॒तः ।

स्वा॒हाकृ॑तः पि॒पर्तु॑ नः । स्व॒गा दे॒वेभ्य॑ इ॒दं नमः॑ ॥

का॒मो भू॒तस्य॑ भ॒व्यस्य॑ । स॒म्राडे॑को वि॒राज॑ति । 9 (10)

**T.B.2.4.1.10**

स इ॒दं प्र॑ति पप्र॒थे । ऋ॒तूनु॑थ् सृ॒जते॑ व॒शी ॥

का॒मस्त॑द॒ग्रे स॒मव॑र्त॒ताधि॑ । म॒नसो॑ रे॒तः प्र॒थमं॑ य॒दासी॑त् ।

स॒तो ब॒न्धुम॑स॒ति नि॒रवि॑न्दन् ।

हृ॒दि प्र॒तीष्या॑ क॒वयो॑ म॒नीषा॑ ॥ त्वया॑ म॒न्यो स॒रथ॑-मा॒रुज॑न्तः ।

हर्ष॑माणा॒सो धृ॒षता॑ म॒रुत्वः॑ । ति॒ग्मेष॑व॒ आयु॑धा स॒शिश॑ानाः ।

उप॑प्रय॒न्ति न॑रो अ॒ग्निरू॑पाः ॥ 10 (10)

**T.B.2.4.1.11**

म॒न्यु॒र्भगो॑ म॒न्युरे॒वास॑ दे॒वः । म॒न्युर् होता॑ वरु॒णो वि॒श्ववे॑दाः ।  
 म॒न्युं वि॑श ईडते दे॒वय॑न्तीः । पा॒हि नो॑ म॒न्यो तप॑सा श्रमे॒ण ॥  
 त्वम॑ग्ने व्रत॒भृच्छु॑चिः । दे॒वाँ आ॑सादया इ॒ह ।  
 अग्ने॑ ह॒व्याय॑ वोढ॒वे ॥ व्र॒ता नु॑ बिभ्र॒द् व्रत॑पा अदा॒भ्यः ।  
 यजा॑ नो दे॒वाँ अ॒जरः सु॒वीरः॑ ।  
 दध॑द्-रत्नानि सुवि॒दानो॑ अग्ने ( ) ।  
 गो॒पाय॑ नो जी॒वसे॑ जा॒तवे॑दः ॥ 11 (11) (जिघाँस - त्यमित्रा -  
 ज्जघन्वा - नीडते - सर्वा - अहंसो - वातो - हृदे - राज -  
 त्यग्निरूपाः - सुवि॒दानो॑ अ॒ग्न ए॒कं च ) (A1)

**2.4.2 अनुवाकं 2 – उपहोमाः**

**T.B.2.4.2.1**

चक्षु॑षो हे॒ते म॒नसो॑ हे॒ते । वाचो॑ हे॒ते ब्र॒ह्म॒णो हे॒ते ।  
 यो मा॑ऽघा॒यु-र॒भिदा॑सति । तम॑ग्ने मे॒न्याऽमे॒निं कृ॑णु ॥  
 यो मा॑ चक्षु॑षा यो म॒नसा॑ । यो वा॒चा ब्र॒ह्म॒णा ऽघा॒यु-र॒भिदा॑सति ।  
 तया॑ऽग्ने त्वं मे॒न्या । अ॒मुम॑मे॒निं कृ॑णु ॥

यत् किञ्चासौ मनसा यच्च वाचा ।

यज्ञैर् जुहोति यजुषा हविर्भिः । 12 (10)

**T.B.2.4.2.2**

तन् मृत्युर् निर्ऋत्या सम्विदानः । पुरा दिष्टा-दाहुतीरस्य हन्तु ॥

यातुधाना निर्ऋतिरादु रक्षः । ते अस्य घनन्त्वनृतेन सत्यम् ।

इन्द्रेषिता आज्यमस्य मथनन्तु । मा तथ्-समृद्धि यदसौ करोति ॥

हन्मि तेऽहं कृतं हविः । यो मे घोर-मचीकृतः ।

॥ अपाञ्चौ त उभौ बाहू । अपनह्याम्यास्यम् ॥ 13 (10)

**T.B.2.4.2.3**

अपनह्यामि ते बाहू । अपनह्याम्यास्यम् । अग्नेर् देवस्य ब्रह्मणा ।

सर्वं तेऽवधिषं कृतम् ॥ पुरा ऽमुष्य वषट्कारात् । यज्ञं देवेषु नस्कृधि ।

स्विष्टमस्माकं भूयात् । माऽस्मान् प्रापन्-नरातयः ॥

अन्ति दूरे सतो अग्ने । भ्रातृव्यस्या ऽभिदासतः । 14 (10)

**T.B.2.4.2.4**

वषट्कारेण वज्रेण । कृत्यां हन्मि कृतामहम् ॥

यो मा नक्तं दिवा सायम् । प्रातश्चाहो निपीयति ।

अद्या तमिन्द्र वज्रेण । भ्रातृव्यं पादयामसि ॥  
 इन्द्रस्य गृहोऽसि तं त्वा । प्रपद्ये सगुः साश्वः ।  
 सह यन्मे अस्ति तेन ॥ ईडे अग्निं विपश्चितम् ॥ 15 (10)

**T.B.2.4.2.5**

गिरा यज्ञस्य साधनम् । श्रुष्टीवानं धितावानम् ॥  
 अग्ने शकेम ते वयम् । यमं देवस्य वाजिनः ।  
 अति द्वेषाऽसि तरेम ॥  
 अवतं मा समनसौ समौकसौ । सचेतसौ सरेतसौ ।  
 उभौ मामवतं जातवेदसौ । शिवौ भवतमद्य नः ॥  
 स्वयं कृण्वानः सुगमप्रयावम् ॥ 16 (10)

**T.B.2.4.2.6**

तिग्मशृङ्गो वृषभः शोशुचानः । प्रत्नः सधस्थ-मनुपश्यमानः ।  
 आ तन्तुमग्निर्-दिव्यं ततान ॥ त्वं नस्तन्तुरुत सेतुरग्ने ।  
 त्वं पन्था भवसि देवयानः । त्वया ऽग्ने पृष्ठं वयमारुहेम ।  
 अथा देवैः सधमादं मदेम ॥ उदुत्तमं मुमुग्धि नः ।  
 वि पाशं मद्ध्यमं चृत । अवाधमानि जीवसे ॥ 17 (10)

**T.B.2.4.2.7**

वय॑ꣳ सोम॑ व्र॒ते तव॑ । मन॑स्त॒नूषु॑ बिभ्र॑तः । प्र॒जाव॑न्तो अ॒शीम॑हि ॥  
 इन्द्रा॑णी दे॒वी सु॒भगा॑ सु॒पत्नी॑ ॥ उद॑ꣳशेन॑ पति॒विद्ये॑ जिगाय ।  
 त्रि॑ꣳशद॒स्या ज॒घनं॑ यो॒जनानि॑ । उप॒स्थ इन्द्र॑ꣳ स्थवि॑रं बिभर्ति ॥  
 सेना॑ ह॒ नाम॑ पृथि॒वी धन॑ञ्जया । विश्व॑व्य॒चा अदि॑तिः सूर्य॑त्वक् ।  
 इन्द्रा॑णी दे॒वी प्रा॒सहा॑ द॒दाना॑ । 18 (10)

**T.B.2.4.2.8**

सा नो॑ दे॒वी सु॒हवा॑ शर्म॑ यच्छतु ॥ आ त्वा॑ ऽहार्षम॒न्तर॑भूः ।  
 ध्रुव॑स्तिष्ठावि॒चाच॑लिः । विश॑स्त्वा सर्वा॑ वाञ्छन्तु ।  
 मा त्वद्-रा॒ष्ट्र-मधि॑भ्रशत् ॥ ध्रुवा॑ द्यौर् ध्रुवा॑ पृथि॒वी ।  
 ध्रुवं॑ विश्व॑मिदं जगत् । ध्रुवा॑ ह॒ पर्व॑ता इ॒मे ।  
 ध्रुवो॑ राजा वि॒शाम॑यम् ॥ इ॒हैवै॒धि मा॑ व्यथिष्ठाः । 19 (10)

**T.B.2.4.2.9**

पर्व॑त इ॒वावि॒चाच॑लिः । इन्द्र॑ इ॒वेह॑ ध्रुव॑स्तिष्ठ । इ॒ह रा॒ष्ट्र-मु॑धारय ॥  
 अ॒भिति॑ष्ठ पृ॒तन्य॑तः । अध॑रे सन्तु श॒त्रवः॑ । इन्द्र॑ इ॒व वृ॒त्रहा॑ तिष्ठ ।

अपः॑ क्षेत्राणि॑ सञ्जयन् ॥ इन्द्र॑ एण-मदीधरत् । ध्रु॒वं ध्रु॒वेण॑ ह॒विषा॑ ।

तस्मै॑ दे॒वा अधि॑ब्रवन् ( ) । अ॒यं च॒ ब्रह्म॑णस्पतिः ॥ 20 (11)

(ह॒विर्भि॑ – रा॒स्य – म॒भि दा॑सतो – वि॒पश्चि॑त – म॒प्रया॑वं –  
जी॒वसे॑ – द॒दाना॑ – व्य॒थिष्ठा॑ – ब्र॒वन्नेकं॑ च) (A2)

### 2.4.3 अनुवाकं 3 – उपहोमाः

#### T.B.2.4.3.1

जुष्टी॑ नरो॒ ब्रह्म॑णा वः पि॒तृणा॑म् । अक्ष॑मव्ययं न किला॑ रिषाथ ।

यच्छ॑क्वरीषु बृ॒हता॑ रवेण । इन्द्रे॑ शुष्म-म॒दधा॑था वसिष्ठाः ॥

पा॒वका॑ नः सर॑स्वती । वा॒जेभिर्-वा॒जिनी॑वती ।

य॒ज्ञं व॑ष्टु धि॒या व॑सुः ॥ सर॑स्वत्यभि नो॒ नेषि॑ वस्यः ।

मा प॑स्फरीः पय॑सा मा न॒ आ ध॑क् ।

जुष॑स्व नः स॒ख्या वे॒श्या च॑ । 21 (10)

#### T.B.2.4.3.2

मा त्वत्क्षेत्रा॑-ण्यरणानि॑ गन्म ॥ वृ॒ञ्जे ह॒विर्न॑मसा ब॒र्हि॒रग्नौ॑ ।

अ॒यामि॑ सु॒ग् घृ॒तवती॑ सुवृ॒क्तिः । अ॒म्यक्षि॑ स॒द्म स॒दने॑ पृथि॒व्याः ।

अ॒श्रायि॑ य॒ज्ञः सूर्ये॑ न चक्षुः ॥ इ॒हा॒र्वाञ्च॑-म॒तिह्व॑ये ।

इ॒न्द्रं॑ जै॒त्राय॑ जे॒तवे॑ । अ॒स्माक॑मस्तु॒ के॒वलः॑ ॥

अ॒र्वाञ्च॑-मि॒न्द्र-म॒मृतो॑ ह॒वामहे॑ ।

यो गो॒जिद्-ध॒नजि॑-द॒श्वजि॑द्यः । 22 (10)

**T.B.2.4.3.3**

इ॒मं नो॑ य॒ज्ञं वि॑ह॒वे जु॑षस्व । अ॒स्य कु॑र्मो ह॒रिवो॑ मे॒दिनं॑ त्वा ॥

अ॒संमृ॑ष्टो जा॒यसे॑ मा॒तृवोः॑ शु॒चिः । म॒न्द्रः क॒विरु॑दति॒ष्ठो वि॒वस्व॑तः ।

घृ॒तेन॑ त्वा ऽव॒र्द्धय॑न्न॒ग्न आ॑हुत । धू॒मस्ते॑ के॒तुर॑भवद्-दि॒वि श्रि॑तः ॥

अ॒ग्नि॒रग्रे॑ प्रथ॒मो दे॒वता॑नाम् । स॒म्या॑ताना-मु॒त्त॒मो वि॒ष्णुरा॑सीत् ।

यज॑मानाय॒ परि॑गृह्य॒ देवा॑न् । दी॒क्षये॒दꣳ ह॒विरा॑गच्छ॒तं नः॑ ॥ 23 (10)

**T.B.2.4.3.4**

अ॒ग्निश्च॑ वि॒ष्णो तप॑ उत्त॒मं म॒हः । दी॒क्षा॒पा॒लेभ्यो॑ व॒नतꣳ॑ हि श॒क्रा ।

वि॒श्वैर् दे॒वैर् य॒ज्ञियैः॑ स॒म्वि॑दानौ । दी॒क्षाम॒स्मै यज॑मानाय॒ धत्त॑म् ॥

प्र॒तद्-वि॒ष्णुः स्त॑वते॒ वी॒र्या॑य । मृ॒गो न॑ भी॒मः कु॑च॒रो गि॑रि॒ष्ठाः ।

यस्यो॑रु॒षु त्रि॒षु वि॒क्रम॑णेषु । अधि॑क्षि॒यन्ति॒ भुव॑नानि॒ विश्वा॑ ॥

नू म॒र्तो द॑यते॒ सनि॑ष्यन्॒ यः । वि॒ष्णव॑ उ॒रुगा॑याय॒ दा॑शत् । 24 (10)

**T.B.2.4.3.5**

प्र॒ यः स॒त्रा॒चा॒ मन॒सा॒ यजा॑तै । ए॒ता॒वन्तं॑ न॒र्य॑-मा॒विवा॑सात् ॥  
 वि॒च॒क्र॒मे॒ पृ॒थि॒वी॒मेष॑ ए॒ताम् । क्षे॒त्राय॑ वि॒ष्णु॒र् म॒नु॒षे द॒श॒स्यन् ।  
 ध्रु॒वा॒सो॑ अ॒स्य की॒रयो॑ ज॒ना॒सः । उ॒रु॒क्षि॒तिꣳ सु॒ज॒नि॒मा च॑कार ॥  
 त्रि॒र्दे॒वः पृ॒थि॒वी॒मेष॑ ए॒ताम् । वि॒च॒क्र॒मे श॒त॒र्च॒सं म॒हि॒त्वा ।  
 प्र॒ वि॒ष्णु॑-र॒स्तु त॒व॒स-स्त॑वी॒यान् ।  
 त्वे॒षꣳ ह्य॒स्य स्थ॑वि॒रस्य॑ ना॒म ॥ 25 (10)

**T.B.2.4.3.6**

हो॒तारं॑ चि॒त्रर॑थ-म॒ध्व॒रस्य॑ । य॒ज्ञस्य॑ य॒ज्ञस्य॑ के॒तुꣳ रु॒श॒न्तम् ।  
 प्र॒त्य॒र्द्धिं दे॒वस्य॑ दे॒वस्य॑ म॒हा । श्रि॒या त्व॑ग्नि॒मति॑थिं ज॒ना॒नाम् ॥  
 आ नो॑ वि॒श्वाभि॑रू॒तिभिः॑ स॒जोषाः॑ ॥ ब्र॒ह्म जु॑षा॒णो ह॑र्यश्च या॒हि ।  
 व॒री॒वृ॒ज॒थ् स्थ॑वि॒रेभिः॑ सु॒शि॒प्र । अ॒स्मे द॒ध॒द्-वृ॑ष॒णꣳ शु॑ष्म॒मिन्द्र॑ ॥  
 इन्द्रः॑ सु॒व॒र्षा ज॒न॒य॒न्न॒हानि॑ ।  
 जि॒गा॒यो॒शि॒ग्भिः॑ पृ॒त॒ना अ॒भि॒श्रीः॑ । 26 (10)

**T.B.2.4.3.7**

प्रारोचयन्मनवे के॒तुम॑हाम् । अवि॑न्दज्ज्योति॑र्-बृ॒हते॑ रणाय ॥  
 अ॒श्विना॑ववसे नि॒ह्वये॑ वाम् । आ नूनं॑ या॒तः सु॒कृताय॑ वि॒प्रा ।  
 प्रा॒तर्यु॒क्तेन॑ सु॒वृता॑ रथे॒न । उ॒पाग॑च्छत-मवसा ऽऽग॑तं नः ॥  
 अ॒विष्टं॑ धी॒ष्वश्वि॑ना न आ॒सु । प्र॒जाव॑द्-रेतो॒ अह्यं॑ नो अस्तु ।  
 आवां॑ तो॒के तनये॑ तू॒तुजानाः॑ । सु॒रत्ना॑सो दे॒ववी॑तिं गमेम ॥ 27 (10)

**T.B.2.4.3.8**

त्वः सोम॑ क्र॒तुभिः॑ सु॒क्रतु॑र्भूः । त्वं दक्षैः॑ सु॒दक्षो॑ वि॒श्ववे॑दाः ।  
 त्वं वृ॑षा वृष॒त्वेभि॑र् महि॒त्वा । द्यु॒म्नेभि॑र्-द्यु॒मन्य॑भवो नृ॒चक्षाः॑ ॥  
 अषा॑ढं यु॒थ्सु॑ पृ॒तना॑सु प॒प्रिम् । सु॒वर्षा॑म॒प्स्वां वृ॒जन॑स्य गो॒पाम् ।  
 भरे॑षुजाः सु॒क्षितिः॑ सु॒श्रव॑सम् । जय॑न्तं त्वामनु॑ मदेम सोम ॥  
 भवा॑ मि॒त्रो न शे॒व्यो घृ॒तासु॑तिः ।  
 वि॒भूत॑द्यु॒म्न ए॒वया॑ उ स॒प्रथाः॑ ॥ 28 (10)

**T.B.2.4.3.9**

अ॒धा ते॑ वि॒ष्णो वि॒दुषा॑चि॒दृध्यः॑ । स्तोमो॑ य॒ज्ञस्य॑ रा॒द्ध्यो ह॒विष्म॑तः ॥  
 यः पू॒र्व्याय॑ वे॒धसे॑ नवी॒यसे॑ । सु॒मज्जा॑नये॒ विष्णा॑वे ददा॑शति ।

यो जा॒तम॒स्य॒ मह॒तो॒ महि॑ ब्र॒वात् । से॒दुः श्र॒वो॒भिर्-यु॒ज्यञ्चि॑-द॒भ्यस॑त् ॥

तमु॑ स्तो॒तारः पू॒र्व्यं य॑था वि॒द ऋ॒तस्य॑ । गर्भ॑ꣳ ह॒विषा॑ पि॒प॒र्त॒न ।

आ॒ऽस्य॑ जा॒नन्तो॑ ना॒म चि॑द्वि॒वक्त॑न ।

बृ॒ह॒त्ते वि॒ष्णो सु॒म॒तिं भ॑जामहे ॥ 29 (10)

#### **T.B.2.4.3.10**

इ॒मा धा॒ना घृ॒तस्नु॑वः । ह॒री इ॒होप॑वक्षतः । इन्द्र॑ꣳ सु॒ख॒तमे॑ रथे ॥

“ए॒ष ब्र॒ह्मा{1}”, प्र ते॑ म॒हे । वि॒दथे॑ शꣳसि॒षꣳ ह॒री ॥

य ऋ॒त्वि॒यः प्र ते॑ व॒न्वे । व॒नुषो॑ ह॒र्य॒तं म॑दम् ।

इन्द्रो॑ ना॒म घृ॒तं न॑ यः । ह॒रिभि॑श्चा॒रु से॑चते ।

श्रु॒तो ग॒ण आ॑ त्वा वि॒शन्तु॑ । 30 (10)

#### **T.B.2.4.3.11**

ह॒रि॒व॒र्ष॒सं गि॑रः ॥ आ॒चर्ष॑णि॒प्रा वृ॑ष॒भो ज॑ना॒नाम् ।

राजा॑ कृ॒ष्टी॒नां पु॑रु॒हूत॑ इन्द्रः । स्तु॒तः श्र॒व॒स्य-न्न॑व॒सोप॑-म॒द्रिक् ।

यु॒क्त्वा ह॒री वृ॑ष॒णा ऽऽया॑ह्य॒र्वाङ् ॥ प्र॑ य॒थ् सि॒न्ध॒वः प्र॑स॒वं य॑दाय॒न् ।

आ॒पः स॒मु॒द्रꣳ र॒त्थ्ये॑व जग्मुः । अ॒तश्चि॒दिन्द्रः॑ स॒द॒सो व॑री॒यान् ।

यदी॒ꣳ सोमः॑ पृ॒णति॑ दु॒ग्धो अ॒ꣳशुः॑ ॥

ह्व॒याम॑सि॒ त्वेन्द्र॑ या॒ह्यर्वा॑ङ् । 31 (10)

**T.B.2.4.3.12**

अ॒रं ते॑ सोम॒स्तनु॑वे॒ भवा॑ति । श॒तक्र॑तो मा॒दय॑स्वा सु॒तेषु॑ ।

प्रा॒स्माꣳ अ॒व पृ॑तनासु॒ प्र यु॑थ्सु ॥ इन्द्रा॑य सोमाः॑ प्र॒दिवो॑ वि॒दानाः॑ ।

ऋ॒भुर्-येभि॑र्-वृष॒पर्वा॑-विहा॒याः । प्र॒यम्य॑माणान् प्रति॒ षूगृ॑भाय ।

इन्द्र॑ पिब॒ वृष॑धूतस्य॒ वृष्णः॑ ॥ अहे॑डमान॒ उप॑याहि॒ यज्ञ॑म् ।

तुभ्यं॑ पवन्त॒ इन्द्र॑वः सु॒तासः॑ ।

गावो॑ न वज्रि॒न्थ् स्व॑मोको॒ अच्छ॑ । 32 (10)

**T.B.2.4.3.13**

इन्द्रा॑गहि प्रथ॒मो य॒ज्ञिया॑नाम् ॥ या ते॑ का॒कुथ् सु॑कृ॒ता या वरि॑ष्ठा ।

यया॑ शश्च॒त्पिब॑सि॒ मध्व॑ ऊ॒र्मिम् । तया॑ पाहि॒ प्र ते॑ अ॒ध्वर्यु॑-र॒स्थात् ।

सं ते॑ वज्रो॑ वर्ततामिन्द्र॒ गव्युः॑ ॥ प्रा॒तर्यु॑जा॒ विबो॑धय ।

अ॒श्विना॑वेह॒ गच्छ॑तम् । अ॒स्य सोम॑स्य पी॒तये॑ ॥

प्रा॒तर्या॑वाणा प्रथ॒मा यज॑ध्वम् । पु॒रा गृ॑द्धा-दर॒रुषः॑ पिबाथः ( ) ।

प्रा॒तर्हि॑ य॒ज्ञम॒श्विना॑ दधा॒ते । प्र॒शꣳस॑न्ति क॒वयः॑ पू॒र्वभा॑जः ॥

प्रा॒तर्य॑ज॒ध्वम॑श्चि॒ना हि॑नोत । न सा॒यम॑स्ति दे॒वया॑ अ॒जुष्ट॑म् ।

उ॒तान्यो॑ अ॒स्मद्-य॑ज॒ते वि॒चायः॑ ।

पूर्वः॑ पूर्वो॑ यज॒मानो॑ वनी॒यान् ॥ 33 (16) (चा - श्रजिद्यो-गच्छतं नो  
- दाशन् - नामा - भिश्रीर् - गमेम - सप्रथा - भजामहे -  
विशन्तु - याह्यर्वाङ् - च्छ - पिबाथः षट्च) (A3)

#### 2.4.4 अनुवाकं 4 – उपहोमाः

##### T.B.2.4.4.1

न॒क्तं जा॒ताऽस्यो॑ष॒धे । रा॒मे कृ॒ष्णे अ॒सिक्नि॑ च । इ॒दं र॑ज॒नि र॑जय ।

कि॒लासं॑ प॒लितं॑ च॒ यत् ॥ कि॒लासं॑ च प॒लितं॑ च ।

नि॒रितो॑ ना॒शया॑ पृषत् । आ नः॒ स्वो अ॑श्नुतां॒ वर्णः॑ ।

परा॑ श्वे॒तानि॑ पातय ॥ अ॒सितं॑ ते नि॒लय॑नम् ।

आ॒स्थान-म॑सितं॒ तव॑ । 34 (10)

##### T.B.2.4.4.2

अ॒सिक्नि॑यस्योष॒धे । नि॒रितो॑ ना॒शया॑ पृषत् ॥ अ॒स्थि॒जस्य॑ कि॒लास॑स्य ।

त॒नूज॑स्य च॒ यत्त्व॑चि । कृ॒त्यया॑ कृ॒तस्य॑ ब्र॒ह्मणा॑ ।

लक्ष्म॑ श्वेत॑मनी॒नश॑म् ॥ सरू॑पा॒ नाम॑ ते मा॒ता ।

सरू॑पो॒ नाम॑ ते पि॒ता । सरू॑पा ऽस्योष॑धे सा ।

सरू॑पमिदं कृ॒धि ॥ 35 (10)

#### **T.B.2.4.4.3**

शुन॑ꣳ हुवे॑म म॒घवा॑नमिन्द्र॑म् । अ॒स्मिन्भ॑रे नृ॒तमं॑ वा॒जसा॑तौ ।

शृ॒ण्वन्त॑-मु॒ग्रमू॑तये॒ सम॑थ्सु । घ्नन्तं॑ वृ॒त्राणि॑ स॒ज्जितं॑ ध॒नाना॑म् ॥

धू॒नुथ॑ द्यां पर्व॑तान्दाशु॒षे वसु॑ । नि वो॒ वना॑ जिह॒ते या॑मनो भि॒या ।

को॒पय॑थ पृथि॒वीं पृ॑श्निमा॒तरः॑ । यु॒धे यदु॑ग्राः पृष॒ती-र॑युग्ध्वम् ॥

प्रवे॑पयन्ति पर्व॑तान् । वि॒विञ्च॑न्ति वन॒स्पती॑न् । 36 (10)

#### **T.B.2.4.4.4**

प्रो॒वार॑त मरु॒तो दु॒र्मदा॑ इव । दे॒वा॒सः॒ सर्व॑या वि॒शा ॥

पु॒रु॒त्रा हि॑ स॒दृङ्ङु॑सि । वि॒शो वि॒श्वा अनु॑ प्र॒भु ।

स॒मथ्सु॑ त्वा ह॒वाम॑हे ॥ स॒मथ्स॑व॒ग्नि-म॑वसे । वा॒जय॑न्तो ह॒वाम॑हे ।

वा॒जे॒षु चि॒त्रा॒धस॑म् ॥ सङ्ग॑च्छ॒दध्व॑ꣳ स॒म्वद॑ध्वम् ।

सं वो॒ मना॑ꣳसि जा॒नता॑म् । 37 (10)

**T.B.2.4.4.5**

दे॒वा भा॒गं य॑था पू॒र्वे । स॒ज्ज॒ज्ञा॒ना॒ना उ॒पा॒स॒त ॥  
 स॒मा॒नो म॒न्त्रः स॒मि॒तिः स॒मा॒नी । स॒मा॒नं म॒नः स॒ह चि॒त्त॒मैषा॑म् ।  
 स॒मा॒नं के॒तो अ॒भि-स॒ञ्ज॒र॒भ॒ध्वम् । सं॒ज्ञा॒ने॒न वो ह॒विषा॑ य॒जामः॑ ॥  
 स॒मा॒नी व आ॒कू॒तिः । स॒मा॒ना हृ॒द॒या॒नि वः । स॒मा॒न॒म॒स्तु वो॒ म॒नः ।  
 यथा॑ वः सु॒स॒हा॒स॒ति ॥ 38 (10)

**T.B.2.4.4.6**

सं॒ज्ञा॒नं नः॒ स्वैः । सं॒ज्ञा॒न॒म॒र॒णैः । सं॒ज्ञा॒न॒म॒श्वि॒ना यु॒वम् ।  
 इ॒हा॒स्मा॒सु नि॒य॒च्छ॒तम् ॥ सं॒ज्ञा॒नं मे॒ बृ॒ह॒स्प॒तिः ।  
 सं॒ज्ञा॒नं स॒वि॒ता क॑रत् । सं॒ज्ञा॒न॒म॒श्वि॒ना यु॒वम् ।  
 इ॒ह म॒ह्यं नि॒य॒च्छ॒तम् ॥ उ॒प॒च्छा॒या॒मि॒व घृ॒णैः ।  
 अ॒ग॒न्म श॒र्म ते व॒यम् । 39 (10)

**T.B.2.4.4.7**

अ॒ग्ने हि॒र॒ण्य॒स॒न्दृ॒शः ॥ अ॒द॒ब्धे॒भिः स॒वि॒तः पा॒यु॒भि॒ष्ट्व॒म् ।  
 शि॒वे॒भि॒र॒द्य परि॑पाहि नो ग॒यम् । हि॒र॒ण्य॒जि॒ह्वः सु॒वि॒ता॒य न॒व्य॒से ।  
 र॒क्षा मा॒कि॒र्नो अ॒घ॒श॒स ई॒श॒त ॥ म॒दे॒म॒दे हि नो॑ द॒दुः ।

यू॒था ग॒वा-मृ॒जु॒क्र॒तुः । सङ्ग॑भा॒य पु॒रू श॒ता । उ॒भ॒या ह॒स्त्या व॒सु ।

शि॒शी॒हि रा॒य आ॒भर ॥ 40 (10)

**T.B.2.4.4.8**

शि॒प्रिन् वा॒जानां॑ प॒ते । श॒ची॒व॒स्तव॑ द॒स॒ना ॥ आ तू न॑ इन्द्र॒ भाज॑य ।

गो॒ष्वश्वे॑षु शु॒भ्रुषु॑ । स॒हस्रे॑षु तु॒वीम॑घ ॥ यद्-दे॒वा दे॒व हे॒डन॑म् ।

दे॒वास॑श्च॒कृ॒मा व॒यम् । आ॒दि॒त्या॒स्तस्मा॑न्मा यू॒यम् ।

ऋ॒तस्य॑र्तेन मुञ्चत ॥ ऋ॒तस्य॑र्ते-ना॒दि॒त्याः । 41 (10)

**T.B.2.4.4.9**

यज॑त्रा मुञ्च॒तेह॑ मा ॥ य॒ज्ञैर्वो॑ य॒ज्ञवा॑हसः । आ॒शि॒क्षन्तो॑ न शो॒किम॑ ॥

मे॒दस्व॑ता यज॒मानाः॑ । सु॒चाऽऽज्ये॑न जु॒ह्वतः॑ । अ॒का॒मा वो॑ वि॒श्वे दे॒वाः ।

शि॒क्षन्तो॑ नो॒प शो॒किम॑ ॥ य॒दि दि॒वा य॒दि न॑क्तम् । ए॒न ए॒नस्यो॑ऽक॒रत् ।

भू॒तं मा॒ तस्मा॑द्भ॒व्यं च॑ ( ) । 42 (10)

**T.B.2.4.4.10**

द्रु॒प॒दा॒दिव॑ मुञ्चतु ॥ द्रु॒प॒दा॒दि॒वेन्-मु॒मु॒चा॒नः ।

स्वि॒न्नः स्ना॒त्वी म॒ला॒दिव॑ । पू॒तं प॒वि॒त्रे॒णे॒वाज्य॑म् ॥

वि॒श्वे मु॒ञ्चन्तु॑ मै॒नसः॑ ॥ उ॒द्वयं॑ तम॒स॒स्परि॑ ।

पश्यन्तो ज्योतिरुत्तरम् । देवं देवत्रा सूर्यम् ।

अगन्म ज्योतिरुत्तमम् ॥ 43 (9)

(तव - कृधि - वनस्पती - ज्ञानता - मसति - वयं - भरा -  
दित्या - श्च - +नव च) (A4)

#### 2.4.5 अनुवाकं 5 – उपहोमाः

##### T.B.2.4.5.1

वृषा सो अ॒शुः पवते ह॒विष्मान्थ्-सोमः ।

इन्द्रस्य भा॒ग ऋ॒तयुः श॒तायुः । स मा वृषा॑णं वृष॑भं कृ॒णोतु ।

प्रि॒यं वि॒शा॒ सर्व॑वीर॒ सु॒वीर॑म् ॥ कस्य॒ वृषा॑ सु॒ते सचा॑ ॥

नियु॒त्वान् वृष॑भो रणत् । वृ॒त्रहा॑ सोम॒पीतये॑ ॥

यस्ते॑ शृङ्ग॒ वृषो॑ नपात् । प्रण॑पात् कुण्ड॒पाय्यः॑ ।

न्यस्मि॑न्द॒ध्र आ॑ मनः ॥ 44 (10)

##### T.B.2.4.5.2

त॒ स॒द्धी॒ची-रू॒तयो॑ वृ॒ष्णि॒यानि॑ । पौ॒स्या॒नि नियु॑तः स॒श्रु॒रिन्द्र॑म् ।

स॒मु॒द्रं न॑ सि॒न्धव॑ उ॒क्थ॑शु॒ष्माः । उ॒रु॒व्यच॑सं गि॒र आ॑वि॒शन्ति॑ ॥

इन्द्रा॑य गि॒रो अ॒नि॒शित॑सर्गाः । अ॒पः प्रै॑र॒यन्थ् स॑गरस्य बु॒द्ध्नात् ।

यो अक्षेणेव चक्रिया शचीभिः । विष्वक्तस्तम्भ पृथिवीमुत द्याम् ॥

अक्षोदयच्छवसा क्षाम बुद्धनम् ।

वार्णवात-स्तविषीभि-रिन्द्रः । 45 (10)

**T.B.2.4.5.3**

दृढान्यौघ्ना-दुशमान ओजः । अवाभिनत् ककुभः पर्वतानाम् ॥

आ नो अग्ने सुकेतुना । रयिं विश्वायुपोषसम् ।

मार्डीकं धेहि जीवसे ॥ त्वञ् सोम महे भगम् । त्वं यूँन ऋतायते ।

दक्षं दधासि जीवसे ॥ रथं यूँज्जते मरुतः शुभे सुगम् ।

सूरो न मित्रावरुणा गविष्टिषु । 46 (10)

**T.B.2.4.5.4**

रजाञ्सि चित्रा वि चरन्ति तन्यवः । दिवः सम्राजा पयसा न उक्षतम् ॥

वाचञ् सु मित्रावरुणाविरावतीम् । पर्जन्यश्चित्रां वदति त्विषीमतीम् ।

अभ्रा वसत मरुतः सु मायया । द्यां वर्षयत-मरुणा-मरेपसम् ॥

अयुक्त सप्त शुन्ध्युवः । सूरो रथस्य नप्त्रियः ।

ताभिर्याति स्वयुक्तिभिः ॥ वहिष्ठेभिर्विहरन् यासि तन्तुम् । 47 (10)

**T.B.2.4.5.5**

अ॒व॒व्य॒य॒न्न॒सि॒तं दे॒व व॒स्वः । द॒वि॒ध्व॒तो र॒श्म॒यः सूर्य॑स्य ।

च॒र्म॒वा॒वा॒धु॒स्त॒मो अ॒प्स्व॒न्तः ॥ प॒र्ज॒न्या॒य प्र॒गा॒यत ।

दि॒व॒स्पु॒त्रा॒य मी॒ढु॒षे ॥ स नो॑ य॒व॒स॒मि॒च्छ॒तु ॥

अ॒च्छा व॒द त॒व॒सं गी॒र्भि॒रा॒भिः ।

स्तु॒हि प॒र्ज॒न्यं न॒म॒सा वि॒वास । क॒नि॒क्र॒दद्-वृ॒ष॒भो जी॒र॒दा॒नुः ।

रे॒तो द॒धा॒त्वो॒ष॒धी॒षु गर्भ॑म् ॥ 48 (10)

**T.B.2.4.5.6**

यो गर्भ॑मोष॒धी॒नाम् । ग॒वां कृ॒णो॒त्य॒र्व॒ताम् । प॒र्ज॒न्यः पु॒रु॒षी॒णाम् ॥

तस्मा॑ इ॒दा॒स्ये ह॒विः । जु॒हो॒ता म॒धु॒म॒त्त॒मम् ।

इ॒डां नः॑ स॒म्य॑तं॒ कर॑त् ॥ ति॒स्रो य॒द॒ग्ने श॒र॒द॒स्त्वा॒मि॒त् ।

शु॒चिं घृ॒तेन॑ शु॒चयः॑ स॒पर्य॑न् । ना॒मा॒नि चि॒द॒धि॒रे य॒ज्ञि॒या॒नि ।

अ॒सू॒द॒य॒न्त त॒नु॒वः सु॒जा॒ताः ॥ 49 (10)

**T.B.2.4.5.7**

इ॒न्द्रश्च॑ नः शु॒ना॒सी॒रौ । इ॒मं य॒ज्ञं मि॒मि॒क्ष॒तम् । गर्भ॑ ध॒त्त॒ स्व॒स्तये॑ ॥

य॒यो॒रि॒दं वि॒श्वं भु॒वन॑-मा॒वि॒वेश॑ । य॒यो॒रा॒न॒न्दो नि॒हि॒तो म॒हश्च॑ ।

शुनासीरावृतुभिः सम्विदानौ । इन्द्रवन्तौ हविरिदं जुषेथाम् ॥  
 आ घा ये अग्निमिन्धते । स्तृणन्ति बर्हिः हिरानुषक् ।  
 येषामिन्द्रो युवा सखा ( ) ॥ अग्न इन्द्रश्च मेदिना ॥  
 हथो वृत्राण्यप्रति । युवः हि वृत्रहन्तमा ॥  
 याभ्याः सुव-रजयन्नग्र एव । यावातस्थतुर्-भुवनस्य मद्ध्ये ।  
 प्रचर्षणी वृषणा वज्रबाहू ।  
 अग्नी इन्द्रा वृत्रहणा हुवे वाम् ॥ 50 (17)

(मन - इन्द्रो - गविष्टिषु - तन्तुं - गर्भः - सुजाताः - सखा  
 सप्त च) (A5)

#### 2.4.6 अनुवाकं 6 – उपहोमाः

##### T.B.2.4.6.1

उत नः प्रिया प्रियासु । सप्तस्वसा सुजुष्टा । सरस्वती स्तोम्या ऽभूत् ॥  
 इमा जुह्वाना युष्मदा नमोभिः । प्रति स्तोमः सरस्वति जुषस्व ।  
 तव शर्मन् प्रियतमे दधानाः । उपस्थेयाम शरणं न वृक्षम् ॥

त्रीणि॑ प॒दा वि॒च॒क्र॒मे । वि॒ष्णु॒र्गो॒पा अ॒दा॒भ्यः॑ ।

ततो॑ ध॒र्मा॒णि धा॒रय॑न् ॥ 51 (10)

#### **T.B.2.4.6.2**

तद॑स्य प्रि॒यम॒भि पा॒थो अ॒श्याम् । नरो॑ यत्र दे॒वय॒वो म॑दन्ति ।

उ॒रु॒क्र॒मस्य॑ स हि ब॒न्धुरि॑त्था । वि॒ष्णोः॑ प॒दे प॒रमे॑ म॒ध्व उ॒थ्सः॑ ॥

क्र॒त्वा दा॑ अ॒स्थु श्रेष्ठः॑ । अ॒द्य त्वा व॒न्वन्थ् सु॒रे॒क्णाः॑ ॥

म॒र्त आ॒नाश॑ सु॒वृ॒क्तिम् ॥ इ॒मा ब्र॑ह्म ब्र॒ह्मवा॑ह ।

प्रि॒या त आ॒ ब॒र्हिः सी॑द । वी॒हि सू॒र पु॒रो॒डाश॑म् ॥ 52 (10)

#### **T.B.2.4.6.3**

उप॑ नः सू॒नवो॑ गि॒रः । शृ॒ण्वन्त्व॑मृत॒स्य ये॑ । सु॒मृ॒डीका॑ भ॒वन्तु॑ नः ॥

अ॒द्या नो॑ दे॒व स॒वितः॑ । प्र॒जाव॑थ् सा॒वीः सौ॑भ॒गम् ।

प॒रा दुः॒ष्व॒ज्नि॒य सु॒व ॥ वि॒श्वानि॑ दे॒व स॒वितः॑ । दु॒रि॒तानि॑ प॒रासु॒व ।

यद्-भ॒द्रं तन्म॑ आ॒सुव॑ ॥ शु॒चि-म॒र्कैर्-बृ॒हस्प॑तिम् ॥ 53 (10)

#### **T.B.2.4.6.4**

अ॒ध्व॒रेषु॑ नम॒स्यत॑ । अ॒ना॒म्यो॒ज आ॑च॒के ॥

या धा॒रय॑न्त दे॒वा सु॒दक्षा॑ दक्ष॒पिता॑रा । अ॒सु॒र्या॒य प्र॑म॒हसा॑ ॥

स इ॒क्षेति॑ सु॒धित॑ ओ॒कसि॑ स्वे । तस्मा॑ इ॒डा पि॒न्वते॑ वि॒श्वदानी॑ ॥  
तस्मै॑ वि॒शः स्व॒यमे॒वान॑मन्ति । यस्मिन् ब्र॒ह्मा रा॒जनि॑ पूर्॒व एति॑ ॥  
सकू॑तिमिन्द्र॒ सच्यु॑तिम् । सच्यु॑तिं ज॒घन॑च्युतिम् । 54 (10)

**T.B.2.4.6.5**

कना॑त्का॒भां न आ॑भर । प्र॒यप्स्य॑न्नि॒व स॒क्थ्यौ ॥  
वि॒न इन्द्र॑ मृ॒धो जहि॑ । कनी॑खुनदिव सा॒पय॑न् ।  
अ॒भि नः सु॑ष्टुतिं नय ॥ प्र॒जाप॑तिः स्त्रि॒यां य॑शः ।  
मु॒ष्कयो॑रदधा॒त् सप॑म् । का॒मस्य॑ तृ॒प्तिमा॑न॒न्दम् ।  
तस्या॑ग्ने भा॒जये॑ह मा ॥ मो॒दः प्र॒मोद॑ आ॒नन्दः॑ । 55 (10)

**T.B.2.4.6.6**

मु॒ष्कयो॑र्नि॒हितः स॑पः । सृ॒त्वेव॑ का॒मस्य॑ तृ॒प्याणि॑ ।  
दक्षि॑णानां प्र॒तिग्र॑हे ॥ म॒नस॑श्चित्त॒माकू॑तिम् । वा॒चः स॒त्य-म॑शीमहि ।  
प॒शूनाञ् रूप॑मन्नस्य । य॒शः श्रीः॑ श्रय॒तां मयि॑ ॥  
यथा॑ ऽह॒मस्या॑ अतृ॒पञ् स्त्रियै॑ पु॒मान् ।  
यथा॑ स्त्री तृ॒प्यति॑ पु॒ंसि प्रि॒ये प्रि॒या । ए॒वं भग॑स्य तृ॒प्याणि॑ । 56 (10)

**T.B.2.4.6.7**

य॒ज्ञस्य॑ का॒म्यः॑ प्रि॒यः ॥ द॒दामी॑त्य॒ग्निर्व॑दति । तथेति॑ वा॒युरा॑ह॒ तत् ।  
हन्ते॑ति स॒त्यं च॒न्द्रमाः॑ ॥ आ॒दित्यः॑ स॒त्यमो॑मिति ॥  
आप॑स्तथ्-स॒त्यमा॑भरन् । यशो॑ य॒ज्ञस्य॑ दक्षि॒णाम् ।  
अ॒सौ मे॒ कामः॑ समृ॒द्ध्यता॑म् ॥ न हि स्प॒शम॑विदन्-न॒न्यम॑स्मात् ।  
वैश्वा॑नरात् पु॒रए॒तार-म॑ग्नेः । 57 (10)

**T.B.2.4.6.8**

अथे॑-ममन्थन्नमृ॒त-म॑मू॒राः । वैश्वा॑नरं क्षे॒त्रजि॑त्याय दे॒वाः ॥  
येषा॑मिमे पूर्वे॑ अ॒र्मास॑ आसन् । अ॒यूपाः॑ स॒द्य वि॑भृता पु॒रूणि॑ ।  
वैश्वा॑नर त्वया॒ ते नु॒त्ताः । पृ॒थि॒वी-म॒न्या-म॒भित॑स्थुर्-जना॑सः ॥  
पृ॒थि॒वीं मा॒तरं॑ म॒हीम् । अ॒न्तरि॑क्ष-मु॒पब्रु॑वे । बृ॒हती॑मू॒तये॑ दि॒वम् ॥  
विश्वं॑ बिभर्ति पृ॒थि॒वी । 58 (10)

**T.B.2.4.6.9**

अ॒न्तरि॑क्षं वि॒पप्र॑थे । दु॒हे द्यौर् बृ॒हती॑ प॒यः ॥  
न ता॑ न॒शन्ति॑ न द॒भाति॑ तस्करः । नैना॑ अ॒मित्रो॑ व्यथि॒राद॑धर्षति ।  
दे॒वाश्च॑ या॒भिर् य॑ज॒ते द॑दाति च ।

ज्यो॒गिता॒भिः स॒चते॒ गो॒पतिः॒ सह ॥

न ता अ॒र्वा रे॒णुक॑का॒टो अ॒श्नु॒ते ।

न स॒॒स्कृ॒तत्र॑-मु॒पय॑न्ति ता अ॒भि ।

उ॒रुगा॒यम॑भयं तस्य ता अनु ।

गा॒वो म॒र्त्यस्य॑ वि॒चर॑न्ति यज्व॒नः ॥ 59 (10)

**T.B.2.4.6.10**

रा॒त्री व्य॑ख्यदा॒यती॑ । पु॒रु॒त्रा दे॒व्यक्ष॑भिः । वि॒श्वा अ॒धि श्रि॒योऽधि॑त ॥

उप॑ ते गा इ॒वाकर॑म् । वृ॒णीष्व॑ दु॒हितर् दि॒वः ।

रा॒त्री स्तो॒मं न जि॒ग्युषी॑ ॥ दे॒वीं वा॑चम॒जन॑यन्त दे॒वाः ।

तां वि॒श्वरू॑पाः प॒शवो॑ वदन्ति । सा नो म॒न्द्रेष॑मूर्जं दु॒हाना॑ ।

धे॒नुर्वा॒गस्मानु॑प सु॒ष्टुतै॑तु ॥ 60 (10)

**T.B.2.4.6.11**

यद् वा॒ग्वद॑न्त्य-वि॒चेत॑नानि । रा॒ष्ट्री दे॒वानां॑ नि॒षसा॑द म॒न्द्रा ।

चत॑स्र ऊ॒र्जं दु॒दुहे॑ पया॒सि । क्व स्वि॑दस्याः प॒रमं॑ ज॒गाम ॥

गौरी॑ मि॒माय॑ स॒लिलानि॑ तक्ष॒ती । ए॒कप॑दी द्वि॒पदी॑ सा चतु॑ष्पदी ।

अ॒ष्टाप॑दी न॒वप॑दी ब॒भूवु॑षी । स॒हस्रा॑क्षरा प॒रमे॑ व्यो॒मन् ॥

तस्या॑ समु॒द्रा अधि॑ वि क्षरन्ति ।

तेन॑ जीवन्ति प्रदि॒शश्च॑तस्रः । 61 (10)

**T.B.2.4.6.12**

ततः॑ क्षरत्यक्षरम् । तद्-विश्व-मुपजीवति ॥

इन्द्रा॑ सूरा॑ जनयन्-विश्वकर्मा ।

मरुत्वा॑ अस्तु गणवान्थ-सजातवान् ।

अस्य॑ स्नुषा-श्वशुरस्य॑ प्रशिष्टिम् । सपत्ना॑ वाचं मनसा॑ उपासताम् ॥

इन्द्रः॑ सूरौ॑ अतरद्-रजा॑सि । स्नुषा॑ सपत्नाः॑ श्वशुरोऽयमस्तु ।

अय॑ शत्रूञ्जयतु॑ जर्हृषाणः । अयं॑ वाजं॑ जयतु॑ वाजसातौ ( ) ॥

अग्निः॑ क्षत्रभृ-दनिभृष्ट-मोजः॑ । सहस्रियो॑ दीप्यता-मप्रयुच्छन् ।

विभ्राजमानः॑ समिधान॑ उग्रः । आऽन्तरिक्ष-मरुह-दगन् द्याम् ॥ 62

(14)

(धारयन् - पुरोडाशं - बृहस्पतिं - जघनच्युति - मानन्दो -

भगस्य तृप्या - ण्यग्नेः - पृथिवी - यज्वन - एतु -

प्रदिशश्चतस्रो - वाजसातौ चत्वारि च) (A6)

**2.4.7 अनुवाकं 7 – उपहोमाः**

**T.B.2.4.7.1**

वृ॒षा ऽस्य॑ शु॒र्-वृ॒षभा॑य गृ॒ह्यसे॑ । वृ॒षाऽय॑मु॒ग्रो नृ॒चक्ष॑से ।  
दि॒व्यः क॑र्म॒ण्यो हि॒तो बृ॒हन्ना॑म । वृ॒षभ॑स्य॒ या क॒कुत् ॥  
वि॒षूवा॑न् वि॒ष्णो भ॑वतु । अ॒यं यो॑ मा॒मको॑ वृ॒षा ।  
अथो॑ इन्द्र॑ इव॒ देवे॑भ्यः । वि॒ब्रवी॑तु जने॑भ्यः ॥  
आयु॑ष्मन्तं व॑र्चस्वन्तम् ।  
अथो॑ अधि॒पतिं॑ वि॒शाम् । 63 (10)

**T.B.2.4.7.2**

अ॒स्याः पृ॒थि॒व्या अ॑द्ध्यक्षम् । इ॒ममि॑न्द्र वृ॒षभं॑ कृ॒णु ॥  
यः सु॒शृङ्गः॑ सुवृ॒षभः॑ । क॒ल्याणो॑ द्रो॒ण आ॑हितः ।  
का॒र्षी॑वलप्रगाणेन । वृ॒षभे॑ण यजामहे ॥ वृ॒षभे॑ण यज॑मानाः ।  
अ॒क्रूरे॑णेव सर्पि॒षा ।  
मृ॒धश्च॑ सर्वा॒ इन्द्रे॑ण । पृ॒तना॑श्च जयामसि ॥ 64 (10)

**T.B.2.4.7.3**

यस्यायमृषभो हविः । इन्द्राय परिणीयते ॥ जयाति शत्रुमायन्तम् ।  
 अथो हन्ति पृतन्यतः ॥ नृणामहं प्रणीरसत् । अग्र उद्भिन्दता-मसत् ॥  
 इन्द्र शुष्मं तनुवा मेरयस्व । नीचा विश्वा अभितिष्ठाभिमातीः ।  
 नि शृणीह्याबाधं यो नो अस्ति ।

उरुं नो लोकं कृणुहि जीरदानो ॥ 65 (10)

**T.B.2.4.7.4**

प्रेह्यभिप्रेहि प्रभरा सहस्व । मा विवेनो वि शृणुष्व जनेषु ।  
 उदीडितो वृषभ तिष्ठ शुष्मैः । इन्द्र शत्रून् पुरो अस्माकं युद्ध्य ॥  
 अग्ने जेता त्वं जय । शत्रून्थ सहस ओजसा ।  
 वि शत्रून् विमृधो नुद ॥ एतं ते स्तोमं तुविजात विप्रः ।  
 रथं न धीरः स्वपा अतक्षम् ।  
 यदीदग्ने प्रति त्वं देव हर्याः ॥ 66 (10)

**T.B.2.4.7.5**

सुवर्वतीरप एना जयेम ॥ यो घृतेनाभिमानितः ।  
 इन्द्र जैत्राय जज्ञिषे । स नः सङ्कासु पारय । पृतनासाह्येषु च ॥

इन्द्रो जिगाय पृथिवीम् । अन्तरिक्षं सुवर्महत् ।  
वृत्रहा पुरुचेतनः ॥ इन्द्रो जिगाय सहसा सहांसि ।  
इन्द्रो जिगाय पृतनानि विश्वा ॥ 67 (10)

**T.B.2.4.7.6**

इन्द्रो जातो वि पुरो रुरोज । स नः परस्पा वरिवः कृणोतु ॥  
अयं कृत्नु-रगृभीतः । विश्वजि-दुद्भिदिथ्-सोमः ।  
ऋषिर् विप्रः काव्येन ॥ वायुरग्रेगा यज्ञप्रीः । साकं गन्मनसा यज्ञम् ।  
शिवो नियुद्धिः शिवाभिः ॥ वायो शुक्रो अयामि ते ।  
मद्ध्वो अग्रं दिविष्टिषु । 68 (10)

**T.B.2.4.7.7**

आयाहि सोमपीतये । स्वारुहो देव नियुत्वता ॥  
इममिन्द्र वर्द्धय क्षत्रियाणाम् । अयं विशां विस्पतिरस्तु राजा ॥  
अस्मा इन्द्र महि वर्चांसि धेहि । अवर्चसं कृणुहि शत्रुमस्य ॥  
इममाभज ग्रामे अश्वेषु गोषु । निरमुं भज योऽमित्रो अस्य ।  
वर्ष्मन् क्षत्रस्य ककुभि श्रयस्व ।  
ततो न उग्रो विभजा वसूनि ॥ 69(10)

**T.B.2.4.7.8**

अ॒स्मे द्या॒वापृ॑थि॒वी भू॑रि॒ वाम॑म् । सं दु॒हाथां॑ घ॒र्मदु॑घे॒व धे॒नुः ।  
 अ॒यꣳ राजा॑ प्रि॒य इन्द्र॑स्य भूयात् । प्रि॒यो गवा॑मोष॒धीना॑-मु॒तापाम् ॥  
 यु॒नज्मि॑ त उत्तरा॒वन्त॑-मिन्द्र॒म् । येन॑ जया॒सि न॒ परा॒जया॑सै ।  
 स त्वा ऽक॑रेकवृषभꣳ स्वा॒नाम् । अथो॑ राजन्नु॒त्तमं॑ मा॒नवा॑नाम् ॥  
 उत्तर॑स्त्व-म॒धरे॑ ते स॒पत्नाः॑ । एक॑वृषा इन्द्र॒सखा॑ जिगी॒वान् । 70 (10)

**T.B.2.4.7.9**

विश्वा॑ आ॒शाः पृ॑तनाः स॒ज्जय॑ज्जयन् । अ॒भिति॑ष्ठ शत्रू॒यतः॑ स॒हस्व ॥  
 तुभ्यं॑ भ॒रन्ति॑ क्षि॒तयो॑ यविष्ठ । ब॒लिम॑ग्ने अ॒न्ति त॒ ओत॑ दू॒रात् ।  
 आ भ॑न्दिष्ठस्य सु॒मतिं॑ चि॒किद्धि॑ । बृ॒हत्ते॑ अ॒ग्ने म॒हि शर्म॑ भ॒द्रम् ॥  
 यो दे॒ह्यो अ॒नम॑यद् वध॒स्नैः । यो अ॒र्यप॑त्नी-रुष॒सश्च॑का॒र ।  
 स नि॒रुद्ध्या॑ नहुषो॒ यहो॑ अ॒ग्निः ।  
 वि॒शश्च॑क्रे ब॒लिह॑तः स॒होभिः॑ ॥ 71 (10)

**T.B.2.4.7.10**

प्र स॒द्यो अ॒ग्ने अत्यै॑ष्य॒न्यान् । आ॒विर्य॑स्मै चा॒रुत॑रो ब॒भूथ॑ ।  
 ई॒डेन्यो॑ व॒पुष्यो॑ वि॒भावा॑ । प्रि॒यो वि॒शाम॑ति॒थिर्-मा॑नुषी॒णाम् ॥

ब्र॒ह्म ज्ये॑ष्ठा वी॒र्या॑ संभृ॒तानि॑ । ब्र॒ह्मा॒ग्रे ज्ये॑ष्ठं दि॒वमा॑त॒तान॑ ।  
 ऋ॒तस्य॑ ब्र॒ह्म प्र॑थ॒मोत॑ ज॒ज्ञे । तेना॑र्हति ब्र॒ह्मणा॑ स्पर्द॑धितुं कः ॥  
 ब्र॒ह्म स्रु॑चो घृ॒तवतीः॑ । ब्र॒ह्मणा॑ स्वर॒वो मि॒ताः । 72 (10)

**T.B.2.4.7.11**

ब्र॒ह्म य॒ज्ञस्य॑ तन्त॒वः । ऋ॒त्विजो॑ ये ह॒विष्कृ॑तः ॥  
 शृ॒ङ्गाणी॑वेच्छृ॒ङ्गिणा॑ संद॒दृश्रि॑रे । च॒षाल॑वन्तः स्वर॒वः पृ॑थि॒व्याम् ।  
 ते दे॒वासः॑ स्वर॒व-स्त॑स्थि॒वाँसः॑ । नमः॑ स॒खिभ्यः॑ स॒न्नान्मा॑ ऽवगात ॥  
 अ॒भिभू॑-र॒ग्नि-र॑तर॒द्-रजा॑ँसि । स्पृ॒धो वि॒हत्य॑ पृ॒तना॑ अ॒भि॒श्रीः ।  
 जु॒षा॒णो म॒ आ॑हु॒तिं मा॑ म॒हिष्ट॑ । ह॒त्वा स॒प॒त्नान्॑ वरि॒वस्कर॑न्नः ( ) ॥  
 ई॒शानं॑ त्वा भु॒वनाना॑-म॒भि॒श्रिय॑म् । स्तौ॒म्य॒ग्न उ॒रु॒कृत॑ँ सु॒वीर॑म् ।  
 ह॒विर् जु॒षा॒णः स॒प॒त्नाँ अ॒भि॒भूर॑सि ।  
 ज॒हि श॒त्रूँर॑प॒ मृ॒धो नु॑दस्व ॥ 73 (14)

(वि॒शां - ज॑याम॒सि - जी॑रदा॒नो - ह॒र्या - वि॒श्वा - दि॒वि॒ष्टिषु॑ -  
 वसू॑नि - जि॒गी॒वान्थ् - स॒हो॒भिर् - मि॒ता - न॑ श्र॒त्वारि॑ च) (A7)

**2.4.8 अनुवाकं 8 – उपहोमाः**

**T.B.2.4.8.1**

स प्र॒लव॒न्नवी॒यसा॑ । अ॒ग्ने॑ द्यु॒म्नेन॑ स॒म्य॑ता । बृ॒हत् त॑तन्थ भा॒नुना॑ ॥  
न॒वं नु॑ स्तोम॒मग्न॑ये । दि॒वः श्ये॒नाय॑ जी॒जन॑म् ।  
वसोः॑ कु॒विद्व॑नाति॒ नः ॥ स्वा॒रु॒हा यस्य॑ श्रि॒यो दृ॒शे ।  
रयि॒र्वीर॑वतो॒ यथा॑ ।

अ॒ग्रे य॒ज्ञस्य॑ चे॒ततः॑ ॥ अ॒दाभ्यः॑ पु॒र॒एता॑ । 74 (10)

**T.B.2.4.8.2**

अ॒ग्निर्वि॒शां मा॑नु॒षीणा॑म् । तू॒र्णी र॑थः स॒दा न॒वः ॥  
न॒वꣳ सो॑मा॒य वा॒जिने॑ । आ॒ज्यं प॑यसोऽज॒नि ।  
जुष्टꣳ शु॒चित॑मं व॒सु ॥ न॒वꣳ सो॑म जु॒षस्व॑ नः ।  
पी॒यूष॑स्ये॒ह तृ॑ष्णुहि । यस्ते॑ भा॒ग ऋ॒ताव॑यम् ॥  
न॒वस्य॑ सोम ते व॒यम् । आ सु॑म॒तिं वृ॑णीमहे । 75 (10)

**T.B.2.4.8.3**

स नो॑ रा॒स्व स॒हस्रि॑णः ॥ न॒वꣳ ह॒विर्जु॑षस्व नः ।  
ऋ॒तुभिः॑ सोम॒ भूत॑मम् । तद॒ङ्गं प्र॑ति॒हर्य॑ नः ।

राजन्त् सोम स्वस्तये ॥ नव॑ स्तोमं नव॑ हविः ।  
 इन्द्रा॑ग्निभ्यां निवे॑दय । तज्जु॑षेता॒ सचै॑तसा ॥  
 शुचिं॑ नु स्तोमं नवजा॑तमद्य । इन्द्रा॑ग्नी वृत्रह॑णा जुषे॑थाम् । 76 (10)

**T.B.2.4.8.4**

उभा॑ हि वा॒ सु॒हवा॑ जोह॑वीमि । ता वाज॑ सद्य उ॑शते धे॑ष्टा ॥  
 अ॒ग्निरिन्द्रो॑ नवस्य नः । अ॒स्य ह॒व्यस्य॑ तृप्यताम् ।  
 इ॒ह दे॒वौ स॒हस्रि॑णौ ॥ य॒ज्ञं न॒ आ हि ग॑च्छताम् ।  
 वसु॑मन्त॒ सुव॑र्विदम् । अ॒स्य ह॒व्यस्य॑ तृप्यताम् ।  
 अ॒ग्निरिन्द्रो॑ नवस्य नः ॥  
 विश्वा॑न् दे॒वा स्त॑र्पयत । 77 (10)

**T.B.2.4.8.5**

ह॒विषो॑ऽस्य नवस्य नः । सु॒व॒र्विदो॑ हि ज॒ज्ञिरे॑ ॥  
 ए॒दं ब॒र्हिः सु॒ष्ट्री॑मा नवे॑न । अ॒यं य॒ज्ञो यज॑मानस्य भा॒गः ।  
 अ॒यं ब॒भूव॑ भु॒वनस्य॑ गर्भः । वि॒श्वे दे॒वा इ॒दम॒द्याग॑मिष्ठाः ॥  
 इ॒मे नु॑ द्यावापृ॒थि॒वी स॒मीची॑ । त॒न्वा॒ने य॒ज्ञं पु॒रुपे॑शसं धि॒या ।

आ॒ऽस्मै॑ पृ॒णीतां॑ भु॒वनानि॑ वि॒श्वा ।

प्र॒जां पु॒ष्टिम॑मृतं॒ नवे॑न ॥ 78 (10)

**T.B.2.4.8.6**

इ॒मे धे॒नू अ॒मृतं॑ ँ॒ये दु॒हाते॑ । प॒यस्व॑-त्यु॒त्तरा॑मे॒तु पु॒ष्टिः ।

इ॒मं ँ॒यज्ञं॑ जु॒षमा॑णे॒ नवे॑न । स॒मीची॑ द्या॒वापृ॑थि॒वी घृ॒ताची॑ ॥

य॒विष्ठो॑ ह॒व्यवा॑हनः । चि॒त्रभा॑नुर्-घृ॒तासु॑तिः । न॒वजा॑तो वि॒रोच॑से ।

अ॒ग्ने त॑त्ते म॒हित्व॑नम् ॥

त्व॒मग्ने॑ दे॒वता॑भ्यः । भा॒गे दे॒व न॑ मी॒यसे॑ । 79 (10)

**T.B.2.4.8.7**

स ए॒ना वि॒द्वान्. य॑क्ष्य॒सि । न॒व॒॒ स्तो॑मं जु॒षस्व॑ नः ॥

अ॒ग्निः प्र॑थ॒मः प्रा॑ज्ञा॒तु । स हि॑ वे॒द यथा॑ ह॒विः ।

शि॒वा अ॒स्मभ्य॑-मोष॒धीः । कृ॒णोतु॑ वि॒श्वच॑र्ष॒णिः ॥

भ॒द्रान्नः॑ श्रे॒यः स॑म॒नैष्ट॑ दे॒वाः । त्वया॑ऽव॒सेन॑ स॒मशी॑महि॒ त्वा ।

स नो॑ म॒योभूः॑ पि॒तो आ॑वि॒शस्व॑ । शं तो॒काय॑ त॒नुवे॑ स्यो॒नः ( ) ॥

ए॒तमु॒ त्यं म॑धु॒ना स॑म्यु॒तं ँ॒यव॑म् । स॒रस्व॑त्या॒ अधि॑म॒नाव॑च॒र्कषुः॑ ।

इन्द्र॑ आसी॒त् सीर॑पतिः श॒तक्र॑तुः ।

की॒नाशा॑ आसन् म॒रुतः॑ सु॒दान॑वः ॥ 80 (14)

(पु॒र॒ए॒ता – वृ॑णीमहे – जु॒षे॒थाँ॑ – त॒र्प॒य – ता॒मृ॒तं न॑र्वे॒न – मी॒य॒से – स्यो॒न  
श्च॒त्वा॒रि॑ च) (A8)

=====

**Prapaataka Korvai with starting Words of 1 to 8 Anuvaakams :-**

(जुष्ट - श्रक्षुषो - जुष्टी नरो - नक्तं जाता - वृषा स -  
उत नो - वृषाऽस्य ऽशुः - स प्रलवदष्टौ)

**Korvai with starting Words of 1, 11, 21 Series of dasinis :-**

(जुष्टो - मन्युर् भगो - जुष्टी नरो - हरिवर्पसं गिरः - शिप्रिन्  
वाजाना - मुत नः प्रिया [मुत नो] - यद् वाग्वदन्ती -  
विश्वा आशा अशीतिः )

**First and Last Word - 2<sup>nd</sup> Ashtakam 3<sup>rd</sup> Prapaatakam :-**

( जुष्टः - सुदानवः )

॥ हरिः ओं ।

॥ कृष्ण यजुर्वेदीय तैत्तिरीय ब्राह्मणे द्वितीयाष्टके चतुर्थः प्रपाठकः समाप्तः ॥

=====

**Details of Dasini & Vaakyams for  
Ashtakam 2, Prapaatakam 4 (TB 2.4)**

	Dasini	Vaakyams
Anuvakam 1	11	111
Anuvakam 2	9	91
Anuvakam 3	13	136
Anuvakam 4	10	99
Anuvakam 5	7	77
Anuvakam 6	12	124
Anuvakam 7	11	114
Anuvakam 8	7	74
Total →	80	826

## Appendix

### T.B.2.4.3.10 "एष ब्रह्मा{1}"

एष ब्रह्मा य ऋत्वि॑यः । इन्द्रो॑ नाम श्रु॒तो ग॒णे ॥

(Appearing in TB 3-7-9-5)

=====